

ಪಾಂಗೊಳ್ಳೆ

ಶ್ರೀ ಬಾಚರಣಿಯಂದ ಅಪ್ಪಣ್ಣ ಸಿಂಘ ಶ್ರೀಮತಿ ರಾಣು ಅಪ್ಪಣ್ಣ



ಕರ್ನಾಟಕ ಕೊಡನ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಪಾಂಸೂಚ

ಶ್ರೀ ಬಾಚರಣಿಯಂಡ ಅಪ್ಪಣ್ಣ

ಪಂಪ

ಶ್ರೀಮತಿ ರಾಣ ಅಪ್ಪಣ್ಣ

BVP-1058 - 9/1/17
(5) 963 - 4/87.



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

'PANGOLA' is an anthology composed by **Sri Bacharaniyanda Appanna and Smt. Ranu Appanna** Published by the **Karnataka Kodava Sahithya Academy, Madikeri.**

ಕ್ರಯ ಉ. 45/-

ಕ್ರಯ ಉ. 25/-

ಹಕ್ಕು :- ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಬೋಳಿಪಡ್ಡಾನ್ವ :-

ರಿಜಿಸ್ಟ್ರಾರ್

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಸೌಟ್ಸ್, ಬ್ಯಾಂಡ್ ಗೌಡ್ಸ್, ಕಟ್ಟಡ

ಮ್ಯಾನ್ಸ್, ಕಾಂಪೌಡ್‌ರ ಪಕ್ಕ

ಮಡಿಕೇರಿ : 571 201 ಫೋನ್ : 229074

ಪ್ರಕಾಶಕ ಸಮಿತಿ

ಶ್ರೀ ಚರಿಯಪಂಡ ಎಂ. ರಾಜಾ ನಂಜಪ್ಪ, ಅಧ್ಯಕ್ಷ

ಶ್ರೀಮತಿ ಉಳ್ಳಿಯಡ ದಾಟಿ ಪೂವಯ್ಯ

ಶ್ರೀ ಅಮ್ಮಣಂಡ ಎಂ. ಅಣ್ಣಯ್ಯ

ಶ್ರೀ ಚಕ್ಕೇರ ಎ. ತ್ಯಾಗರಾಜ್

ಶ್ರೀ ಕೆ. ದಾಮೋದರ, ರಿಜಿಸ್ಟ್ರಾರ್

ಶ್ರೀಮತಿ ತಾತಂಡ ಪ್ರಭಾ ನಾಣಯ್ಯ

ಶ್ರೀ ಐತಿಚಂಡ ರಮೇಶ್ ಉತ್ತಪ್ಪ

ಅಚ್ಚ್ಚಿ ಮಾಡ್‌ನವು :-

ಗುಡ್‌ಟಚ್ ಪ್ರಿಂಟರ್ಸ್

ಜಯಲಕ್ಷ್ಮಿಪುರಂ, ಮೈಸೂರ್.

ಫೋನ್ :- 2512626, 2517919

ಅಧ್ಯಕ್ಷರೊಡ ತರ್ಕ

ಕೊಡವ ಸಾಹಿತ್ಯತ್‌ಲ್ ಕವನ ಸಾಹಿತ್ಯ ಬೊಳಂದದ್ ಪೋರಾಂದ ತೋಂದುವ. ಕಥೆ, ಕಾದಂಬರಿ, ಸಾಹಿತ್ಯತ್‌ರ ಕೂಡ ಹೋಲಿಕೆ ಮಾಡ್‌ನಕ ನಾಟಕ ಸಾಹಿತ್ಯವೂ ಬೊಳಂದದ್ ಪೋರ. ಕವನ ಸಾಹಿತ್ಯ ಪಂಡ್ ನಂಗಡ ಅಜ್ಜ ಮುತ್ತಜ್ಜಂಗಡ ಕಾಲತ್‌ಲ್ ಭಾರೀ ಬೊಳಂದಿತಿಂಜತ್. ತರಾವರಿ ಜನಪದ ಪಾಟ್‌ನ ಓದ್‌ವಕ ಈ ಕಾಲತ್‌ರ ಪೆರಿಯಯಿಂಡ ಸಾಮರ್ಥ್ಯಕ್ ನಂಗ ಬೆರಗಾಯಿ ಪೋಪ. ಹರದಾಸ ಅಪ್ಪಚ್ಚಕವಿ ಪಿಂಞ ಡಾ|| ಐಚಿಟ್ಟಿರ ಮುತ್ತಣ್ಣ ಪೆರ್ತ್ ಮೇಲ್ಮಟ್ಟಿತ್‌ರ ಕವಿಯ. ಇಪ್ಪರ ಸುಮಾರೆಲ್ಲ ಕವನ ಪುಸ್ತಕ ಬೊಳಿಕಂಡಿತ್. ಪೆರ್ತ್ ಎಳ್ತಕಾರ ಕೊಡವ, ಕವನ ಎಳ್‌ದುವ ಪುರ್‌ಡ್ ಬೊಳತಿಯಂಡತ್. ಕೊಡವ ಭಾಷಿಕಂಗಳೇ ಅಲ್ಲತೆ ಬೋರೆ ಬೋರೆ ಮಾತೃಬಾಷೆಕಾರಳೂ ಪೆರ್ತ್ ನಲ್ಲ ಗುಣಮಟ್ಟಿತ್‌ರ ಕವನ ಎಳ್‌ದಿಯಂಡುಳ್ಳದ್ ನಲ್ಲ ಲಕ್ಷಣ.

'ಪಾಂಗೊಳ' ಎಣ್ಣಾವ ಈ ಕವನ ಸಂಕಲನತ್‌ಲ್ ಮಕ್ಕಕ್ ಮನರಂಜನೆರ ಪಾಟ್, ಕೊಡಗ್ ಪಿಂಞ ಕೊಡವಡ ತರಾವರಿ ಸಮಸ್ಯೆಕ್ ಸಂಬಂಧಪಟ್ಟ ಪಾಟ್, ನೀತಿ ಪ್ರಧಾನಪಾಟ್, ಕೊಡಗ್‌ರ ಪ್ರಕೃತಿವರ್ಣನೆ, ಪರಿಸರ ಸಂರಕ್ಷಣೆ, ಕೊಡವ ಪ್ರಾರ್ಥನೆ, ತರಾವರಿ ವ್ಯಂಗ್ಯತ್‌ರ ತಮಾಷಿ ಕವನ ಅಲ್ಲತೆ ಕುವೆಂಪು, ಡಾ||ಕೆ.ಎಸ್. ನರಸಿಂಹಸ್ವಾಮಿ, ಡಾ|| ಐ.ಮಾ.ಮುತ್ತಣ್ಣನಂತ ಕವಿಯಡ ಕನ್ನಡ ಪಾಟ್‌ರ ಭಾವಾನುವಾದವೂ ಕೂಡಿತ್ತುಂಡ್. ಚೆರಿಯದು ಬಲ್ಕದೂ ಕೂಡಿತ್ ಒಟ್ಟು 48 ಅಂಜ ಕವನತ್‌ರ ಈ ಕೃತಿನ ನಾಡ್‌ರ ಕವಿಯ ಓದಿತ್ ಸುಧಾರಣೆಕ್ ಸಲಹೆ ತಂದಕ ಸ್ವಾಗತ ಮಾಡುವ.

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ಬೊಳಿಪಡತ್‌ನ ಈ ಪುಸ್ತಕತ್‌ನ ಮೈಸೂರ್‌ರ ಗುಡ್‌ಟಚ್ ಪ್ರಿಂಟರ್ಸ್‌ರ ಮಾಲಿಕ ಶ್ರೀ ಪೊಯ್ಯೇಟಿರ ಎಸ್. ಗಣಪತಿ ಪೆರ್ತ್ ಕಮ್ಮಿ ಅವಧಿಲ್ ಚಾಯೋಡೆ ಅಚ್ಚ್ ಮಾಡಿತ್ ತಂದಾಂಗ್ ವಂದನೆ.

ಚರಿಯಪಂಡ ರಾಜಾ ನಂಜಪ್ಪ

1-11-2003

ಅಧ್ಯಕ್ಷ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಎಳ್ತಕಾರಡ ತಕ್ಕ್

ಈ ಪುಸ್ತಕತುಳ್ಳ ಕವನತನೆಲ್ಲ ಎಳ್ತದಂಡಿಕ್ ಕಯಿಂಜ ಇರುವತ್ತಮೂಂದ್ ಕಾಲತಂಜಿ ಬ್ರಹ್ಮಗಿರಿ ಪತ್ರಿಕೆ, ಕಯಿಂಜ ನಾಲಂಜಿಕಾಲತಂಜಿ ಪೂಮಾಲೆ ಪತ್ರಿಕೆ, ತೂಕ್ಬೊಳಕ್ ಪತ್ರಿಕೆ, ಕೊಡವ ಅಕಾಡೆಮಿರ 'ಕೊಡವಾಮೆ' ಸಂಚಿಕೆ ಪಿಞ ಕೊಡವ ತಕ್ಕ್ಕರ ಬೋರೆ ಬೋರೆ ಸ್ಮರಣ ಸಂಚಿಕೆಯ ಏರ್ಪಡತುವಂಜ ತರಾವರಿ ಪೈಪೋಟಿಯೇ ಕಾರಣ. ಈ ಪೈಪೋಟಿಲೆಲ್ಲ ಒಮ್ಮೆ ಇಮ್ಮೆ ಬಹುಮಾನ ಬಂದಿತ್ ಚೋದ್ ಕ್ಕಟ್ಟುವಕ ಇಂಞೊಮ್ಮೆ ಎಳ್ತದನಾಂದ್ ಪುರ್ಡ್ ಪುಟ್ಟುವ.

ಏದೇ ತರ ಎಳ್ತಾಡ್ ನಂಗ ವಡಿಯನೂ ಪೊಣ್ಣೂ ಕೂಡಿತೇ ಎಳ್ಳುವೊ. ಒಬ್ಬ ಎಳ್ತನಾನ ಇಂಞೊಬ್ಬ ತಿದ್ದಿತ್ ದಂಡಾಳ್ಕೂ ತೃಪ್ತಿ ಕಂಡಕ ಮಾತ್ರ ಅದಾನ ಪತ್ರಿಕೆ ಅಥವಾ ಸಂಚಿಕೆಕ್ ಅಯಿಪದ್ ನಂಗಡ ಕ್ರಮ. ಓರಮ್ಮ ನಂಗಡ ಮಕ್ಕಳೂ ಎಳ್ಳಿತ್ ತಿದ್ದ್ ಚಿಟ್ಟಿಂಡ್ ಅಯಿಪಂಜತ್.

ಪ್ರತಿಫಲ, ಪ್ರಸಂಶೆ ಉಂಡೇಂಗಿ ಪ್ರಯತ್ನ ತನ್ನಾಲೆ ಪುಟ್ಟುವ. ಅಕ್ಕ ಸಾಹಿತ್ಯ ಸೃಷ್ಟಿ ಆಪ. ಕೊಡಗ್ ಕೊಡವ ಪತ್ರಿಕೆಯಡ ಸಂಪಾದಕಂಗಳೊ ಪಿಂಞಕೊಡವ ಸಾಹಿತ್ಯ ಅಕಾಡೆಮಿರ ಅಧ್ಯಕ್ಷಂಗೆ ಪಿಂಞ ಸದಸ್ಯಂಗಳೊ ಕೃತಜ್ಞತೆಲ್ ನೆನತಿಯವ.

ಕುಶಾಲನಗರ
12.12.2003

ಬಾಚರಣೆಯಂಡ ಅಪ್ಪಣ್ಣ
ಪಿಂಞ
ಶ್ರೀಮತಿ ರಾಣು ಅಪ್ಪಣ್ಣ

ಪಾಠಗೊಳ

- | | |
|---------------------------|--|
| 1. ಕೊಡವ ದಾರ್ | 26. ಪ್ಲಾಂಟರ್‌ಡ ಮೋಂವೊ |
| 2. ಚದಿಯ ಕುರ್‌ಕ | 27. ಕುಡ್‌ಕಂಡ ಪ್ರಾರ್ಥನೆ |
| 3. ಕಾವೇರಿ ಕಲಿ ಪಾಡ್‌ಚಿ | 28. ಪೊಮ್ಮಣಿ ಜಿಮ್ಮಿ |
| 4. ಸ್ವಪ್ನತ್ ಅಪ್ಪಚ್ಚ ಕವಿ | 29. ರ್ಯಾಗಿಂಗ್ ಬೀರಂಗ |
| 5. ಬಾರ್ ಬುಫೆ (ಬಫೆ?)ರ ಮಂಗಲ | 30. ಕೊಡವ ಸಾಹಿತ್ಯ ಬೊಳಚೆ |
| 6. ಅಜ್ಜಂಡ ಪಳಮೆ | 31. ಕಾಡಾನೆಯ ಪಾಡ್‌ಚಿ (ಅವ್ವನೂ ಕುಟ್ಟಿಯೂ) |
| 7. ಬರ ಪೊಳೆ ಬರ ಪಾಡ್‌ಚಿ. | 32. ಕೊಡಗ್‌ರ ಕಥೆ ಇಂದ್ ವ್ಯಥೆ |
| 8. ನಾನ್ ದಾರ್? | 33. ಕೊಡವ ಪ್ರಾರ್ಥನೆ |
| 9. ನೆಲೆ ತೇಡಿ ಬಂದ | 34. ಪಾರಾಣೆ |
| 10. ಮಂತ್ರಿ ಬಕ್ಕು ! | 35. ಕವಿರ ಪಾಡ್ |
| 11. ಚುಟ್‌ಕ್ | 36. ಕಾಪಿ ಕಾಪಿ ಪಾಪಿ |
| 12. ಎಲಿಯಡ ಸಭೆ | 37. ಕುರ್‌ಟ್ ಇಾಯ |
| 13. ಪ್ರಾರ್ಥನೆ | 38. ತಮ್ಮಾವಂಗ್ ತಕ್ಕಾರ |
| 14. ಪಡೆಬೀರಂಡ ಪಾಟ್ | 39. ನಾ ದಾರ್ ಎಣ್ಣೆ? |
| 15. ಪಣಿ ಒಂದೆ ಫಲದಂಡ್ | 40. ಕ್‌ರ್ ಮೋಂವಂಗ್ |
| 16. ಕೊಡಗ್‌ರ ಸ್ಥಿತಿ | 41. ಜಮ್ಮಕಾರಂಡ ಮೋವ <u>ಭಾಷಾಂತರ</u> |
| 17. ಕೊಡಗ್‌ರ ಪ್ರದುಮೆ | 42. ಪೂ ಮೊಗ್ಗ್ ಚೋಂದಮ್ಮ |
| 18. ಪರಕೆ | 43. ಕೋಂಡಂಗು ಪೋಡೆಕು ಮಂಗಲ |
| 19. ಕೊಡಗೊಮ್ಮ ಸುತ್ತಿನೋಟ್ | 44. ಬೆರಿಯ ಬಾ |
| 20. ದೇಶಸೇವೆ ಕೆಯ್ಯನ | 45. ಪ್ರಕೃತಿನ ಕಾಪಾಡನ |
| 21. ಕೊಡಗದೇ ಸ್ವರ್ಗ | 46. ಅವ ದಾರ್? |
| 22. ಎಳ್ತ್ ಪಡಿಕ ಬಾರಿ | 47. ಮರೆನಾಡ್ ಮೂಡಿ |
| 23. ಕೊಡಗೊಮ್ಮ ನಡಂದ್ ನೋಟ್ | 48. ಮಂಗಳಂ |
| 24. ನಾಯಕಂಗಕ್ ಮನವಿ | |
| 25. ಕೊರಿಯ ಸೇವೆ | |

ಕೊಡವ್ವೊ ದಾರ್?

ಕೊಡವನಾರ್‌ಂದ್ ನೀನರ್‌ಂಜಿ ನೋಟುವಿಯಾ?

ಕೊಡವಂಡ ಗುಣ ನೀತಿ ಬಿರ್‌ಂಜಿ ಕಾಟುವಿಯಾ?

||ಪಲ್ಲವಿ!!

ಪತ್ತಾಳ್‌ರೆಡೆಲೆಂದು ತಿರ್‌ಂಜಿ ಕಾಂಬಂವೊ ಕೊಡವೊ
 ಎತ್ತರತ ಮಾಟತ್‌ಲ್ ಎದ್‌ ಕಾಂಬಂವೊ ಕೊಡವೊ
 ಶಿಸ್ತ ನೇಮತ್ ನಿತ್ಯ ನಡಪಂವನೆ ಕೊಡವೊ
 ಗತ್ತ್ ಗಾಂಭೀರ್ಯತ್‌ರ ಒತ್ತ ಆಳಂವೊ ಕೊಡವೊ.

ಚದಿಮೋಸ ದಗ ತಾನ್ ಅರಿಯತಂವೊ ಕೊಡವೊ
 ಕೇಡ್ ಕಿಚ್ಚಾರ ಜನಳ ದೂರ ಬೆಪ್ಪಂವೊ ಕೊಡವೊ
 ಚಾಡಿ ತಕ್ಕಕ್ ಚೌಡ ನಾಯಿತಿಪ್ಪಂವೊ ಕೊಡವೊ
 ಕೇಡ್‌ಗನ ಕಾಂಬಕ್ಕ ಮೂಗನಾಪಂವೊ ಕೊಡವೊ

ಮಾನಕಂಜಿತ್ ತಾನ್ ಪ್ರಾಣ ಕೊಡಪಂವೊ ಕೊಡವೊ
 ಜಾಣತನತ್‌ಲ್ ಜನಳ ಜಯಿಸುವಂವೊ ಕೊಡವೊ
 ದಾನಧರ್ಮಕ್ ತಾನ್ ಮಿಂಗಳಿಪ್ಪಂವೊ ಕೊಡವೊ
 ಆಣ್ ಪೊಣ್ಣ್‌ಂದ್ ಭೇದ ಬೆಕ್ಕತಂವೊ ಕೊಡವೊ

ಪಡೆಯಾಳಿ ತಾನಕ್ಕು ಪಡೆಲ್ ಮಿಂಗಳೆ ನಿಕ್ಕು
 ಪಡೆಪೊತ್ತ್ ತಾ ಶತ್ರುನಡಕಿಬಕ್ಕು
 ಕೆಡತಿಕ್ಕು ಧೈರ್ಯ ಅಂವೊ ಸತ್ಯ ಬುಡತಿಕ್ಕು
 ತೆಡ್‌ಪೋಲೆ ಮಿನ್ನಿ ತಾ ನೆಲಂಗಿ ನಿಕ್ಕು

ಕಷ್ಟಕಂಜತಂವೊ ತಾನ್ ದುಷ್ಟಂಗಂಜತಂವೊ
 ನಷ್ಟಪಟ್ಟಕಲು ತಾನ್ ಭ್ರಷ್ಟನಾಗತಂವೊ
 ಪೊಟ್ಟಪರಂದಂಡ್ ಎಂದು ಪೊಟ್ಟೆ ಪೋತತಂವೊ
 ನಟ್ತ್ಯ ಬೊಳೆ ಬೊಳ್ತೀತೇ ಒಕ್ಕತಾಂಗುವಂವೊ.

ಮತಭೇದ ಅರಿಯತಂವೊ ಅತಿಯಾಸೆ ಕ್ಳಿಯತಂವೊ
 ನೀತಿವಂತನೆ ಮೇಲ್ ಜಾತಿಂದರಿಯುವಂವೊ
 ಚೋತ್ ಬಂದವನ ನೇತಿ-ಪೋತಿ ಚಾಕುವಂವೊ
 ಸ್ವಾರ್ಥಕ್ಳಿಯತೆ ಜಗತ್ ಕೀರ್ತಿ ನೇಡುವಂವೊ

ಪೋಡಿಂದೆಣ್ಣುವ ಶಬ್ದ ಅರಿಯತಂವೊ ಕೊಡವೊ
 ಮೂಢನಂಬಿಕೆಕೆಂದು ಬೂವತಂವೊ ಕೊಡವೊ
 ನೇಡಿ ತುಂಬವನೆ ಅಂವೊ ನೇರಾನ ಕೊಡವೊ
 ಬೋಡಿ ತುಂಬವನಲ್ಲ ತಾನಾನಕಲು ಬಡವೋ!

|| ಕೊ ||

* * * *



ಚದಿಯ ಕೂರ್ಕ!

(ಮಕ್ಕಡ ಕತೆ ಆಧಾರ)

ಕರ್ಂಜಿ ಕಾಕೆಯೊಂದ್ ಅಂದ್
 ಊರ್-ಕೇರಿ ತುಕ್ಕಿಯಂಡ್
 ಪಾರಿ ತೇಡಿ ಪೂರ್ಕಾಚೋರ್
 ಯರ್ಚಿ ತುಂಡ್ನ!

ಕೊಕ್ಕಾಲದ್ನ ಕೊತ್ತಿಯಂಡ್
 ಗತ್ಲಲ್ತ ಚಾಯಿ ಕಂಡ್
 ಕೆಣಿಯ ಕುರ್ಕ ಪಕ್ಕ ಬಂದ್
 ಕೇಟಿತ್ತಿನ್ನನೆ:

ಕಾಕೆಯಕ್ಕ ಎಕ್ಕ ಬಂದ
 ಮಕ್ಕ ನೀಡ ಸೌಖ್ಯತುಂಡ
 ದುಃಖ ನೀಕ್ ಎನ್ನೆಂಗುಂಡ
 ತಕ್ಕ ಪರೆಯನ!

ಮಿನ್ನಂಗಣ್ಣೆ ಮೊಮ್ಮ ನೀನ್
 ಮಿನ್ನಿ ಮಾಲೆ ಕನ್ನಿ ನೀನ್
 ಕಣ್ಣ್ ಕುತ್ತುವನ್ನತೋರ್
 ಪೊನ್ನ ಮೇಲದ್!

ಏಡ ಬೋಜಿ ಮಾಂವಿ ನೀನ್
 ಏದ್ ಬೋಜ ನೀಡ ಮೇಲ್
 ನೀಡ ಪಾಟ್ ಎನ್ನ ಚೋದ್
 ಪಾಡ್, ಕೇಕನ!

ಹೊಗಳ್ನಾನ ಕೇಟ ಕಾಕೆ
 ಜಗತ್ ತಾನೆ ಚಾಯಿಂದುಬ್ಬಿ

'ಕಾವ್ ಕಾವ್'ಂದೆಣ್ಣಿ ತೋರ್
ರಾಗ ಪಾಡ್ಚಿ!

ಕೊಕ್ಕ ತೋರ್ಂದ್ ಪಾಡುವಕ್ಕ
ಕೊಕ್ಕಲಿಂಜ ಯರ್ಚಿ ತುಂಡ್
ಪುಡ್ತ ತಪ್ಪಿ ಮರತಾರಡಿಕ್
ತೆರಾಚಿ ಬುದ್ಧತಾ!

ಕೆಣಿಯ ಕುರ್ಕ ಕಡ್ಚಂಡದಾನ
ಓಣಿಕಾಲೆ ಓಡಿ ಪೋಚಿ
ಮೋಸ ಪೋನ ಕಾಕೆಯಕ್ಕ
ಮೋರಾಟಂಡಳ್ತಾ!

ತುದ್ಚಿ ಪರೆವ ತಕ್ಕ ಕೇಟ್
ಚದಿಕ್ ಕೆಣಿವಕಾಗ ಎಂಗ
ಬದ್ಕುವಕ್ ಬಟ್ಟೆ ನಂಗ
ಪಡ್ಚಿ ನಡ್ಕಂಡು!

* * * *



ಕಾವೇರಿ ಕಲಿ ಪಾಡ್‌ಚಿ

(1987 ನೆ ಇಸವಿಲ್ ಜೂನ್‌ಕೆತ್ತಣೆಕೂ ಮಳೆಯೇ ಪೊಜ್ಜೆ ತಿಲ್ಲೆ)

ಆಯಿರತೊಂಬಯಿನೂಯಿಟ ಎಂಬತ್ತೇ-
ಳಾದರೆ ಪರಂದ ಚಂಗ್ರಾಂದಿಕ್
ಕಾವೇರಿ ತಾಯಿರ ತೇರತ ಕುಳಚಿತ್
ದೇವರ ತೊಪ್ಪಕ್ ಪೋಯಿತಿಂಜ.

ತಿಂಗತೊಡಕಂದ್ ಸಂಗಮ ಕುಳಚಿತ್
ಲಿಂಗಕ್ ತೊತ್ತಿತ್ ಕೈಮಲಂಗಿ
ಕುಂದ್ ಮೊಟ್ಟೆ ಬಟ್ಟೆ ಪತ್ತಿತ್ ಎತ್ತಾನ
ಕುಂದ್ ಕೊಡಿಲುಳ್ಳ ಬ್ರಹ್ಮಗಿರಿ.

ಪಂಡ್ ಕಾವೇರಮ್ಮ ನೀರಾಯಿತೊಕ್ಕನ
ಕುಂಡಿಕೆಕ್‌ಳಂಜಿತ್ ಮಂಡೆ ಮುಂಜೆ
ಪುಂಡೆ ಮೇಲ್‌ಲೆದ್ದ್ ಕೈ ತೊತ್ತ್ ನಿಕ್ಕಣೆ
ಕಂಡ ನಾನಕ್ಕೋರ್ ಸುಂದರಿನಾ !

ಕೊಡವತಿ ನೆರಿ ಬೆಚ್ಚಿ ಜಡೆಬಿರಿಂಜಿ ಬುಟ್ಟುಂಡ್
ಎಡ್‌ತಂಡ್ ನಡುಲವ ಕೊಡತ್ ನೀರ್
ಮೂಡ್ ಎಲಂಗ್ಗುಂಡ್ ಮಂಡೆ ಮಲಂಗ್ಗುಂಡ್
ತೆಡ್ ಮಿನ್ನಚವಡದ ತಡಿಲ್‌ವೊಂದ್

ಬೊತ್ತಿತ್ ನೆಟ್ಟಾನ ಮೊಟ್ಟೆಡ್‌ಕತಾನ
ತೊತ್ತ್ ನಿಂದ ನಾನ್ ಮಾತಾಯಿಕ್
ಕತ್ತಿತಲಂಗುವ ತಿತ್ತ್ ಮೂಡ್‌ಲವ
ಪತ್ತ್‌ಮೊಳಿ ಕಲಿ ಪಾಡ್‌ಚವ.

"ಕೊಡಗ್ಗರ ಕುಂಞ್ಕಳ ಕೊದ್ಚಿನಾ ತಾಂಗ್ನ
ಪಡತ್ಲೆ ಗೋಳ್ ನಾ ಕೊಡ್ತ ಕೂಳ್
ನಡಪ್ಪಲ್ ತಪ್ಪೀರ ನೀತಿ ಮರಂದೀರ
ಮದ್ಚಿ ಕಳ್ಚಿರ ಮಾಲೋಕತ್.

ಜಮ್ಮಕ್ ನಯಿಚವು ಮೂಲನಿವಾಸಿಯ
ಒಮ್ಮಲು ಒಂದಾಯಿ ಕೂಡುಲೆಲಾ
ನಮ್ಮೆಲು ನಾಳ್ಲು ಪಿಂಗಿತ್ಕಾಂಬಕ
ನೆಮ್ಮದಿದಾ ಬಾಳ್ ಕಾಂಬ್ಲೆಲಾ.

ಅಮ್ಮಕೊಡವರು ಹೆಗ್ಗಡೆ ಐರಿಯೂ
ಜಮ್ಮ ಮಾಪಳೆಯ ಕೋಲೆಯಳೂ
ಮಲಿಯ ಮಡಿವಾಳ ಗೊಲ್ಲ ಕೆಂಬಟ್ಟಿಯೂ
ಕುಡಿಯ ಕಾಪಾಳರು ನಾಡ ಮಕ್ಕ.

ಕಳ್ಳಕಾಕಡೋರ್ ಪಲ್ಲ್ಳಿ ಕಾಂಬಕ
ಬಲ್ಲಿಯ ತಕ್ಕಾರ ಮಾಡುವಿರಾ
ಜಿಲ್ಲೆಲೆ ಪುಟ್ಟಿತೂ ಬಲ್ಯವನಲ್ಲೇಂಗಿ
ಕಳ್ಳಂದ್ ತಕ್ಕಾರ ಮಾಡುವಿರ

ಭಂಡಾರ ಕಪ್ಪಂವೊ ಮಂಡೆ ಒಡ್ಪಂವೊ
ಪುಂಡ ಪೋಲಿಯಳ ಕೊಂಡಾಡಿರ
ಕಂದ್ ಕರ್ ಬೆಂದು ಒಂದ್ಂದರಿಯುಲೆ
ನಂದಾಪ ನಡಪುನ ಮರಂದಿರದ

ಪಣತ್ರ ಆಶೆಕ್ ಬನಕಾಡ್ ಮುಡ್ಚಿರ
ಒಣಕಿರ ತೋಡ್ ಕಣತರೆನ
ಪಣತ್ರ ಚೊಕ್ಕಲ್ ಪಾರಿಕಳಿಪಿರ
ದಣತಿರ ನೀತಿಲ್ ನಡಪಯಿನಾ.

ನ್ಯಾಯಕು ಧರ್ಮಕು ನೆಲೆಯಿಲ್ಲತಾವಕ
 ಕಾಯಕು ಕಷ್ಟಕು ದೇವಳಾಗ
 ಆಯಿರ ತರತರ ಅನ್ಯಾಯ ಮಾಡಿರ
 ಆಯಿಮೆ ಕೋಯಿಮೆ ಮರಂದಿರಲಾ

ಚೊಕ್ಕಿತ್ ಮದ್‌ಚಂವೊ ಚಿಕ್ಕಿತ್ ಮರಕಂಡು
 ಬಕ್ಕುಲ ಬರಗಾಲ ಈ ಭೂಮಿಕ್
 ಒಕ್ಕಳು ಮಕ್ಕಳು ಪಟ್ಟಣಿ ಬೂವುಲ
 ಅಕ್ಕ ಅರಿಯುಲ ಧರ್ಮತಾನ

ಭೂತಾಯಿ ಚೆಡ್‌ಂಜಕ ಮಾತಾಯಿ ಮಿನ್‌ಂಜಕ
 ಕಾತ್ ಕಾಣತಾಕು ಕಾದ್ಯತ್‌ಲ್
 ಆಲಿ ಮಳೆ ಕಾಣ ಆದರೆ ತಿಂಗತ್
 ಬೇಲಿ ಒಣಂಗೂಲ ಕಕ್ಕಡತ್!

ಎಡ್‌ಮ್ಯಾರಾರಾ ತೆಡ್ ಕಾದ್ಯತ್‌ರಾಕಾತ್
 ಆದರೆರಾ ಜಡಿ ಮಳೆಯೊ
 ಕಕ್ಕಡ ತುಕ್ಕಿ ಮರಿವೋರ್ ಪೊಳೆತೋಡ್
 ದಿಕ್ಕಾಲೆ ಕಾಣಲಾ ಈ ಕಾಲತ್.

ಕೆರೆತೋಡ್ ಬತ್ತೂಲ ಮರಕಾಡ್ ಒಣಂಗೂಲ
 ಬರ ಬಕ್ಕು ನೀರ್‌ಕ್ ಮಳಿಯಿಲ್ಲತೆ
 ಆಕ ಒಡಿಯೂಲ ಏಕ ಒಣಂಗೂಲ
 ಬಾಕಾಡ್ ಬನಬಾಡಿ ಪೋಕು ಅದಾ.

ಉಟ್ಟಿ ಮಂಡೆಕಾಯು ಕಕ್ಕಡ ತಿಂಗತ್
 ಉಟ್ಟಿ ಕುತ್ತಿ ಪೋಕು ನೆಲ್ಲಕ್ಕಿಕ್
 ಕಟ್ಟೆ ರೋಗ ಬಕ್ಕು ಯಾಲಕೂ ಕಾಫಿಕೂ
 ಪಟ್ಟಣಿ ಬೂವುಲ ಕೊಟ್ಟ್‌ಲತ್ತ

ಪೊಮ್ಮಾಲೆ ಕೊಡಗಲ್ ಒಮ್ಮಲು ಕಾಂಗತ
 ಮಮ್ಮಾಯತವತಾರ ಕಾಂಗು ಅದಾ
 ನೆಮ್ಮದಿ ತಪ್ಪಾನ ನೆಲೆಯಿಲ್ಲ ತಾ ಬಾಳ್
 ಅಮ್ಮೆ ಕಾವೇರಿರ ನಾಡ್‌ಲದಾ.

ಮರಕಾಡ್ ಕೆತ್ತಿತ್ ಬರಗಾಲ ಕಾಕತಿ
 ಸರಕಾರಿ ಸಾಲಕ್ ಕೆನ್‌ಟಿತಿ
 ಬರ ಬಂದ ಕಾಲತ್ ಬಾರ್‌ಲಳಕತಿ
 ಮರೆಯತಿ ನಾಡ್‌ರ ನಡಪುನೆಲ್ಲ

ಅರ್ಥ ಇಲ್ಲತ ವ್ಯರ್ಥ ಖರ್ಚಿನೆಲ್ಲನೊ ಬುಟ್ಟ್
 ಪೆರ್ತ್ ಎಚ್ಚರ ಬೆಚ್ಚಿ ಬರಗಾಲ ನೀಕಿ
 ತರ್ತೆ ತಿಂದಿತ್ ನಿಂಗ ತೇಕ್‌ಲ್‌ಟ್ಟಕ ಪೋರ
 ಪೆರ್ತ್ ಪೋಕುಲ ಪುಂಡ್‌ಕೊಲೆ ಪಯಿಚ ಕೆಲ ಉರಿಲ್.

ಉಳ್ಳೋರ್ ಕೂಳ್‌ನೊ ನೆಲ್ಲಕ್ಕಿ ಪಿಲ್ಲನೊ
 ಎಲ್ಲಾರು ಸೆರಿಕೊತ್ತ್ ಪಾಲ್‌ಟ್ಟೋಳಿ
 ಪಟ್ಟಣಿ ಬೂಕತಿ ಪಯಿಚ ಕೆಲತ್‌ನ
 ಕೆಟ್ಟಿ ಕೂಟಿ ನಿಂಗ ಬೆಚ್ಚವತಿ.

ನಲ್ಲ ನಡಪುಲ್ ನಿಂಗ ನಡಂದಿನೋ
 ನಂದಾಕಿ ಪೊಲತುವಿ ಈ ನಾಡ್‌ನ
 ಎಂದೆಣ್ಣಿ ತಾ ಕನ್ನಿ ಕುಂಡಿಕೆಕ್‌ಳಿಂಜತ್
 ಮಂಡೆ ಮುಳಿ ಪೋಚಿ ಮಮ್ಮಾಯಿತ್ !!

* * * *



ಸ್ವಪ್ನತ್ ಅಪ್ಪಚ್ಚಕವಿ

ಆಲಿ ಮಳೆಲಂದ್ ಪೂವೊರಕ್ಕೊರವಕ್ಕ
 ಕಂಡನಾನಂದೋರ್ ಸ್ವಪನ.
 ಕುಪ್ಪ ಚೇಲೆ ಕಟ್ಟಿ ಅಪ್ಪಚ್ಚ ಕವಿ ಬಂದ್
 ನಿಪ್ಪ್ ಕೈ ಬೆಚ್ಚಿ ಕೇಟತೆನ್ನ.

ಕೊಡಗ್ಗರ ಕುಂಞಿಯ ಕೊದಿಯಾನ ಮಕ್ಕಳೊ
 ನಡಪ್ ನೆಲೆಲಿಂದು ಉಂಡಾ?
 ಜಮ್ಮ ಜಾಗಯೆಲ್ಲ ಕೊಡವಡ ಪೆದತ್‌ಲೆ
 ಜಮಾಬಂಧಿ ದಾಖಿಲುಂಡಾ?

ಬೆಂದು ತಕ್ಕಾರತು ಉಂಡ್ ಕುಡಿಪಾಲು
 ಇಂದೇಕು ಆ ನಡಪುಂಡಾ?
 ಕಂದ್‌ಕರ್ ಕೂಡಿ ಒಂದಾಯಿ ಬಾವೊರ್
 ಬೆಂದು ಚಾಚೆ ಬೆಚ್ಚಿತುಂಡಾ?

ಮುಂದ್ ಮನೆ ಬೋಜ ಮುಂದ್ ಮಾನಿ ಬೋಜ
 ಇಂದೇಕೂ ಆಚಾರತುಂಡಾ?
 ಒಕ್ಕಾಮೆ ತಕ್ಕಾಮೆ ಇಕ್ಕಲು ಬೆಚ್ಚಂಡ
 ತಕ್ಕ ತೌಂದಾರಿಯಳುಂಡಾ?

ಪುತ್ತರಿ ನಮ್ಮೆರ ಒತ್ತೊರಮೆರೆಲ್ಲ
 ಮುತ್ತ್ ಪೋಲೆ ನಡಪುಂಡಾ?
 ಪಟ್ಟಣ ಶೆಟ್ಟಕೂ ಚೆಟ್ಟಾರ್ ಕುಟ್ಟಕೂ
 ಜಮ್ಮ ಮಾರಿ ಪೋನವುಂಡಾ?

ಚಂಡೆಕೊಟ್ಟೊಡಾಟ್ ದುಡಿಕ್ಕೊಟ್ಟೊಡಾಪಾಟ್
 ಕೂಡ್‌ನ ನಮ್ಮೆ ನಾಳುಂಡಾ?
 ಕೋಲಾಟ್ ಕೊಂಬಾಟ್ ಉಮ್ಮತ್ತ ಆಟೆಲ್ಲ
 ಪಾಳಾಕತೆ ಬೆಚ್ಚಿತುಂಡಾ?

ಕುಪ್ಯಚೇಲೆ ಕೆಟ್ಟಿ ಮಂಡೆ ತುಣಿಲ್‌ಟ್ತ್ಯಾ
ಒಪ್ಪಾರ ತೆಲಂಗಿಯಂಡುಂಡಾ?
ಬೀರಾಳಿ ಪೊಡಿಯಕ್ ಒತ್ತೋರ್ ಕಳಕುಪ್ಪ
ಚಾರಿ ಬೂವತನೆಕುಂಡಾ?

ಪತ್ತಾಕ್ ಡಾಕೆಟ್ತ್ಯಾ ಮೊಲಕೆಟ್ತ್ಯಾ ಬರಿಕೆಟ್ತ್ಯಾ
ಉತ್ತಿ ಬೂವತ್ತನೆಕುಂಡಾ?
ನೆತ್ತಿ ಕುರಿಲ್‌ಟ್ತ್ಯಾ ನೆತ್ತ ಚಾಂದ್ ಬೊಟ್ತ್ಯಾ
ತಪ್ಪತೆ ಇಟ್ಟುಂಡೆ ಉಂಡಾ?

ಕೊಂಬ ಮೀಸೆ ಬುಟ್ತ್ಯಾ ಬಂಬ ತನತ್‌ಲ್
ಜಂಬಾರ ನಡತಿಯಂಡುಂಡಾ?
ಪೋಲಿ ಪೊರ್ಕಿನ ದೂರ ತೆರಕಿತ್
ಪೊಲಿಚಾರ ಕಾಟಿಯಂಡುಂಡಾ?

ಚತ್ತಾಂಗು ಪೆತ್ತಾಂಗು ಕಷ್ಟಕೂ ಕಾಯಕು
ಸುತ್ತಜನ ಕೂಡಿ ಬಪ್ಪಾ?
ಸಂಗಮ ಕುಳ್‌ಚಿತ್ ಮಂಡೆ ಉಳ್‌ಪಿತ್
ಪಿಂಡ ಬೆಚ್ಚಿ ಬಪ್ಪದುಂಡಾ?

ಕೊಡವ ತಕ್ಕಬುಟ್ತ್ಯಾ ಎಡೆಮೇಂಗಿ ಪರೆಯುವ
ಜಡ್ಡ್ ಕೊಡವನ್ ಉಂಡಾ?
ಕೊಡವತನ ಬುಟ್ತ್ಯಾ ಬಡುವ ಪೊರಪಾಡ್‌ರ
ಜಿಡ್ಡ್ ಕೊಡವತಿ ಉಂಡಾ?

ಪಂಡ್ ಪೋಲೆ ನಿಂಗ ಇಂದೇಕೂ ಉಂಡೇಂಗಿ
ದಂಡನೆ ಜನ್‌ಮ ನಾಕೇಪಿ.
ಯಮಧರ್ಮ ರಾಜನ ಮರುಜನ್ಮ ಬೋಡಿತ್
ಕೊಡಗ್‌ಲ್ ಪುಟ್ಟನಾ ಬಪ್ಪಿ.

ಎಂದೆಣ್ಣಿತಾ ಕವಿ ಊಜಳೆ ಬುಟ್ಟಿತ್
ಪೂ ವೊರಕ್ಕಲಿಂಜಿ ನಾನೆಟ್ತ್ಯನ
ಮಾಕವಿರಾತ್ಮಕ್ ಶಾಂತಿ ಬಯಂದಂಡ್
ನಾಲ್ ಮೊಳಿಪಾಟ್ ನಾ ಕೆಟ್ತ್ಯನ

ಬಾರ್ ಬುಫೆರ ಮಂಗಲ (ಬಫೆ?)

ಕೊಡಗ್‌ದೇಶ ಕಾಡ್‌ಮೂಲೆ
ಬಡಕೊಯಂದ ಕುಂದ್‌ರಡಿಲ್
ನಡ್‌ಪ್ ನೆಲೆಲ್ ಬದ್‌ಕಿ ಬಾಳ್ ನೀಸ್‌ನಜ್ಜ !

ಎಡ್‌ಪ್ ಕೊಡ್‌ಪ್ ದಾನಧರ್ಮ
ಕೊಡವತನಕ್ ಬೊಳಂದ ಜೀವ
ಬಡತನತ್ ಪೊಲಂದ ಎಂಗಡಯ್ಯಪ್ಪಜ್ಜ !

ಊರ್‌ನಾಡ್‌ಲೆಲ್ಲ ಸುತ್ತಿ
ಆರ ಬೇರ ಅರಿಂಜಿತಿಂಜ
ಕಾರ್ಯ ಬುಟ್ಟ್ ಕಳಿಕತೋರ್ ಊರ್‌ರಜ್ಜ !

ಮಂಗ್‌ಲತ್ ಕೊರವು ನಡತು
ಮಾದತ್‌ಲ್ ಪೊಲ್‌ಚಿ ಪಾಡು
ಚತ್ತ ಫತ್ತ ಸುದ್ದಿನರ್‌ಂಜಿ ಪೋಯಿ ಬಕ್ಕು !

ಪಂಡ್ ಪೋಲೆ ನಡ್‌ಪುಯಿಲ್ಲೆ
ಮುಂದ್ ಮುಂದ್ ಮರಂದಿತಿಂದ್
ಕೊಂಬ್ ಕೊಟ್ಟ್ ಕೇಪದಿಲ್ಲೆ ಊರ್‌ಲೆಲ್ಲಿಯು !

ಕಾಲ ಬದ್‌ಲ್ ಆಯಿಪೋಚಿ
ಕಾಲಕೊತ್ತ ಕೋಲ ಕಟ್ಟಿ
ಸಾಲ ಸೋಲ ಮಾಡಿ ಕೊಡವ ಮೂಲೆಕಾಚಲ !

ಮಂಗಲ ಕುರಿ ಬಾರ್‌ರೊಳ್‌ಲ್
ಮಂಗಲೆಲ್ಲ ಸಮಾಜತ್
ಅಂಗನರುವನೆಲ್ಲ ಇಂದ್ ಕೇಪದಿಲ್ಲೆಲ !

ಪೇಟೆಲೋರ್ ಮಂಗಲಕ್
 ಕೂಟಕೂಡಿ ಪೋನ ಮಕ್ಕ
 ನೋಟ್‌ನಾನ ಬಂದ್‌ಮನೆಲ್ ಅಳತ್ ಪರಂದತ್!

"ಬಾರ್ ತೊರಂದಿತಿಂಜತಲ್ಲಿ
 ಭಾರಿ ಭಾರಿ ಬ್ರಾಂಡಿ ರಮ್
 ಆರ್ ತರತ ವೈನ್ ಮೂಡಿ ಮಕ್ಕಕ್ಕಿಂಜತ್!

ಊರ್‌ಕೂಡುವಂದ್ ಕೂಡ
 ಬಾರ್ ಬಫೆ ಮಾಡಿತಿಂಜ
 ಭಾರಿ ಕುಳಂದೆಣ್ಣೆತದ್‌ನ ತುದ್‌ಚಿ ಪಾಡ್‌ಚಿ!

ಪಂಡ್ ಕೊಡವ ಮಂಗಲತ್
 ಪಂದಿ ಕರಿಯು ತಳಿಯಪುಟ್ಟು
 ಉಂಡ್ ತಿಂದ್ ತೇಕ್‌ಲ್‌ಟ್ ಪೋಪದಿಂಜತ್!

ಬಾರ್ ಬಫೆರ ಕೇಳಿ ಕೇಟ್
 ಬೇರಗೊಂಡ್ ಅಳತತಜ್ಜ
 ಬರಂಡು ಕಣ್ಣ್‌ದುಂಬ ನೋಡಿತ್ತದ್‌ನ ಒಮ್ಮಂದ್!

ನಾಳೆಕೆಟ್ತ್ ತಿಂಗಳಾಚೆ
 ಗೋಣೆಕೊಪ್ಪ ಮಂಟಪತ್
 ಭಾರಿ ಜೋರ್ ಮಂಗಲದ್ ಜೂಲಿ ಮೂಡಿರ !

ಪಳಮೆ ಕೇಟ ಅಯ್ಯಪ್ಪಜ್ಜ
 ತಾನೆ ಪೋಯಿ ಬಪ್ಪಿಂದೆಣ್ಣೆ
 ತೇಂಜ ಕುಪ್ಪ ಕೀತ್‌ಚೇಲೆ ಎಡ್‌ತ್‌ಬೆಚ್ಚತ್!

ಊರ್‌ಕೂಡುವಂದ್ ಬೈಟ್
 ನೇರ ತಾರುವಾಂಗ್ ಮಿಂಞ
 ಕಾರ್‌ಬಾರ್‌ಕೆತ್ತಂಡೂಂದ್ ಪೋರಟ್‌ನಿಂದತ್!

ಕೊಂಬ ಮೀಸೆ ತಿದ್ದಿ ಬೆಚ್ಚಿ
ತಂಡ್ ಕೊಡೆ ಕೈಪುಡ್‌ಚಿ
ಆಂಗಿ ಜೂಂಗಿ ಸಮಾಜಕ್ ಬಂದಿತೆತ್ತ್‌ಚಿ!

ಬಾಳೆಕಂಬ್ ನಟ್ಟಿತುಂಡ್
ಕಾಳೆಪಂದಿ ಕೆತ್ತಿತುಂಡ್
ಸಾಲಡಂಗ ಬಾಲಡಂಗ ಬಂದ್ ಕೂಡಿತ್!

ಸಾಲ್ ಸಾಲ್ ಕಾರ್‌ಜೀಪ್
ಮಾಲೆ ಪೂವ್ ತೋರಣವೂ
ಸ್ವಾಗತಕ್ ಚಾಯಿಕರತಿ ಮೂಡಿಮಕ್ಕಳೂ!

ಮೇಜಿಕ್‌ಡಿಯ ಪಟ್ವಾಬಿರ್‌ಚಿ
ಮೇಲೆ ಸಾಲ್ ತಟ್ಟೆಬೆಚ್ಚಿ
ತಟ್ಟೆದುಂಬ ತರಾವರಿ ಪುಟ್ವಾ ಇಂಜತ್!

ಕೇಕ್, ಟಾಫಿ, ಕರ್ಜಿಕಾಯಿ
ಚತ್ತೆ ಪುಟ್ವಾ ಬರ್‌ತ ಪುಟ್ವಾ
ಏಳ್ ತರತ ರಂಗ್‌ರೆಲ್ಲ ತಿಂಡಿಯಿಂಜತ್!

ತಟ್ಟೆ ಪುಡ್‌ಚಿ ಕಾಟುವಕ್
ಪಟ್ಟುಡ್‌ತ್ತ ಮೂಡಿಯಳೊ
ದೆಟ್ವಾ ದಿಸ್ ಇಂಗ್‌ಲೀಸ್ ಪೊಟ್ಟವಂಜತ್!

ಕಾರ್ ಕಾರ ಬೆಂದ್‌ಕಳ
ಪಾರಿ ಪೋಯಿ ಮೇಲೆ ಬುದ್ಧ್
ಕಾಲ್ ಪುಡ್‌ಚಿ ಕಯ್ಯಾಕುಲ್‌ಕಿ ಕೂಟಿ ಬಾತ್!

ಊರ್‌ನಾಡ್ ತೋಯಂಗಳ
ತೆರ್ಮೆ ನೋಟಿ ತೆರಪ ಬೆಚ್ಚಿ
ಪರಕೆ ತೇತಪೋಲೆ ಚೆರಿಯ ತೆಳಿಲ್ ನೀಸಚಿ!

ಬಿರ್ಚಿ ಮಂಡೆ ಮೂಡಿಯಳು
 ಗರಿಕೆ ಗಡ್ಡ ಬಾಲೆಕಾರ
 ಇರ್ಚಿ ಮೂಲೆ ತೇಡಿ ಜೋಡಿ ಕೂಡಿತಿಂಜತ್!

ಎನ್ನಾಕಪ್ಪ ಪರವಕ್ಂದೊ
 ಏದ್ ನಪ್ಪ ಕೇಪಕ್ಂದೊ
 ಯಾಂವಂಡೊಕ್ಕ ಮುಡಿಪಕ್ಂದ್ ಪಚ್ಚಿ ಪರಂದತೊ !

ಅಂದಿ ಮುಂದಿ ಕಯಿಂಜತಲ್ಲಿ
 ಬಂದ್ ಕೂಡಿ ಎತ್ತಚೆಲ್ಲ
 ನಿಂದ್ ಚೋತ ಎಂಗಡಜ್ಜ ತಾಂಗಿ ಅಳತತ್!

"ಮಿಟ್ಟುಬಾರ ಕಿಟ್ಟುಬಾರ
 ಗಪ್ಪು ಜಪ್ಪು ಟಪ್ಪು ಬಾರಿ
 ಬಾರ್ ಓಪನಾಚಿ"ಂದೆಣ್ಣೆ ಕಿರಣ ಕಾಕ್ಚಿ!

ಬಾರ್ ತೊರಂದ ಸುದ್ದಿಕೇಟ್
 ಬಾಲೆಕಾರ ಪಾರಿ ಬುದ್ಧ
 ಕಾಲ್ ಚವುಡಿ ಮೇಲೆ ಬುದ್ಧ ಗುಡ್ಡೆ ಕೂಡ್ಚಿ!

ಜಡ್ಡ್ ಬುದ್ಧ ಜಾಗತ್ಲಾ
 ಪದ್ಡ್ ಗುಡ್ಡೆ ಬುದ್ಧ ಪೋಲೆ
 ಎದ್ಡ್ ಬುದ್ಧ ಓಡಿಪೋಯಿ ಕಯ್ಕೂಟಾಚಿ!

ಮಾಂವಂಗೊಂದ್ ಮಮ್ಮಿಕೊಂದ್
 ಬಾವಂಗೊಂದ್ ಡ್ಯಾಡಿಕೊಂದ್
 ನೇವನತ್ತ್ ನಾಲ್ನಾಲ್ ಎಡ್ತ್ ಪೊರ್ಟತ್!

ಮೂಲೆ ಮುಟ್ಟ್ ತೇಡಿ ನಿಂದ್
 ನಾಲ್ ಲೋಟ ಖಾಲಿ ಮಾಡಿ
 ಕಾಲ್ ತೆರಚಿ ಕಣ್ಣ್ ಮರೆಚಿ ತುಳ್ಳಿಕ್ಳಚತ್!

ಮಾನಕಂಜಿ ಮಡ್‌ಚತಜ್ಜ
 ಗೇನ ದಾಕು ಬಂದದಿಲ್ಲೆ
 ತಾನೆ ಪೋಯಿ ನೋಟಣೆಕ್ ಬಾರ್ ಮುಚ್ಚಿತ್ !

ಪೇಟೆಕೋಡಿ ಪೋಯಿತಜ್ಜ
 ಕಾಟಿ ಶಾಪ್ ಕಂಡ್‌ಪುಡ್‌ಚಿ
 ಕ್ವಾರ್ಟರರಿಕಿ ಬೀಡಿಬಲ್‌ಚಿ ಬಂದಿತೆತ್ತ್‌ಚಿ !

ಉಂಬನೇರ ಆಚಂದೆಣ್ಣೆ
 ಕಯ್ಯು ಬಾಯೊಲಂಬಿತಜ್ಜ
 ಕಂಬು ತಾಂಗಿ ಕಾಲ್‌ನೋಟಿ ಉಂಬಕಳ್‌ತತ್ !

ದಾರು ಪಕ್ಕ ಬಂದದಿಲ್ಲೆ
 ಬೋರೆ ದಾರು ಅಳ್‌ತಿತ್ತಿಲ್ಲೆ
 ತಾಯಿಯೊಬ್ಬ ಬಂದಿತಜ್ಜಂಗಿನ್ನೆಣ್ಣೆಚಿ !

"ಸಾಲ್‌ಕಟ್ಟಿ ಅಳ್‌ಪದಿಲ್ಲೆ
 ಕೂಳ್ ಕರಿ ಬೊಳಂಬಲಿಲ್ಲೆ
 ಆಲೆಪೋಯಿ ನೋಟಿ ಅಲ್ಲಿ ಬಫೆ ಮಾಡಿತ್ !"

ಎದ್‌ಪೋಯಿ ತೇಡ್‌ಚಜ್ಜ
 ಗುಡ್ಡೆ ಗುಡ್ಡೆ ಜನಳ ಕಂಡ
 ಎಂಜಿ ಚಾಡ್‌ನಲ್ಲಿ ಕಾಕೆ ನಾಯಳೆನ್ನಕೆ!

ಅಡಕೆ ಪಾಳೆ ನೇತಿಯಂಡ್
 ಅಡಿಯ ನುಗ್ಗಿ ಮೇಲೆ ಕವುಂಜಿ
 ತೇಡಿ ಅಡ್‌ಕಿ ನಲ್ಲ ಕೊರೆನ ಮೂಲೆಕೋಡುವ!

ಎಂಜಿಕ್ಕೆಲೆ ಚಮಚ ಪುಡ್‌ಚಿ
 ಗಂಜಿನೆಲ್ಲ ಅಳ್‌ಕಿ ಮರ್‌ಚಿ
 ಪಾದಿ ಚೆಲ್ಲಿ ಪಾದಿ ಚಾಡಿ ಖಾಲಿ ಮಾಡ್‌ಚಿ!

ತುಮ್‌ಕ್ ಕಮ್ಮಿ ಆನಪಿಂಞ
ಅಡಿಕೆ ಪಾಳೆ ಪುಡ್‌ಚಂಡಜ್ಜ
ಸಾಲೆ ಬೆಚ್ಚ ಗಂಜಿನೆಲ್ಲ ನೆಬ್ಬಿನೋಟ್‌ಚಿ!

ಗಂಜಿನೆಲ್ಲ ಅಳೊಕಿ ನೋಟಿ
ತಟ್ಟಿನೆಲ್ಲ ತವುಡಿ ನೋಟಿ
ತೋಲ್ ಮೂಳೆ ಕೂಡ ಇಲ್ಲೆ ಪಲಾವ್ ತಟ್ಟೆಲ್!

ತಣ್‌ಂಜಕೂಳ್ ಪಾರಕಣ್ಣೆ
ಮೇಕಿತುಂಡ್ ಪಯಿಪ್ ನೀಕಿ
ಮೋರ್‌ಕುಡ್‌ಚಿ ನಿಂದಿತಿಂಜತೆಂಗಡಜ್ಜ !

ಕಳ್ಳ ಕುಡಿಯನೊಬ್ಬ ಬಂದ್
ಜಲ್ಲ ಬಾಯಿಲೊಕ್ಕಿಯಂಡ್
ಕತ್ತತೆಂಜಿ ಕೈನ ಬೆಚ್ಚತಜ್ಜಂಡೆದೆಕ್!

ತಿತ್ತ್‌ಚೆಡಿ ಬಂದಿತಜ್ಜ
ಅತ್ತ್‌ಇತ್ತ್ ನೋಟಿರೊಂಜಿ
ಬುಟ್ಟಿತೊಂದ್ ದುಂಡ್‌ಕವಂಡ ತೆರ್‌ಚಿ ಬುದ್ಧತ್ !

ಬಾರ್ ಬುಫೆರ ಕೋಲ ಕಂಡ್
ತಾರಮಾರ ರೇಗಿಯಂಡ್
ಪೊರಟತಜ್ಜ ಪಣಕಾರಡ್ಪನ ಬಜ್ಜಂಡ್ !

* * * *



ಬರಪೊಳೆ ಬರ ಪಾಡ್‌ಚಿ

ಬುಟ್ಟಿಂಗಾಲ ದಾಟಿ ಶೆಟ್ಟಿಗೇರಿಕಾಲೆ
 ಮೊಟ್ಟೆ ಪತ್ತಿನಾಲ್ ಮೊಟ್ಟೆಡ್‌ತ
 ಕುಟ್ಟಂದಿ ಕುಂದ್‌ರ ಉಟ್ಟಲ್ ನಿಂದಿತ್
 ನೆಟ್ಟ ನೇತಿ ಸುತ್ತ ನಾ ನೋಟ್‌ನ!

ಜರಿಬರೆ ಜಾರಿತ್ ಪಾರಲ್ ಪರಂದಿತ್
 ಬರ ಬರ ಒಕ್ಕುವ ಬರಪೊಳೆಯೊ
 ನರಿ ಬೀಜಿ ನಡಂದಂಡ್ ನೆಳಿಂಜಂಡ್ ಪೋಪೋರ್
 ಸಿರಿಕನ್ನಿ ಪೋಲತ ಪಾ ಪೊಳೆಯೊ

ಕಲ್ಲ್‌ಂಜಿ ಕಲ್ಲ್‌ಕ್ ತುಳ್ಳಿಕಳಿಪಕ
 ನಲ್ಲೋರ್ ರಾಗತ್ ಪಾಡ್‌ಚದ್
 ಪಾಟ್‌ನ ಕೇಪಕ್ ಪಾರೆಂಜಿ ಪಾರೆಕ್
 ಜಾಪ್‌ಂಗಾಲ್‌ಟ್ಟಿಂಡ್ ಜೂಂಗಿ ನಿಂದ !

ರಾಗ ರಸಕೂಟಿ ಬೇರ ಬೆರಕಿತ್
 ಪಾಡ್‌ಪಟ್ಟಾನೆಲ್ಲ ಪಾಡ್‌ಚದ್
 ತಾಮನೆ ಕೊಡಗ್‌ಲ್ ತಾಕಂಡ ಗೋಳ್‌ನ
 ತಾಳಕೊಟ್ಟಿ ಪೊಳೆ ಪಾಡ್‌ಚದ್.

"ಕಳ್ಳ ಕಾಕ ಬಂದ್ ಕಾಡ್‌ಮರ ಕೆತ್ತಿ
 ಸೂರೆ ಪೊಜ್ಜಿ ಪೋಪ ಕಾಂಬುಲಿಯಾ?
 ಮಳೆ ಬೊಳಿಯಿಲ್ಲತೆ ಪೊಳೆನೀರ್ ಬತ್ತ್‌ಚಿ
 ಮುಳ್ಳೊಬಾಳ್‌ಕಾಚಿ ಕುಂಞಿಯಕ್

ಕುಂದಾಕೊಡಿಲೆಲ್ಲ ಕಾಡ್‌ಬರಿಲೆಲ್ಲ
 ಕೇರಳ ಕಳ್ಳಂಗ ದುಂಬಿ ಪೋಚಿ
 ವಾಟೆ-ತೂರೆ-ಮರ-ಕುಳವಾವು ಅಟ್ಟೆಯು
 ಕೆತ್ತಿಸೂರೆ ಇಟ್ತ್ ಕೆಟ್ಟಿಪೋಚಿ.

ಪುಂಡ-ಪುಳೊಂಗಡ್-ಆನೆಕೊಂಬ್ ಕೂಡಿ
 ಪುಂಡಂಗ ಕಟ್ಟಿತ್ ಕೊಂಡ್ ಪೋಚಿ
 ಎಂಜಿ ಕಲಂದೋರ್ ಚಾಕರಿಕಾರಡೊ
 ಬಂಡ ಕೊಡವಡೊ ಇಂಬ್‌ಲುಂಡ್

ಅತ್ತಕಾರ ಮಕ್ಕ ಬೊತ್ತಿ ಬೊರಪಲ
 ಅತ್ತಕಡ್‌ಚ್ಚಳ ಕಪ್ಪದುಂಡ್
 ಅತ್ತಳ ತೇಡಿತ್ ಕಾಡ್‌ಕ್ ಪೋನಕ
 ಕೆತ್ತಿಕೊಂಡ್ ಚಾಡಿ ಪೋಪದುಂಡ್.

ಇಚ್ಚಕಾಂಡ ಕೂಟ್ ಇಕ್ಕೋರ್ ಸಂಗಟ
 ಕಟ್ಟೆ ಕೆಟ್ಟಿನನ್ನ ಕೆಟ್ಟಿಡುವ
 ನಾಡ್‌ನ ಮುಳಾಕಿತ್ ಕೊಡಗ್‌ರ ಮಕ್ಕಳ
 ಊರೂರಲೆವಕ್ ಮಾಡಿರುವ.

ಕೊಡಗ್‌ರ ಕುಂಞಿಯ ಕೊದಿಯಾನ ಮಕ್ಕಳ
 ಮಡ್‌ಲೆಡ್‌ತ್ ನಾನ್ ಚಾಕಿ ಬಂದ
 ಬಡುವಡ ಸೀಮೆರ ಬರಗಾಲ ನೀಕ್ಕಕ್
 ನಡುಕೇರ್‌ಲ್‌ಟ್ಟಿತ್ ಬಲಿಪ ನೋಟಿ

ಕೊಡವಳ ತಳಾತಿತ್, ಕೊಡಗ್‌ನ ಮುಳಾಕಿತ್
 ಬಡುವಡ ಬಡತನ ನೀಕುವಲೊ
 ಆಡಾಡ ಕುಂಞಿನ ಕಣತರೆ ತಾತಿತ್
 ಆಳ ನೋಟತವು ಬಾಳುವಲೊ

ನಾಡ್‌ರ ಮಕ್ಕಳೆ ಓಡೋಡಿ ಬಂದಿತ್
 ಒಂದ್‌ಗೂಡಿ ನಿಂಗ ಹೋರಾಡಂಡು
 ಶಾಸಕ ಬಂಬಂಗ, ಪೇಪರ್‌ಕಾರಳೂ
 ಕೂಟ್‌ಕೂಡಿತಿಕ್ಕ ವರಕೊಪ್ಪಂಡು

ಕೊಡಗ್‌ನ ಮುಳ್‌ಕಿತ್ ಕೊಡವಾಮೆನಡಕಿತ್
 ನೆಲೆಗೆಡ್‌ತಿ, ಕುಲಗೆಡ್‌ತಿ ಪಾಳಾಕುಲ
 ಎಚ್ಚರಗೊಂಡಿತ್ ಎದೆಮಲಂಗಿ ನಿಂದಿತ್
 ತೆಡ್‌ಪೋಲೆ ಪೊಲಿಜಾರ ಕಾಟಬಾರಿ" ||

ಎಂದೆನ್ನೆ ತಾಪೊಳೆ ಊಜಾರ ಬುಟ್ಟಂಡ್
 ನೆರೆದುಂಬಿ ನೆರಿಬಿರಿಂಜಿ ಒಕ್ಕಿಪೋಚಿ
 ಪಕ್ಕತ ಮರತ್‌ಲ್ ಗೂಮಂಡ ಕುಂಞಿಯ
 ಉಕ್, ಉಕ್‌ಂದೆನ್ನೆತ್ ಶನಿಪಾಡ್‌ಚಿ!

* * * *



ಅಜ್ಜಂಡ ಪಳಮೆ

ಕೊಡುಮಾಲೆ ಪೊಮ್ಮಾಲೆ ಕೊಡಗ್ಗರ ನಡುಕಾಲೆ
 ನಡು ಬಟ್ಟೆ ತೇಂಜಾಲೆ ನಡಂದೇನೊ
 ಎಡಮ್ಮಾರ್ ಪೋಕ್ಲಲ್ ತೆಡ್ ಪೊಜ್ಜಿ ಮಳೆಬುದ್ದ
 ಪಡ್‌ಮರ್‌ಚಿ ಉಪ್ಪಾನ ಕಂಡೇನೋ

ನಡುತೇಂವ ಆಕತ್ ನಡು ಬಗ್ಗಿ ಉಪ್ಪೋರ್
 ಎಡೆಬಯತ್ ಕೊಡವನ ನೋಟ್‌ನ
 ಎದೆ ಚುಗ್ಗಿ ಪೋಯಿತ್ ತೊಡೆಬತ್ತಿ ಒಣಂಗಿತ್
 ಒಡ ಬತ್ತಿತ್ತೇತ್ ಬೆನ್ನೋಕ್

ಚುಡ್ ಬೆದ್‌ರ ಕಾಚತ್ ಬಡತನತ್ ಬಾಳಲ್
 ತಡಿಯೆಲ್ಲ ತಳಂದೀತ್ ತಾಂಗರಿಯತೆ
 ಎದ್‌ಪಾಂಜ ನನ್ನೊಮ್ಮ ಕೈತಟ್ಟಿ ಕಾಕಿತ್
 ತಡತ್‌ಟ್ ಕೇಟತ್ "ದಾಡಪ್ಪಾ"ಂದ್?

ಕುತ್ತಿ ಅಳತಿತ್ ಕುತ್ತಿ ಬೀಡಿ ತೇಡಿ
 ತಕ್ಕ್‌ಕ್‌ಳಂಜತ್ ಒಪ್ಪಾರತ್
 ತಕ್ಕಾಮೆನ್ನೋಚಿ ಒಕ್ಕಾಮೆ ಪರಂದತ್
 ಒಕ್ಕಿಪೋನೊಕ್ಕಳ ಪಳಂದತ್

"ನಯಿಪವು ಮನೆಲಿಲ್ಲೆ ಅಯಿಪಣಿಕಾಳಿಲ್ಲೆ
 ಪಯಿಪ ಕೆಲಕ್ ಕೂಳ್ ತಪ್ಪವಿಲ್ಲೆ
 ಉಯಿ ಏಡ ಮೋಂವಂಗ ಚಾಕರಿ ತೇಡುವ
 ಆಯಿರಾಯಿರ ಕಳಂದ್ ತಳಂದ್ ಬಾತ್ !

ಕಾಲ ಅಂಜಾಯಿತು ಕಾಸೊಂದು ನೇಡತೆ
 ಸಾಲ ಮಾಡಿ ಪೇಟೆ ಸುತ್ತುವಲ
 ನಾಲ್ ಮೂಡಿ ಮಕ್ಕ ಚಾಯಿ ಪಾಳಾಪಾಂದ್
 ಬೇಲ್‌ಕ್‌ಳಿಯುಲೆ ಕಳಕೂಯಿಲ್ಲೆ !

ಮೇಕ್ ಮನೆ ಮಕ್ಕ ಚಾಕ್‌ರಿ ಬೋಟೆಕ್
 ತೋಕ್ ಚೇಲೆ ಮಾರಿ ಪೋಚಿ ಅಲ್ಲಾ
 ಶೋಕಿಕ್‌ಳ್‌ಂಜೋರ್ ಆಕರೆ ಮೂಡಿಯ
 ಚಾಕ್‌ನ ಜೋಡೆತ್ತ್ ಮಾರ್‌ಚಿಲ !

ಅರಮನೆ ಒಕ್ಕಳೊ ಕೆರೆಬರಿ ಕೋವೆಲ್ಲ
 ಮಲಬಾರ್‌ಕಾರಕ್ ಮಾರೀತಿಂದ್
 ಪೇಟೆ ಪೋಕ್‌ರಿ ಬಾಳ್ ಕೋಟೆ ಚಾಕ್‌ರಿ ಕೂಳ್
 ಕಾಟಿಕ್ಕಳ್ಳರ ಬೋಟೆಲಾಚಿನೋಟ್ !

ಬೋಡಿ ಬಂದಳತವು ಕಾಡ್‌ಮರ ಮಾರಿ
 ಜೋಡ್‌ಕಾರ್ ಬೆಚ್ಚಂಡೋಡುವಲಾ
 ನಾಡ್‌ಕೊರುಕಾರ ನಾಡೋಡಿ ಚೆಟ್ಟಾರ್
 ಕೊಡವಳೊ ಕೊರು ಚುಟ್ಟಂಡಳಪಕಾಚಿ !

ಮರಕಾಡ್ ಬರಡಾಚಿ ಮಳೆ ಬೊಳೆ ಪಾಳಾಚಿ
 ಕೊಡವಡ ಕೊಡವಾಮೆ ಕುಂಡುಕ್ಕಾಚಿ
 ಜಮ್ಮಕುಳಕಾರ ಜಮ್ಮಕಳಂದಂಡ್
 ಎಂ.ಎಂ.ಚೆ. ಕಾರಂಡ ಕೂಲಿಕಾಚಿ !


ಮಣ್ಣಾನ ಮಾರಿತ್ ಎಣ್ಣತೆ ಪೋನವು
 ಬಣ್ಣೆ ಕೈಯಾಯಿತ್ ಬಂದಿತಿಂದ್
 ಚೆಟ್ಟಾರ್ ತೋಟತ್ ಚಾಕ್‌ರಿ ತೇಡುವ
 ಕೂಟ್ಯಾಲ್ ಕುಟ್ಟಿರ ಕೂಟಾಳಾಚಿ !

ಜಮ್ಮ ಜಾಗ ಮನೆ ಮಾರತ್ತೆ ಮೋನೆ
 ಅಮ್ಮೆ ಕಾವೇರಿರ ಸೊತ್ತಾನೋಟ್
 ನಯಿಚಂವ ನಂದಾಪ ನಾಡಾರ ಪೆದ ಬಪ್ಪ
 ಕೊಡವಡ ಕೊರು ನಿನ್ನ ತೇಡಿ ಬಪ್ಪ"

ಎಂದೆಣ್ಣೆತೆದ್ದಜ್ಜ ಕುಂಡ್ ಬೇಲ್‌ರೊಳ್
 ಮಂಡೆ ಕುಂಬ್‌ಟ್ಟಿಂಡ್ ಸಾಲಾಟ್ ಚಿ
 ಅಜ್ಜಂಡ ಪಳಮೆಲ್ ಕಂಡೆನಾ ಕಡುಸತ್ಯ
 ಪಣಿ ಕೆಜ್ಜಿ ಮಳೆ ಪೊಜ್ಜಿ ಪಾಳಾಪಾಲೆ

ಮನೆಮಾರ್ ಮಾರಿತ್ ಮನೆಬುಟ್ಟ್ ಪೋನವು
 ನೆಲೆಗೆಟ್ಟ್ ಕುಲಗೆಟ್ಟ್ ತಿರಾಗಿಬಕ್ಕು
 ಕೊಡವಾಮೆ ಬುಟ್ಟಿಂವ ಕಡೆಗಾಲಕಾಪಕ
 ಅಡಿಕೊಡಿ ಕಾಣತ್ತೆ ಕುಡ್‌ಂಗಿ ಪೋಕು

* * * *



ನಾನ್ ದಾರ್...?

1

ಜಾತಿಕಾರಡ ಪೈಕಿ ನಾ ಬಲ್ಯ ಆಳ್
ಪೋತಿ ಚಾಕುವ ತಂದ್ ನಾಕೆರ್ಚಿ ಕೂಳ್
ಗೀತಯಿಲ್ಲತ ಬಲ್ಯವಂಡ ನಾಮನೆರ ಆಳ್
ಕಾತಳಕ್ಕಂಡು ನಾಕ್ ಜೈಲಾಲೇ ಬಾಳ್!

ಜೀಪ್ ಕಾರ್ಲ ಸುತ್ತುವಕ್ ನಾಕುಂಡ್ ಯೋಗ
ಕೋಳ್ ಜಾತಿರ ಕೂಡ ನಾ ಕಳಿಪಕೆ ಆಗ
ಪೋತಿ ಚಾಕಿತು ನಾಕ್ ತಪ್ಪುಲೆ ಕೆಲತ್ ರೋಗ
ನಾಕಿಲ್ಲೆ ಕೋಳ್ ಜಾತಿಕಾರಡ ಸ್ವಾತಂತ್ರ್ಯ ಭೋಗ !

2

ಹೇಟುಂಡ್ ಬೂಟುಂಡ್ ಲಾಟಿ ಕೈಲುಂಡ್
ಕೋಟೆ ಪೇಟೆಲ್ ನಾಕ್ ಡ್ಯೂಟಿ ಬೀಟುಂಡ್
ಗೇಟ್ ಕಾತಂದ್ ದುಂಬತಿರ ಜೋಬ್ ದಂಡ್
ನೋಟಿ ಬೊತ್ತತವು ದಾರ್ ಈ ಮೀಸೆ ಕಂಡ್!

ಊಣ್ ವರಕಿಲ್ಲತಳಕಂಡು ಮಂತ್ರಿ ಬಪ್ಪಂದ್
ಕಾಣತಾನಯಿನ ನಾನ್ ತೇಡಿ ಪುಡಿ ಕಂಡು
ಬೋಣಿ ಮಾಡತವಂಡ ಮೂಳೆ ಚವುಟಿ ಪೊಳಿಕಂಡು
ಜಾಣತನತ್ಲೆ ನಾಡ ವ್ಯವಹಾರ ಆಂಡು!

3

ಸರಕಾರ ಚಾಕ್‌ನ ನಾನೋರ್ ಆನೆ
 ಜನಮುಗ್ಗಿ ನಿಂದಲ್ಲಿ ಕಾರಿಯಂಡ್ ಪೋನೆ.
 ನಾಡ ಕೆಲಕೋಡಿ ಬಂದ್ ಮುಗ್ಗತಿರ ನೀನೆ
 ಪೋನ ಪೇಟೆಲೆಲ್ಲ ನಾಕುಂಡ್ ಐನ್ ಮನೆ!

ನನ್ನ ನೋಟುವಕ್ ಮಾವುತಂಗ ದಂಡ್
 ನಾ ನೇಡ್‌ನಾಲ್ ಮಾವುತಂಗ ಪಾದಿತಿಂದ್
 ಮನೆ ಮಾರ್ ಮಾಡುವ ಕಾಲಕೀರಂಡ್
 ಕಂಡಿತೂ ಕೇಕತಂತ ಸರಕಾರವುಂಡ್!

* * * *

4

ಪಯ್ಯುಪಂದಿ ಚಾಕುವಕ್ ನಾಡ ವರವುಂಡ್
 ಪಾರಪಪ್ಪಡ ಮಾಡುವೇಂಗಿ ದಳ್ಳಾಳಿನ ಕಂಡ್
 ಎಳ್‌ದಿ ಕೊಡಿ ಪೆದ ಮಾತಿ ಅರ್ಜಿ ಈರಂಡ್
 ಎಡ್‌ತೋಳಿ ಪತ್ತಾಯಿರ ಜನ ಆಡ್ ನಂದ್!

ದೇವ ತರತಾನ ನಾ ಕಾಕಿ ತಪ್ಪಿ
 ಜನಕೂಡಿ ಕಾಕ್‌ನಕ ಮೇಳಕ್ ಬಪ್ಪಿ
 ನಾನ್ ವರ ತಂದಂದ್ ನಿಂಗಕ್ ಬ್ರಾಂಡಿ ಕುಪ್ಪಿ
 ಬ್ಯಾಂಕ್‌ಕಾರಕ್ ಮಾತ್ರ ಇಟ್ಟೋಳಿ ತೊಪ್ಪಿ!

* * * *

5

ಅಡಿ ತೊಟ್ಟು ಕೊಡಿ ಮುಟ್ಟಿ ಕಾಕಿ ನಾಕಾಂಡು
 ತೂರ ತಂಡೆಕ್ಕೋಲು ಕೈಲೇ ಬೋಂಡು
 ಬಲ್ಲೋರ್ ಮೀಸೆ ನಾಕಿಂಜಿತೇ ಆಂಡು
 ಪುಂಡ್ ಪುಕಾರಾನಲ್ಲಿ ನಾ ಓಡಿ ಪೋಂಡು!

ಊರ್ನಾಡ್‌ಕ್ ಪೋನಕ್ಕ ನಾಕೋರ್ ಬಾಳ
 ಕಾಕಿ ಕಾಕಿತ್ ತಕ್ಕು ಕಳ್ಳಕರಿ ಕೂಳ
 ಕೊಲ್ ಕೊಲೆ ಆನಂದ್ ನಾಕೋರ್ ಗೋಳ
 ಕಲಕಿಲ್ಲತಳಕಂಡು ಊರಲ್ ಪೋಲ್!

5. ಪೋಲೋಷ್ಕಾರ
 4. ಜನಾರ್ಥನ ಪೂಜಾರಿ
 3. ಗವರ್ನುಂಟ್ ಬಸ್
 2. ಪೋಲೋಷ್ಕಾರ
 1. ಆರ್‌ಶೇಷನ್ ನಾಯಿ
 ಊತೆರ :

* * * *



ನೆಲೆ ತೇಡಿ ಬಂದ

ನೆರೆ ರಾಜ್ಯತ್‌ಲ್ ಪುಟ್ಟಿ ನೆಲೆತೇಡಿ ಬಂದೇಡ
ಬಾಳ್ ಬದ್‌ಕ್‌ಡ ಕತೆನ ಕೇಳಿ ಜನಳೆ

ಬಾವ ಕಯ್ಯತೆ ಅಲ್ಲಿ ಚಾವಕಾಯಿತ್ ಎಂಗ
ಬಾವ ಬಟ್ಟೆನ ತೇಡಿ ಬಾತಿಲ್ಲಿಕ್.

ದಂಡ್ ಕಾಲಕ್ ಬಯ್ಯ ದಂಡಾಳ್ ಬಂಬಂಗ
ಮುಂಡ್ ತೆಕ್ಕಿ ಕಟ್ಟಿ ಮಂಡೆ ಕೀಚಿ.

ವರಕೂಣ್ ಇಲ್ಲತೆ ಮರಕಳಂಜಿ ತಿಂದಂಡ್
ಪಣಿ ತೇಡಿ ಪೊರಟೆಂಗ ಪಾಪಿಯಳೊ

ಮಾಕೂಟ ಬರಿಕಾಲೆ ಮರಕಾಡ್ ನೋಟಿಯಂಡ್
ಮರೆನಾಡ್ ಮರ್‌ಂಚೆಂಗ ಶೂರಂಗಳೊ

ಕಾವೇರಿ ತಾಯಿರ ಪೊಮ್ಮಾಲೆ ಕೊಡಗ್‌ಕ್
ಕಾಲ್‌ಟ್ಟಿ ಗಳಿಗೇಲ್ ಕೂಳಾಚಿಲ.

ಕಂಜಿ ಕೂಳುಂಡಂಡ್ ಇಂಜಿರ ಕಳೆ ಬಲ್‌ಚಿ
ಅಂಜಿ ತಿಂಗತ್ ನೇಡ್‌ಚಂಜಾಯಿರ

ಕೆಯ್ಯಂಗಳ್ಳಂದ್ ಕೇಳಿ ಏಡ್‌ತ ಕೊಡವನ ತೇಡಿ
ಅಂಜಿ ಏಕರೆ ಬೇಲ್ ಇಂಜಿಕೆಡ್‌ತ್

ಇಂಜಿ ಪಣಿಕಾರಳ ಆಂಜಿ ಕೂಟಿಯ ಬಂದ್
ದೇವಕಾಡ್‌ನ ನೀಕಿ ನೆಲೆ ಮಾಡಿತ್

ನಯಿಚಿ ನೇಡ್‌ಚಿ ಎಂಗ ಆಯಿರಾಯಿರ ಗಂಟ್
ತಾಂಗಿ ಅಳತತ್ ಇಲ್ಲಿ ಗುಡಿಸಲಾಟ್ತ್.

ಬಾತ್ ಓಟ್‌ರ ಕಾಲ ತಾತ್ ಕಾಕಿತ್ ಸಾಲ
ಮನೆ ಕಳಂದ್ ತಾತ್ ಅದ ಊರ್ ಗೋಮಾಳ.

ಇರ್ ಪೊಲಣೆ ನೇಂದತದ ಇರ್‌ನೂರ್ ಓಲಿಮನೆ
ತೊರಂದತೆಂಗಡ ಓಟ್ ಬ್ಯಾಂಕ್‌ನಲ್ಲಿ

ಗೋಮಾಳತ್‌ನೊ ಬಾಟಿ ದೇವ ಕಾಡ್‌ನೊ ಕೂಟಿ
ಕೇಟತಲ್ಲಿಕ್ ಓರ್ ಪಂಚಾಯ್ತ್ ಸೀಟ್.

ಕೇಟಿ ವರ ತಾತ್ ಅದ ಜಾತಿ ನೋಟಿತ್ ಸೀಟ್
ತಿರಾಚಿ ಬೆಚ್ಚದ್ ಅದ್‌ಂಗ್ ನಾ ಕ್ಯಾಂಡಿಡೇಟ್ !

ಗೆದ್ ಬಂದ್‌ಟ ನಾನ್ ಸದ್ ಅಡಕಿತ್ ಜನಡ
ಮುಕ್ತಿ ಪಟ್ಟಿತ್‌ಲಳಿತ ಪಂಚಾಯ್ತಿರ !

ತಕ್ಯ ಅರಿಯತ ನಾಕ್ ತಕ್ಕೋರ್ ಜನ ತಾತ್
ಒತ್ತ ಕೊಡವನೆ ನಾಡ ಕಾರ್ಯದರ್ಶಿ!

ಪಾರಿ ಕಳಿಪದ ಕೊಡವ ವರಕ್ ನೆಟ್ಟಿತ್ ಇಕ್ಕ
ಕಾಕ, "ಚೇಟ"ಂದ್ ಕಾಕಿ ಕೂಟ್‌ಚೆಕ್ಕ!

ಬಾರ್ ಕಾರ್‌ನ ಮರಂದ್ ಕಾರ್‌ಬಾರ್‌ನ ಮಾಡಿ
ಬೇರ್ ತಾಂಗಿತ್ ಅಳಿರಿ ಊರ್‌ರೊಳ್‌ಲ್!

* * * *

ಮಂತ್ರಿ ಬಕ್ಕು!

ನಾಡ್ ಜನಳ ಕಾಕಿ ಕೂಟಿ
ಕಷ್ಟನಷ್ಟ ಅರಾಂಜಿ ನೋಟಿ
ಕಷ್ಟ ನೀಕಿ ಪೋಪಕುಳ್ಳ,
ಮಂತ್ರಿ ಬಕ್ಕು!

ಗಾಂಧಿ ತೊಪ್ಪು ಬಾದಿ ಮುಂಡ್
ಉದ್ದ ಜುಬ್ಬ ದೊಳ್ಳೊ ಪೊಟ್ಟೆ
ಶಾಲೆ ನಿಪ್ಪಾಕ್‌ಟ್‌ಬಂದ್
ತೆಳ್ಳಚಿ ನಿಕ್ಕು!

ದಂಡ್‌ಕಯ್ಯು ಕೂಟಿತೊತ್ತ್
ಭಾಗ್ಯ ಕೋಂದ್ ಬಾಂಗಿ ನಿಕ್ಕು
ಜನಡ ಸೇವೆ ಮಾಡುವೋರ್
ಮಂತ್ರಿ ಬಕ್ಕು!

ಮಂತ್ರಿ ಬಪ್ಪ ಸುದ್ದಿಯೆಂಗ
ಡೂರ್‌ಲೆಲ್ಲ ಪಬ್ಬಿತಿಕ್ಕು
ಮಾಲೆ ಪೂವ್ ತೋರಣವೊ
ಕೆಟ್ಟಿತಿಕ್ಕು!

ಸಾಲ್ ಸಾಲ್ ಕಾರ್ ಜೀಪ್
ಮಾಲೆ ಪುಡ್‌ಚಿ ನಿಂದ ಜನ
ದೇವ ಧೂತ ಬಂದ ಪೋಲೆ
ಮಂತ್ರಿ ಬಕ್ಕು!

"ಕುಂಯೋಂ" ದೆಣ್ಣೆ ಕೂತ್ ಕೊಡ್‌ತ್
ಅತ್ತ್ ಇತ್ತ್ ಸುತ್ತಿಕಳಿಪ
ಪೋಲಿಸಡ ಜೀಪ್ ಒಂದ್
ಮಿಂಗಳಿಕ್ಕು!

ಮಂಡೆಕೋರ್ ಕುಡ್‌ಕೆ ಕಂವುಂಚಿ
ತಂಡ್‌ಕೈಲ್ ಓಂಗಿಯಂಡ್
ದಂಡ್ ವ್ಯಾನ್ ದುಂಬ ಬೋರೆ
ಪಡೆಯು ಇಕ್ಕು!

ಅಂಗಯಿಲ್ ಚೆಂಬ್ ಪುಡ್‌ಚಿ
ಮಾಂಗೆ ತೊಪ್ಪ್ ಪೂವ್ ಬೆಚ್ಚಿ
ಕುಂಭ ಕಳಶ ಪುಡ್‌ಚಿ ಮೂಡಿ-
ಮಕ್ಕ ನಿಕ್ಕು.

ಪೂವ್ ಮಾಲೆ ಚಾಂದ್ ಮಾಲೆ
ಯಾಲ ಮಾಲೆ ಪುಡ್‌ಚಿ ನಿಂದ
ಹೊಗಳ್ ಭಟ್ಟ ಜನಡ ನಾಲ್
ಸಾಲ್-ಇಕ್ಕು!

ಪಾರ್ತಿ ಗುರ್ತ್ ಎದೆಲ್ ಬೆಚ್ಚಿ
ಓಟ್‌ಕಾರ ನಂಗಂದೆಣ್ಣೆ
ಪೇಟೆ ಪೋಲಿ ಕುಟ್ಟಿಯಳೆ
ಮಿಂಞಾಲಿಕ್ಕು!

ಮಾನಕಂಜಿ ಮಡಿಪಯಿಂಗ
ದಾನ ಕೊಡ್‌ತ್ ಚೋತಯಿಂಗ
ಎ.ಸಿ.ಡಿ.ಸಿ. ರನ್ನತವು
ಬಯ್ಯಲಾಕು!

ಪತ್ತ್‌ಗಂಟೆ ಕಯಿಂಜಿತಾಚಿ
ಪನ್ನೆರಂಡ್ ದಾಟಿ ಪೋಚಿ
ನಿಂದ್ ಚೋತ್ ಜನಡ ಮೂಡ್
ಬಾಡಿ ಪೋಚಿ!

ಪತ್ತ್ ಮಿನಿಟ್‌ರೊಳ್‌ ಮಂತ್ರಿ
ಬಪ್ಪಂದೆಣ್ಣೆ ಸಾರಿಯಂಡ್
ಪತ್ತ್‌ಕುರಿ ಮೈಕ್ ಪುಡ್‌ಚಿ
ಸಾರಿತೆಣ್ಣು!

ಕಾತ್ ನಿಂದ್ ಚೋತ ಜನ
ಬಾಟ್‌ದುಂಡ್ ಮಾಡಿಯಂಡ್
ಜಾಗ ಕಾಲಿ ಮಾಡಿಯಂಡ್
ಬಟ್ಟೆ ಕೂಡು!

ನೇರಲ್ಲತ ನೇರತ್‌ಲ್
ಸಾಲ್ ಸಾಲ್ ಕಾರ್ ಬಕ್ಕು
ಕಾರ್‌ರೊಳ್‌ಲ್ ಚೇಲಂಗಳೆ
ದುಂಬಿ ತಿಕ್ಕು!

ನೇರ ತಪ್ಪಿ ಪೋಚಿಂದೆಣ್ಣೆ
ಮಂತ್ರಿ ಕಯ್ ತೊತ್ ನಿಂದ್
ಮಾಜನಳ ಮಾಸಭೆಲ್
ಮಾಪ್ ಕೇಕು!

ನೀರ್ ಕಟ್ಟೆ ಮೀನ್‌ಕೆರೆ
ತಾರ್ ರೋಡ್ ಊರ್‌ಲೆಲ್ಲ
ಮಾಡಿತ್ತಪ್ಪಿಂದೆಣ್ಣೆ ಮಂತ್ರಿ
ಭಾಷೆ ತಕ್ಕು!

ಊರ್‌ಕೋರ್ ಆಸ್‌ಪತ್ರೆ
ಮಾರ್‌ಕೋರ್ ಬೋರ್‌ವೆಲ್ಲ
ಆಳ್‌ಕೋರ್ ಕರ್‌ಪ ಪಯ್ಯು
ತಪ್ಪಿಂದೆಣ್ಣು!

ಕಾರಖಾನೆ ಕೆಟ್ಟುವಕ್
ಮೂಲೆ ಕಲ್ಲ ನಟ್ಪೋಕು
ಕಾಲೇಜ್‌ಕ್ ಜಾಗನೋಟಿಂ-
ದೆಣ್ಣೆ ಪೋಕು.

ಮಂತ್ರಿ ಆಸ್ತಿನೇಡಿತಿಲ್ಲೆ
ಬ್ಯಾಂಕ್ ಲೆಕ್ಕತಾಂಗ್ ಇಲ್ಲೆ
ಜನಡ ಸೇವೆ ಮಾಡಿಯಂಡೆ
ಬಾಳ್ ಕಯಿಚೆ!

ಪೊಣ್ಣಾರಕ್ಕ ತಂಗೆಯಕ್ಕು
ಅಯಿಂಡ ಕುಂಞಿಕುಟ್ಟಿಯಕ್ಕು
ಆಳ್ಕಂಜಿ ಬಂಗಲೆನ
ಕೆಟ್ಟಿ ಬೆಚ್ಚ !

ಸಾಲ್ ಸಂತಾನತ್‌ಡ ಪೆದತ್
ಮೂಲೆ ಸೈಟ್ ಪೇಟೆಲ್‌ಡಿಯ
ಕಾಫಿ ತೋಟ ಕಾರಖಾನೆ
ಲೋಕತ್‌ಡಿಯ !

ಸ್ವಿಸ್ ಬ್ಯಾಂಕ್‌ಲೋರ್ ಲೆಕ್ಕ
ತೊರಂದ್ ಮಿಲಿಯ ಡಾಲರ್‌ನ
ದಾಡೊಪೆದತ್ ಗುಟ್ಟಲೆಕ್ಕ
ಬೆಚ್ಚಿತಿಕ್ಕು !

ಭಾಗ್ಯದೇವ ಬಂದಿತಿಂದ್
ಬಾವಬಟ್ಟೆ ತಾತ್‌ಂದೆಣ್ಣೆ
ಆಡಿಪಾಡಿ ಜನಳು ಪಿಂಞ
ಪಿಂಗಿಪೋಕು !
ಜನಡ ಕಷ್ಟ ನೀಕುವಂತ ಮಂತ್ರಿ ಬಕ್ಕು !

* * * *



ಚುಟುಕೆ - ಚೂರ್

ಎಚ್ಚರ

ಅಳಾತ್ ನೀ ಪನೆರಡಿಲ್
 ಕುಡ್ಚಕಲೂ ಮೋರ್
 ಕಳ್ಳ ಕುಡಿಚತ್ಂದೆಣ್ಣೆ
 ಪೆದ ಬಕ್ಕು ನೇರ್
 ಅರೆಗಂಟೆ ಪೋಲಿಯಡ
 ಕೂಡೆ ನೀ ಸುತ್ತ
 ನೂರ್ ಅಪವಾದತ್‌ರ
 ಪೊಗೆಯಾಡು ಸುತ್ತು!

ಆಗ

ತಕ್ಕಾತಕ್ಕಾಕ್ ಚೆಡಿವ
 ಪೊಣ್ಣಾ ಮನೆಕ್ ಆಗ
 ತಕ್ಕಾ ಕೇಕತ ಮಕ್ಕ
 ಒಕ್ಕಕೇ ಆಗ
 ದುಷ್ಟಂಗಡ ನೆರೆಲೆಂದೂ
 ಇಪ್ಪಕಾಗ
 ಕಷ್ಟ ಅರಿಯತ ಬೆಂದು
 ಬಪ್ಪಕೂ ಆಗ!

ಅಂದ್-ಇಂದ್

ಧರ್ಮ ನೀತಿನ ಪರೆವೊ
 ಒಬ್ಬಂಡ ಎದಿಕೆ
 ಆಯಿರಾಳ್ ಅಳಾತಿತ್
 ಕೇಪ ಇಂಜತ್ ಅಂದ್....
 ಆಯಿರಾಳ್ ಅಳಾತಿತ್
 ನೀತಿ, ಎಣ್ಣಾನಕ ಅಲ್ಲಿ
 ಕೇಟಳಪವನುಂಡಾ
 ಒಬ್ಬನಿಂದ್?

ನಿನ್ನ ನೀ ತಿದ್ದ್

ಕಲ್ಲ ಮುಳ್ಳರ ಬಟ್ಟೆ ನೊಡ್ಕಿ
 ನಡಂದವನುಂಡ?
 ಕಾಲ್‌ಕೊಡ್ ಕಾ ಮೊಟ್ಟ್
 ಮಿಂಞಾಕ್‌ಡ್ ಮೊಟ್ಟ್
 ಜನಡ ಡೊಂಕನ ನೀನ್
 ತಿದ್ದುವಕ್ ಪೋಂಡ
 ಮನತ್‌ಲರ್‌ಂಜಿತ್ ತಿದ್ದ್
 ಪಾಳ್ ಬುದ್ಧಿನ ತಾಂಡ

ಚುಟೊಕೆ

ಕಳ್ಳ ಕುಡಿಯನ ಕಾಕಿ
 ತಕ್ಕಾರ ಬೋಂಡ
 ಪಿಲ್ಲ ಮುಂಡತ ಬರಿಲ್
 ತಿತ್ ಆಕಂಡ
 ಮುಳ್ಳ ಬೇಲಿರ ಮೀದ
 ಪೊಡೆಯ ಒಣಕಂಡ
 ಕಲ್ಲಗುಡ್ಡೆಲ್ ಮಾತ್ರ
 ಓಡಿ ಕಳಿಕಂಡ

ಕುಡಿಪಕ್ಣಂಡ ಬಾಕೆ
 ಕೂಡಿ ಬಾವದ್ ಬೋಂಡ
 ಕಡಿಪ ನಾಯಿರ ಕೂಡ
 ಕಳಿಯೇರ ಬೋಂಡ
 ನಾಡ್ ಮುಡಿಯಂಡ ಬರಿಯ
 ನಡಂದ್ ನೀ ಪೋಂಡ
 ಊರ್ ಮುಡಿಯನ ಮನೆಕ್
 ಕಾಕಿ ಪೋತಲ್ ಬೋಂಡ

ಬಳ್ಳ ಪರೆವವಂಡ ಎದೊಕೆ
 ಪಲ್ಲೆಳಿಪಕಾಗ
 ಜಲ್ಲ ಬಾಯಂಡ ಬರಿಲ್
 ಅಳ ತುಂಬಕಾಗ
 ಕಾಲಾಡಿ ಮೂಡಿಯಡ
 ಸಾಲರಿವಕಾಗ
 ಬಾರ್ಲುಂಬವಂಡ ಬಾಕೆ
 ಕೂಡುವಕೆ ಆಗ

* * * *

ಎಲಿಯಡ ಸಭೆ

(ಮಕ್ಕಡ ಕಥೆ ಆಧಾರ)

ಮುಂದ್ ಮನೆರ ಅಟ್ಟತೋರ್
ತೊಂಡ ಪೂಂಞಿ ಕೂಡಿಯಂಡ್
ಕಂಡ ಎಲಿಯಳೆಲ್ಲ ಪುಡ್ಚಿ
ತಿಂದ್ ಕೂಟ್ಚಿ.

ಆವದಿಲ್ಲತಾನ ಎಲಿಯ
ಬಾವ ಬಟ್ಟೆ ತೇಡುವಕ್
ದೇವಳೆಲ್ಲ ತೊತ್ತಿತೋರ್
ಸಭೆನ ಕೂಟ್ಚಿ.

ಸಭೆಲ್ ತಕ್ಕಬಾಕ್ ನಡ್ಂದ್
ತರತರ ಸಲಹೆ ಬಾತ್
ಬಾಲೆಕಾರ ಎಲಿಯೊಂದೆದ್
ಇನ್ನೆಣ್ಣೆಚಿ.

"ಅಜ್ಜ ಕೇಳಿ, ಅಣ್ಣ ಕೇಳಿ
ಮಾಂವ ಮಾಂವಿ ಬಾವ ಕೇಳಿ
ಪೂಂಞಿಕೋರ್ ಗಂಟೆ ಮಣೆನ
ಬೋಳೆಕೆಟ್ಟಿನ"

ಪೂಂಞಿ ಬಪ್ಪ ಸದ್ ಕೇಪ
ಎದ್ ಬುದ್ ಪಾರಿಪೋಯಿ
ಮಾಳಿರೊಳ್ಲ್ ಕೂಡಿತ್ತೆಂಗ
ಒಳ್ಚಿ ಬಾವಲು"

ಸಲಹೆ ಕೇಟ ಎಲಿಯಳೆಲ್ಲ
ನಲ್ಲ ಸಲಹೆಂದೆಣ್ಣೆ ತೊತ್ತ
ತುಳ್ಳಿ ಆಡಿ ಕೈತಟ್ಟಿತ್
ಎಲ್ಲ ಒತ್ತತ್.

ತೊಂಡಿ ಎಲಿಯೊಂದೆದ್ದಾ ನಿಂದಾ
 ಕೇಟತೋರ್ ಪ್ರಶ್ನೆನಲ್ಲಿ
 "ದಾರ್ ಪೋಯಿ ಪೂಂಘಾಕಿಕ್ಕ
 ಗಂಟೆ ಕೆಟ್ಟುವೋ....?"

ಇದಾನ್ ಕೇಟ ಎಲಿಯಳೆಲ್ಲ
 ಮೂಡ್ ಮೂಡ್ ನೋಟಿಯಂಡ್
 ಮಂಡೆ ಕುಂಬ್ ಇಟ್ಟತಲ್ಲಿ
 ದಾರು ಎದ್ದಾಲೆ.

"ನಾನ್ ತೊಂಡ ನಡಾಪಕಯ್ಯ
 ನಾನ್ ಕುಟ್ಟಿ ಪೋಡಿಯಾಪ
 ನಾಡ ಪೋಣ್ಣ ಪೆತ್ತವಾ"ಂದ್
 ನೆವನ ತೇಡ್ಚಿ.

ನಾಕ್ ಕೈಯ್ಯ ನೊಂಬಲಾಂದು
 ನಾಕ್ ಕಣ್ಣ್ ಕಾಂಬಾಲೆಂದು
 ನಾಡ ಮಕ್ಕ ಚಿರಿಯವೊಂದ್
 ಮಂಡೆ ತಾತ್ಚಿ.

ತಕ್ಕ ಬಾಕ್ ನಡಾಂದಂಡಿರಣೆ
 ತೊಂಡ ಪೂಂಘಾ ಪಾರಿ ಬುದ್ದಾ
 ಮೂಪ ಎಲಿನ ಬಾತಿ ಪುಡ್ಚಿ.
 ಕಿನ್ನಿತ್ತ್ಯತ್.

ಬೊತ್ತಿ ಬೊರಂಡಿ ಎಲಿಯಳೆಲ್ಲ
 ಎದ್ದಾಬುದ್ದಾ ಪಾರಿತೋಡಿ
 ಮೂಲೆ ಮುಟ್ಟಾಲೊಳಿಕಣೆಕ್
 ಸಭೆಯು ತಾಂದತ್!

* * * *

ಪ್ರಾರ್ಥನೆ

("ಸ್ವಾಮಿ ದೇವನೆ ಲೋಕೋ ಪಾಲನೆ" ರಾಗ)

ಮೂಲ ಕಾವೇರಮ್ಮ ತಾಯಿನ
ನೇಮತೆಕ್ಕಲು ತೊಕ್ಕನ

ಇಗ್ಗುತಪ್ಪನ ಬಾಂಗಿ ತೊತ್ತಿತ್ ಬಾವ
ಬಟ್ಟಿನ ನೋಟನ ||

ಜನ್ಮ ಭೂಮಿರ ಕೇಳಿ ಕೀರ್ತಿನ ಚಾಕಿ
ಪೊಲತಿತ್ ಬಾವನ

ನಮ್ಮ ನಾಳನ ನಡತಿ ಬಕ್ಕನ ಕಾಡ್
ನಾಡ್‌ನ ಕಾಕನ ||

ಅಮ್ಮ ಕೊಡವನು ಜಮ್ಮ ಕೊಡವನು
ಐರಿ ಮೇದನು ಕೆಂಬಟಿ

ಜಮ್ಮ ಮಾಪಳೆ, ಗೌಡ ಹೆಗ್ಗಡೆ
ಮಲಿಯ ಮಡಿಯೊಳ ಎರವನು

ಪಟ್ಟಿ ಕೋಲೆಯ ಗೊಲ್ಲ ಕುಡಿಯರು
ಕೂಡಿ ಕೆಟ್ಟನ ನಾಡಿದ್

ಬಟ್ಟುಗೂಡಿತ್ ಓರೇ ಮನತ್‌ಲ್
ಒಂದೆಂದೆಣ್ಣೆತ್ ಬಾವನ

ಕೊಡಗ್ ಸೀಮೆರ ಮೂಲನಿವಾಸಿಯ
ಒಂದ್ ಗೂಡಿತ್ ನಯೆಚತ್

ಪೋರ್ ಪೊತ್ತಿತ್ ಚೋರೆ ಚೆಲ್ಲಿತ್
ನಾಡ್ ಕೆಟ್ಟಿತ್ ಬಾಳ್‌ಚಿ.

ಕಾಡ್ ನೆಲ ಜಲ ಕುಂದ್ ಪೊಳೆಕೆರೆ
ಪ್ರಾಣಿ ಪಕ್ಷಿಯು ವನಸಿರಿ

ಕಳ್ಳಕಾಕರು ಪೋಲಿ ಪುಂಡರು
ಕಟ್ವಾಚುಟ್ಟಿತ್ ನೇಡುವ

ಮೂಲನಿವಾಸಿಯ ಮೂಲೆಕಾಕುಲ
ನಿಲ್ಲಾನೆಲೆ ಯೆಂಗಕಿಲ್ಲತೆ

ಪೋಲಿ ಪೊರ್ಕಿಯ ದುಂಬಿತೆಗಳ
ದೂರ ತೆರಕಿತ್ ಬೆಕ್ಕುಲ


ಜಾತಿ ಭೇದತ್ ಬೂಕಿತೆಗಳ
ಪಾತಳಕ್ ಅವು ತಾತುಲ

ಭೇದ ಭಾವನೆ ದೂರ ಮಾಡನ
ಆದಿಮೂಲ ತಾನರಿಂಜಿತ್

ಮೂಲ ಕಾವೇರಮ್ಮೆ ತಾಯಿನ
ನೇಮತೆಕ್ಕಲು ತೊಕ್ಕನ

ಇಗ್ಗುತಪ್ಪನ ಬಾಂಗಿ ತೊತ್ತಿತ್
ಬಾವಬಟ್ಟೆನ ನೋಟನ.

* * * *



ಪಡಬೀರಂಡ ಪಾಟ

1. ಪಡೆಯಾಳಿಯಡ ತೊಟ್ಟಾ ಕೊಡಿಮಲೆ ಕೊಡಗಲ್
ಪಡಬೀರ ಕುರುವೊಂದ್ ಕಣ್ಣೊಡಂದತ್
ಕೊಡಂದೇರ ಒಕ್ಕಡ ಕೊದಿ ಮೊಂವೊ ಬೀಂದತ್
ಕೊಡಗ್ ಕೇಳಿರ ಕೊಡಿ ನೇಂದತ್!
2. ಕಾವೇರಿರಾ ಮಡ್ ಕಳಿ ಕುಂಞಿ ಆ ಧೀರ
ದೇವ ಭಕ್ತಿಲೆ ಬೊಳಂದತಂವೊ ಶಿಸ್ತಾಗಾರ
ಕಳಿ ಪರಂಬಾಲಂವೊನಂದ್ ಮುಂಬಾಟ್ಕಾರ
ಬೊಳಿಕಂಡ ಕೊಡಗ್ಕಂವೊನಂದ್ ಸರದಾರ!
3. ಗ್ಡತತದ ಮಾಲೋಕ ಮಾಪಡೆಲ್ ಮುಡ್ಂಜಿ
ಪಡಬೀರಂಗಳ ತೇಡಿ ಎಡ್ತತಂದಾಂಜಿ
ಭಾರತಾಂಬೆರ ರಕ್ಷಣೆಕ್ ಎದೆತಾಂಗಿ ನಿಂದ್
ಕಾರಿಯಪ್ಪನೆ ಮೂಪಡೆರ ಮೂಪ ತಾನಂದ್!
4. ಭೂಲೋಕ ತಂವಂಗೆಂದು ಪಡೆ ಬೀರ ಕೇಳಿ
ಫೀಲ್ಡ್ ಮಾರ್ಷಲ್ಂದೆಣ್ಣಿ ಭಾರತತ್ ಬಾಳಿ
ಕಾರಿಯಪ್ಪಂಡ ಕೇಳಿ ಮೂಲೋಕತಿಂದ್
ಚಾರಿತ್ರಿಕ ವ್ಯಕ್ತಿ ತಾನಾಯಿ ಬೊಳಂದ್!
5. ಭೂಲೋಕ ಭೂಪಟತ್ ಎದ್ ಕಾಂಬದ ಕೊಡಗ್
ಕೇಳಿಲದ್ ಭಾರತಾಂಬೆರ ನೆತ್ತಿ ಕುರಿಯಾಯಿತಲಂಗಿ
ಕಾರ್ಯಪ್ಪಂಡ ಕತೆ ಕೇಟ್ ಆಯಿರಾಯಿರ ಧೀರ
ಬೀರ್ಯತ್ಲ ನೇರಡ್ ಪಡ್ಂದ್ ವರ ಕಾವೇರಿರ !

* * * *

ಪಣಿ ಒಂದೆ ಫಲ ದಂಡ್

ಜ್ಞಾನಿಯೊಬ್ಬಂಡ ಕೂಡ ವಿಜ್ಞಾನಿಯೂ ಕೂಡಿ
 ಕಾವೇರಿ ಪೊಳೆಕರೆಯ ನಡಂದ ತೀ ಜೋಡಿ
 ತಡಿಕುಂಡ್ ಸುಖ ಮೀಂದಿ ಕುಳಿಪಾಲ್‌ಂದೆಣ್ಣೆಯಂಡ್
 ಪೊಳೆಕ್‌ಳ್‌ಂಜತಾ ಜೋಡಿ ಕುಳಿಪಕ್‌ಂದ್!

ಜಲಜನಕ ದಂಡಾಂಗ್ ಆಮ್ಲಜನಕೊಂದದೇ(H₂O)
 ಜಲರೂಪ ಬಾತ್‌ಂದ್ ಅರ್‌ಂಜ ವಿಜ್ಞಾನಿ
 ಮೇಲ್‌ಜಿಡ್ಡ್‌ನ ಕತ್ತುವಕ್ ಮೇಲುದ್ದಿ ಕುಳಚಿತ್
 ಕೈಕಾಲ್ ಬಡ್‌ಚಂಡ್ ಮೀಂದಿ ತೆಳ್‌ಚತ್.

ಹರಂಡ ಜಡಲಿಂಜಿ ಪಾರಿತೋಕ್ಯನ ಅವಳೆ
 ನರಡ ಪಾಪಕತ್ತುವ ಗಂಗಿ ಇವಳೆ
 ಎಂದ್ ನೆನತಿತ್ ಮೂಮ ಮುಂಜಿತ್ತೆದ್ದತ್ ಜ್ಞಾನಿ
 ನಂದ್ ಮಾಡ್‌ಂದ್ ಕೈತೊತ್ತ್ ದೈವಾಭಿಮಾನಿ.

ಪೊರಮೆ ಮೇಲ್‌ನ ಮಾತ್ರ ಕತ್ತಚಂವ ವಿಜ್ಞಾನಿ
 ಪೊರಮೆಮೇಲು ಒಳಮನವು ದಂಡು ತೆಳ್‌ಕ್ ಚಿಜ್ಞಾನಿ
 ಜಲವೊಂದೆ ಆನಕಲು ಫಲದಂಡ್ ಜ್ಞಾನಿಕ್
 ಫಲಕಾಶೆ ಪಡತೆ ಕೆಯ್ ಹರಿಸೇವೆಕ್:

* * * *

ಕೊಡ್‌ಗರ ಸ್ತುತಿ

ಕೊಡಗ್ ಪಳಿಯ ಕರ್ಮಭೂಮಿ
 ಕೊಡತ್ ಕೈರ ಧರ್ಮ ಭೂಮಿ
 ನಡಪ್ ಕೊಡ್‌ಪ್‌ಲೆಲ್ಲ ವಿಧತು
 ಉದ್‌ಚಿ ತುದ್‌ಚದ್!

ಪಡೆಲ್ ಕೇಳಿ ಎಡ್‌ತನಾಡ್
 ಪಡೆಯಾಳಿಯ ಪುಟ್‌ನೂರ್
 ಕಡಮ ಕಾಟಿ ಆನೆ ನರಿಯ
 ಕೂಡಿ ಬಾವದ್!

ಕುಂದ್ ಕಳತ್ ಬೇಲ್ ಮಾಡಿ
 ಉಂಡ್ ತಿಂದ್ ಕೂಟಿ ನೇಡಿ
 ಪಂಡ್ ಕಾಲತ್‌ಂಜಿ ಕೇಳಿ
 ಕೋಂದ ನಾಡಿದ್!

ಸತ್ಯಧರ್ಮ ಭಕ್ತಿಪ್ರೇಮ
 ನಿತ್ಯನಿಯಮ ಶಿವಂಡನಾಮ
 ಸ್ತುತ್ಯಜನಡ ಬಾವನೇಮ
 ಶಿಸ್ತುಕಾರಳೊ!

ಮೋಸದಗತ್ ನರಿಯ ತೋರ್
 ಸಾಸಕಾರ ಜನಡ ಊರ್
 ದ್ವೇಷ ಕಪಟ ಇಲ್ಲತೋರ್
 ರಸಿಕ-ಕಾರ್‌ಬಾರ್!

ಕಾಲಬದ್‌ಲ್ ಆಚಿ ಮಾತಿ
 ಮೂಲೆಕಾಚಿ ರೀತಿ ನೀತಿ
 ರಾಜಕೀಯ ರೋಗ ತಟ್ಟಿ
 ಬೋಜಿ ಬಾಳ್‌ಕ್!

ಜಮ್ಮ ಜಾಗ ಮಾರಿಕೇರಿ
 ನೆಮ್ಮದಿನ ಪಾಳ್ ಮಾಡಿ
 ದಮ್ಮ ಕೆಟ್ಟಿ ಓಡಿಪಾರಿ
 ಸೀಮೆ ದಾಟೊಚಿ!

ಓದಿ ಪಡೊಚಿ ಮಿಂಞ ಬಂದ
 ನಾಡೊಕಾರ ಮಕ್ಕಳೆಲ್ಲ
 ಕಾಡೊ ಸೀಮೆಂದೆಣ್ಣೆ ತಿಂದೊ
 ನಾಡೊ ಬುಟ್ಟಿತ್!

ರಾಜಕೀಯ ಪಾರ್ಟಿಗೊಂಡೊ
 ಒರ್ಮೊಒಡತ್ ಇರ್ಮೊಮಾಡಿ
 ಧರ್ಮ ಮರ್ಮ ಮರಂದಿ ತಿಂದೊ
 ಕರ್ಮ ಕೊಳ್ಳೊಂಜತ್!

ಊರೊಕಂಜಿ ಪಾರ್ಟಿಬಾತ್
 ಮನೆ ಮನತು ಬಿರೊಕ್ ಬಾತ್
 ಬೀದಿ ಕೊಳ್ಳೊಂಜಿ ಕಾಳಗಕ್
 ಮೊಳಿಯು ಆಚಿಲ!

ಕೊಡವನಾಲ್ ಕೂಡೊನಲ್ಲಿ
 ದುಡೊಕಿ ಮಡಕ್ ಪರಂದಂಡಲ್ಲಿ
 ಬುಡತೆ ಪುಡೊಚಿ ವಾದತ್ ನ
 ಕಡೊಚಿ ಬುದ್ದತ್!

ಇದೊನ ಅರೊಂಜ ಪೊರಮೆಕಾರ
 ಎಡೆಲ್ ಬಂದೊ ಕೂಡಿಯಂಡೊ
 ಕಾಡೊ ಮುಡೊಚಿ ಜಾಗ ಪುಡೊಚಿ
 ನೇಡಿ ಕೂಟೊಚಿ!

ಕಳ್ಳಂಗಕ್ ಇಂಬೊ ಕೊಡೊತ್
 ನಲ್ಲಂವನ ಮೂಲೆಕಾಕಿ
 ಎಲ್ಲ ಕೊರು ಕಂಡಂವಂಡ
 ಪಾಲ್ ಕಾಕೊಚಿ!

ಇಂಞಿ ಕಾಲ ಮೀರಿತಿಲ್ಲೆ
 ಮಿಞಾಕುಳ್ಳ ಬಟ್ಟೆ ತೇಡಿ
 ಒಮ್ಮನತ್ ಕೊಡವಳೆಲ್ಲ
 ಒಂದ್ ಗೂಡನ

ಸಂಗ ಕೆಟ್ಟಿ ತೆಂಗ ನಿಕ್ಕ
 ಎಂಗ ಡೊರ್ಮೆ ಕಾಟಿ ಕೊಡ್ಕ
 ನಂಗ ಜಮ್ಮ ಮಾರತಿಕ್ಕ
 ಬಂಗ ಬಾರಲ!

ಪಂಡ್ ಪೋಲೆ ತಾಂಗಿ ನಿಂದ್
 ಒಂದ್ ಗೂಡಿ ಕೇಳಿನೇಡಿ
 ಗಂಡ್ ಭೂಮಿಂದೆಣ್ಣೆ ಬಾಳಿ
 ಮಂಡೆ ನೇತನ !

* * * *



ಕೊಡಗ್ಗರ ಪುಡುಮೆ

ಕೊಡಿಯ ನೋಟ್ ನೀಲರಂಗ್
 ಅಡಿಯ ಬಿರ್ಚ ಪಚ್ಚೆ ಪಲಂಬ್
 ಕೊಡಗ್ಗರುದ್ದ ಅಗಲತ್‌ಲು ಎಲ್ಲಕಾಲತೂ
 ಉಡ್‌ಪ್‌ಚಿಟ್ತ್ ಪಚ್ಚೆ ಪೊಡಿಯ ಕೊಡಗ್ ದೇವಿಕ್

ಪತ್ತಿನೋಟ್ ಪಚ್ಚೆಕುಂದ್
 ಸುತ್ತಿನೋಟ್ ಮುಂದ್ ಮುಂದ್
 ಸುತ್ತ ಮುತ್ತ ಬೊಳಂದ್‌ನಿಂದ ಬುಟಿಯೂ ಚಾಂದ್
 ಪುದ್ ಮಳೆಕ್ ಪೊಲಂದ್ ಪೋಪ ಕಾಫಿ ಪೂಬೀಂದ್

ಪೆತ್ತ ಆಣ್ ಪಡೆಲ್ ಬೀರ
 ಉತ್ತ ಕಳಿಪ ಪಣೆಲ್ ಶೂರ
 ಪೊತ್ತ ಪಡೆಲ್ ಶತುನಡಕಿ ಗೆದ್ದ ಬಪ್ಪಲಾ
 ಚತ್ತ ದೇಶಕಾಯಿ ತಾಂಡ ಚೋರೆ ಚೆಲ್ಲುಲಾ!

ಬಯ್ಯ ನೆರಿರ ಕೊಡವ ಪೊಂಗ
 ನಯಿಪ ಜಮ್ಮ ಮಣ್ಣೊಲಯಿಂಗ
 ಅಯ್ಯೊಂದೆಣ್ಣೆ ಬಂದಂವಂಗ್ ದಾನ ಮಾಡುಲಾ
 ಉಯ್ಯೊಂದೆಣ್ಣೆ ಚಾಕಿತವನ ಬಟ್ಟೆಕೊಟುಲಾ

ಕೇಳಿ ಪಟ್ಟಿ ಪಚ್ಚೆ ನಾಡ್
 ಬಾಳಿ ಪೊಲಂದ ವೀರಗೂಡ್
 ಏಳಿ ನಂಗ ತಾಂಗಿ ನಿಂದ್ ಕೊಡಿಬಾವನ
 ಪಾಳ್‌ಬುಟ್ಟಿ ಜಮ್ಮತ್‌ನ ಮೋಳ್ ಕೇತನ

* * * *

ಪರಕೆ

ಬ್ರಹ್ಮ ಇದ ನಿನ್ನ ಕೈಮಲಂಗಿ ತೊಪ್ಪಿ
 "ದಮ್ಮಯ್ಯ ವರತಾ"ಂದ್ ಕೇಪಿ
 ಪೊಮ್ಮಾಲೆ ಕೊಡವುಲೆ ಮರುಜನ್ಮ ಬೋಡಿತ್
 ಜಮ್ಮತ್‌ಲೆ ಜನ್ಮಡ್‌ತ್ ಬಪ್ಪಿ ||ಬ್ರಹ್ಮ||

ಲೋಕತ್‌ಲೆ ಇದ್‌ಪುಣ್ಯ ಭೂಮಿ
 ನಾಕ್ ಇದೆ ಸ್ವರ್ಗ ಸ್ವಾಮಿ!
 ಮಾತಾಯಿ ಕಾವೇರಮ್ಮೆ
 ಪೋತಿ ಚಾಕ್‌ನ ಸ್ವರ್ಗ ಸೀಮೆ ||ಬ್ರಹ್ಮ||

ಪಡೆಯಾಳಿಯಡ ಜೂಕ್ ಕಟ್ತ್ಯ
 ಪಡೆ ಬೀರಂಗಕ್ ಕೊಡಗ್ ತೊಟ್ತ್ಯ
 ಸತ್ಯ ಧರ್ಮತ್ ಪೊಲಂದ ನಾಡ್
 ದುಡಿತಾಳ ಕೊಟ್ಟಿಯಂಡ್ ಪಾಡ್ ||ಬ್ರಹ್ಮ||

* * * *



ಕೊಡಗೊಮ್ಮ ಸುತ್ತಿನೋಟ್

ಕೊಡಗೊಮ್ಮ ಸುತ್ತಿನೋಟ್
ಕೊಡಗಾರ ಕಾಡ್‌ಮಲೆ ಬೋಜನೋಟ್ ||2||

ಬೊಟ್ಟತ್ ಮಲೆಯಿಂಜಿ ಕುಟ್ಟತ್ ತಲೆಯೋಳ
ಕುಂದ್‌ಳ್‌ಂಜಿ ಪತ್ತಿತೋಡ್ ಕಂಡಾನ-
ಕಂಡೆನಕೆ ಕೊಟ್ಟಿ ಪಾಡ್ ||2||

ಬಾಂಗಾಡ್ ಬನವುಂಡ್ -ಬಾಣ ಮುಟ್ಟುವಕುಂದ್
ದೈವ ಸೃಷ್ಟಿರ ಕೋಟೆ ಕೊಡಗ್‌ನ ಸುತ್ತಿತುಂಡ್ ||

ಪೀಲಿ ಮೈಲ್‌ರಾಟ್-ಭೀಮರಾಜಂಡ ಪಾಟ್
ಮರಕೊಟ್ಟಂಡಾ ಕೊಟ್ಟ್ -ಕೊತ್ತಿತುಂಡ್ ||

ಪೊಳೆ ತೋಡ್‌ರಾ ರಾಗ -ಪಡೆಯಾಳಿಯಡ ತ್ಯಾಗ
ಅನ್ಯಾಯ ಈ ನಾಡ್‌ ಲಾಗ

ಆಣ್ ಪೊಣ್ಣಾರ ಬೋಜ-ಬನಕಾಡ್ ಸಿರಿ ಬೋಜ
ಎಂದೂ ಈ ನಾಡ್‌ಲ್ ಮಾಜ ||

ಸಂಗಮ ಕುಳ್‌ಚೆಂಡ್ ಸಂಘಜೀವನ ತಿಕ್ಕ
ಭಂಗ ಬರತಿರಡ್ ಈ ಸ್ವರ್ಗಕ್ ||
ಕೊಡಗೊಮ್ಮ ಸುತ್ತಿನೋಟ್ ||2||

* * * *



ದೇಶ ಸೇವೆ ಕೆಯ್ಯನ

(Marching Song, Left, right left)

ಒಂದ್‌ಗೂಡಿ ಬಾಲರೆ ದೇಶ ಸೇವೆ ಕೆಯ್ಯನಾ
ಒಂದ್‌ಗೂಡಿ ಮಾಡನಾ ಭಾರತಾಂಬೆ ಸೇವೆನಾ
ಅಪ್ಪನವ್ವನೆಂಗಡಾ ದೇಶ-ದೇವಂದರಿಯನಾ
ಅಪ್ಪನವ್ವ ತಂದ ತಡಿನ ದೇಶಕಾಯಿ ತೇಕನಾ ||

ಜಾತಿ ಭೇದ ಬುಟ್ಟ್‌ನಂಗ ನೀತಿಬಟ್ಟೆ ಪುಡಿಕನಾ
ಮಾತೃಭೂಮಿ ಸೇವೆಯೇ ಬಾಳ್‌ರ ಗುರಿದರಿಯನಾ
ಬಡಕೊಯಂದ ಕುಂದ್ ಕೊಡಿಯ ಶತ್ರುಕಾತಳತಿತ್!
ಕಾಶ್‌ಮೀರ ಕಣಿವೆಲದಾ ದೇಶಸೂರೆ ಪೋಯಿತ್ ||

ಎಂಗಡಪ್ಪ ಅಣ್ಣಂಗಲ್ಲ ಕತ್ತಿತೋಕೆಡ್‌ತಂಡ್
ನುಗ್ಗಿಬಪ್ಪ ಶತ್ರುಪಡೆನ ಕೆತ್ತಿ ಸೂರೆ ಇಟ್ಟಂಡ್
ಹಿಮಗಿರಿರ ಮಂಜಿಲಳತ್ ಚಿಕ್ಕಿಚೋತ್ ಪೋಚಲೋ
ಮಂಜಿ ಮಳೆಲ್ ನೆಲಂದ್ ತೊಯಿಂಜಿ ಚತ್ತ್‌ಸೂರೆ ಬೂವಲೋ! ||

ಜಾತಿಮತದ್ವೇಷತ್‌ಲ್ ದೇಶ ಮುಳಿತ್ ಪೋನಕಾ
ದವುತಿ ಬಪ್ಪ ಶತ್ರು ಪಡೆನ ತಡತ್ ನಿಪ್ಪ ದಾರ್‌ಲೋ?
ಜಾತಿದಂಡ್ ಆಣು ಪೊಣ್ಣು ಭಾರತಾಂಬೆ ಡೊಕ್ಕತ್
ಜಾತಿ ಭೇದ ಕಿಲ್ಲೆ ಜಾಗ ಇಲ್ಲಿ ನಾಡ ಪಕ್ಕತ್ ||

ಕೊಟ್ಟಿ ಪಾಡಿ ಸಾರನಾ ಲೋಕಕೊತ್ತ ನೀತಿನಾ
ನಯಿಪು ನಾಡ ಬಾಳ್ ಮಂತ್ರ ಆಯಿತಿರಡ್ ದಿನದಿನಾ
ದೇಶತಿಂದ್ ದುಂಬಿತುಳ್ಳ ಶತ್ರುದಾರ್‌ಂದರಿವಿರಾ?
ಓದ್ ಎಳ್‌ತ್ ಅರಿಯತೋರ್ ಮೂಢಜನಳೆ ಶತ್ರುವಾ

ಕೇಡ್ ದ್ವೇಷ ದುಂಬಿತುಳ್ಳ ಜಾತಿವಾದಿ ಶತ್ರುವಾ
 ಕೆಯ್ಯಂಗಳ್ಯಂಗಾಯಿತುಳ್ಳ ಕಳ್ಳಂಗಳೆ ಶತ್ರುವ
 ಲಂಚ ಮೋಸ ವಂಚನೆಲ್ ಆಳುವಯಿಂಗ ಶತ್ರುವಾ
 ಕತ್ತಿತೋಕ್ ಬೋಂಡುಂದಿಲ್ಲೆ ಶತ್ರುನಡಕಿ ಕೊವ್ವಕ್

ಸತ್ಯ ಧರ್ಮ ಶಾಂತಿರ ಗಾಂಧಿಮಾರ್ಗ್‌ಳಿಯನಾ
 ಅಕ್ಷರರಿಯತಂವನ ತೇಡಿ ಆಂಜೆಡ್‌ತ್ ಬಕ್ಕನಾ
 ಓದೆಳ್‌ತ್ ಪಡ್‌ಪ್‌ಚಿಟ್ಪ್ ನಾಗರಿಕಂದ್ ಕಾಕನಾ
 ಪತ್ತಿತದಾ ಭಾರತಾಂಬೆ ವೀರ ಧೀರ ಶೂರರಾ

ಸತ್ಯಧರ್ಮ ನೀತಿರಾ ತ್ಯಾಗಿಜನಳ ಆಯಿರಾ
 ಸೂರ್ಯಚಂದ್ರ ಬದ್‌ಕಿತಿರಣೆ ಇಯಂಡ ಕೇಳಿ ಇಕ್ಕುಲಾ
 ಅಯಿಂಡ ಸಾಲ್‌ಲೋರ್ ಜಾಗ ನಾನ್ ತೇಡಿ ತಳಪಿಲಾ
 ನಾಡಕೂಡ ಸಾಲ್‌ಪುಡಿರಿ ದೇಶವೀರ ಬಾಲರೇ
 ಚಾವು ಎಂಗಕಿಲ್ಲೆ ನೋಟಿ ದೇಶಸೇವೆಕ್‌ಳ್‌ಂಜಕಾ.

* * * *



ಕೊಡಗದೇ ಸ್ವರ್ಗ

ನಾಪುಟ್ಟಿ ಬೊಳಂದ ನಾಡ್ ಇದ್ ಕೊಡಗ್
 ಪೊಮ್ಮಾಲೆ ಪೊನ್ನಾಡದ್
 ನಾಬಾಳಿ ಪೊಲಂದ್ ನಾಡ್‌ಸುಖಿ ಶಾಂತಿ
 ನೆಮ್ಮದಿರ ನೆಲಗೂಡದ್

ಕುಂದ್‌ಕಾಡ್‌ರ ಚಾಯಿ, ಬಾಂಗಾಡ್ ಬನಚಾಯಿ
 ನಂದಾಕಿ ಪೊಲತುವವ ಕಾವೇರಿ ತಾಯಿ

ಪುಳಿ ಕಾಪಿ, ನೆಲ್ಲಡಕೆ ಯಾಲಮಳು ಪಾಬೊಳೆಯೊ
 ಬೊಳತಿನಾ ನಯಿಚಿ ಬಾಳಿ
 ಮಂದ್‌ಲೋಡಿತ್ ಬಂದ್ ಮುಂದ್ ಲಾಡಿತ್ ನಿಂದ್
 ನಂದಾನ ನಾಡ್‌ಲದೊ ನೇಡಿ ಕೇಳಿ.

ತಡಿಯಂಡ ಮೋಳೋಳ ಇಗ್ಗ್‌ತ ಮಲಮೋಳ
 ಪರಂದ್ ಪತ್ತಿಳ್‌ಂಜಿ ನಿಂದ
 ಕಾವೇರಿ ಹಾರಂಗಿ ರಾಮಲಕ್ಷ್ಮಣ ತೀರ್ಥ
 ಪೊಳೆ ತೋಡ್ ಮೀಂದಿ ಬಂದ

ಪೆನ್ನರಿನಾ ಮುಟ್ಟಿ, ಪೆಗ್ಗಾಟಿನಾತಟ್ಟಿ
 ಒಂದಾಯಿ ಬಾಳಿ ಪೊಲಂದ
 ತಾಲಿ ಪಾಟ್ ಪಾಡಿ ಉಮ್ಮತ್ತ ಆಟಾಡಿ
 ನೆಮ್ಮದಿಲ್ ಉಂಡ್ ಬೊಳಂದ

ಚಂಡೆ ಕೊಟ್ಟಾಡಾಟ್ ದುಡಿಕೊಟ್ಟಾಡಾ ಪಾಟ್
 ಕೇಟಿತ್ ಲೋಕ ಮರಂದ
 ಪುತ್ತರಿ ಚಂಗ್ರಂದಿರೊತ್ತೊರ್‌ಮೆನೆಲ್ಲ
 ತಪ್ಪತೇ ನಡತಿ ಬಂದ.

ಒಡಿಕತ್ತಿರಾ ಕೆತ್ತ್ ಪೀಚೆಕತ್ತಿರ ಕುತ್ತ
 ವಡೆಯಾಳಿ ಕೊಡವಡ ಗತ್ತ್!
 ಪಡೆಬೀರ ಕಾರ್ಯಪ್ಪ ತಿಮ್ಮಯ್ಯಂಡಾ ಕೇಳಿ
 ಅದ್ ಪೋಲೆ ಬೀರ್ಯತ್‌ಲೆ ಬಾಳಿ

ಲೋಕೆಲ್ಲ ಸುತ್ತಾಡಿ ನಾಕಂಡ ಚೋದ್ಯವೊ
 ಪೊಮ್ಮಾಲೆ ಕೊಡಗದೆ ಸ್ವರ್ಗ!
 ಇಂಞಿಲ್ಲೆ ಸ್ವರ್ಗಕ್ ಮಾರ್ಗ!

* * * *



ಎಳ್ಳ ಪಡಿಕೆ ಬಾರಿ

ಓದಿ ಪಡಿಕೆ ಬಾರಿ ಓಡೋಡಿ ಪಾರಿ ಬಾರಿ

ಓದಿ ಎಳ್ಳದಿತ್ ಪಡ್ಚಿ ವಿದ್ಯಾವಂತಗಳಾಯಿ-

ಬುದ್ಧಿ ವಂತಗಳಾಯಿ ಬಾರಿ ||

ಅಣ್ಣಯ್ಯ, ಅಕ್ಕಯ್ಯ, ತಂಗೆ, ತಮ್ಮಣ, ಬಾವ

ಮಾವ, ಮಾಂವಿಯರೆಲ್ಲ ಎದ್ದೊ ಬಾರಿ

ಆಣ್ ಪೊಣ್ಣಾರ ಭೇದ, ಜಾತಿ ಬಯತ್‌ರ ಭೇದ

ಊಣ್ ವರಕ್‌ನ ಮರಂದ್ ಬಂದ್ ಸೇರಿ

ಅಕ್ಷರತ್‌ನರಿಯತವ ಅತ್ತಕಡ್‌ಚಿಕ್ಕು ಕಡೆಂದ್

ಪರಂದೋರ್ ಪಳಂಜೋಲ್ ಸತ್ಯ ನೋಟಿ

ಸಾಕ್ಷಾರಾಂದೋಲನತ್ ಓದಿ ಪಡ್‌ಚಿತ್ ಎಲ್ಲ

ಬುದ್ಧಿವಂತಗ ನಂಗಂದೆಣ್ಣೆ ಕಾಟಿ.

ಓದೆಳ್ಳತ್ ಅರಿಯತವ, ಪೊಟ್ಟಿನಾಯಿತ್ ಜಗತ್

ಚದಿಕ್ ಕೆಣ್‌ಂಜಿತ್ ಪಟ್ಟಿ ಪಾಡ್‌ನೋಟಿ

ಮೊಟ್ಟ್ ಬೆರತ್‌ನ ಒತ್ತಿ ಒಪ್ಪೊಟ್ಟ್ ಕೊಡ್‌ತವು

ಪಟ್ಟಿ ಪಾಡ್‌ನ ನಿಂಗ ಅರ್‌ಂಜಿ ನೋಟಿ

ಸಾಕ್ಷರತೆ ಕೇಂದ್ರತ್‌ಲ್ ಬೈಟ್ ನೇರತ್‌ಕ ಕೂಡಿ

ಅಕ್ಷರಾಭ್ಯಾಸತ್‌ನ ನಿಂಗ ಮಾಡಿ

ಓದೆಳ್ಳತ್ ಅರಿಯತವ ಕಾಡ್‌ಮನ್‌ಸಂಗ್ ಕಡೆಂದ್

ಓದಿ ಪಡ್‌ಚಿತ್ ನಿಂಗ ಕೊಟ್ಟಿ ಪಾಡಿ.

* * * *

ಕೊಡಗೊಮ್ಮ ನಡಂದ್ ನೋಟ್


ಬಂದ್ ನೋಟ್ ನಿಂದ್ ನೋಟ್
 ಪೊಮ್ಮಾಲೆ ಕೊಡಗ್ ನಡಂದ್ ನೋಟ್ || 2 ||
 ಬೊಟ್ಟು ಮಲೆನ ಪತ್ತೀ-ಕುಟ್ಟು ತಲೆನ ಸುತ್ತೀ
 ಕೆಟ್ಟಿ ನಿಪ್ಪಚಿಟ್ಟು ದೈವ ಸೃಷ್ಟಿರ ಕೋಟೆ
 ವಿಳಾಸುತ್ತನ ನೋಟಿ.

ಬಾಂಗಾಡ್ ಬನ ದುಂಬ ಕಾಟಕಡಮ ನರೀ
 ಕುಂದ್ ಬರೀಯ ಕಾಂಬ, ಅಬ್ಬಿ ನೀರ್‌ರ ಝರೀ ||

ತಟ್ಟೊತ್ತ ನೆಲತೆಲ್ಲ ಯಾಲ ಕಾಪಿಯೂ ಪುಳೀ
 ಬಟ್ಟೊತ್ತ ಮುಟ್ಟತಲೆ - ಪಾಬೊಳೆರದೇ ಗಾಳೀ
 ಲೋಕೆಲ್ಲ ಪಬ್ಬಿತ್ -ಪಡೆಯಾಳಿಯಡ ಕೇಳೀ
 ಕಾವೇರಿ ಕುಳ್‌ಚಂಡ್ -ಧರ್ಮತ್‌ಲೇ ಬಾಳಿ.

ತೋಡ್‌ಪೊಳೆ ಕೆರೆಯೂ - ಪೊನ್ನಾಡ್ ಕೊಡಗ್ ಸಿರಿ
 ಪಾಪನಾಶಿನಿ ತಾಯೀ - ಕುಲದೇವಿ ಕಾವೇರಿ || 2 ||

* * * *



ನಾಯಕಂಗಳ್ ಮನವಿ

(1995 ರ ರಾಜಕೀಯ)

ಜನಡ ಓಟ್ ಪಡಂದ್ ಗೆದ್ದ
ಜನಡ ನಾಯಕಂಗಳ್ ಕೋರ್
ಮನವಿ ನಾನ್ ಒಪ್ಪ್ ಚಿಡುವಿ
ಮನಸ್ ಕೆಡ್ತೊಳಿ.

ಕಾವೇರಮ್ಮ ತಾಯಿ ಅಂದ್
ತಾಂಗಿ ನಿಂದ್ವೊಲತ್ನೋರ್
ಧರ್ಮಭೂಮಿ ಕೊಡಗ್ಲಿಂದ್
ಒರ್ಮೆ ಕೆಡ್ತತಿ.

ಒಕ್ಕ ಮಕ್ಕಡೊಳ್ಳಲ್ ಎಲ್ಲ
ಬಕ್ಕ ಪಕ್ಷ ರಾಜಕೀಯ
ಗೆದ್ದ್ ಬಂದಿತಾನ ಪಿಂಞ
ಸದ್ ಮಾಡತಿ

ಸಚಿವ ಪಕ್ಷ ಚಕ್ರೇರಡ್
ಶಾಸಕಂಡ ಪೂವೆ ಇರಡ್
ದಕ್ಷ ಸೇವೆಕ್ಳಿಯುವೇಂಗಿ
ಪಕ್ಷ ಮರಕಂಡು.

ನಾಣಯ್ಯಣ್ಣ, ಬೊಳ್ಳಪ್ಪಜ್ಜ
ಮಾದಪ್ಪಣ್ಣ ಅಪ್ಪಚ್ಚಣ್ಣ
ನಾಲ್ ಬರಿರ ಕೊತ್ತಕಂಬ್
ರಾಜಕೀಯತ್.

ಬೊಳ್ಳಪ್ಪಜ್ಜ ಮಾಜಿ ಮಂತ್ರಿ,
ನಾಣಯ್ಯಣ್ಣ ಮಂತ್ರಿಯಾಚಿ,
ಶಾಸಕಂಗಳ್ ಮಾದಪ್ಪಣ್ಣ
ಅಪ್ಪಚ್ಚಣ್ಣನು

ಊರಲ್ಲತ ಊರ್‌ಂಜೊಬ್ಬ
 ಬಂದ್‌ಕೂಡಿ ಮೆಂಬರಾಚಿ
 ಲೆಕ್ಕಕಿಲ್ಲೆ ಜಮಕು ಇಲ್ಲೆ
 ಬಸವಪ್ಪಣ್ಣನೊ !

ಚಕ್ರಧಾರಿ ನಾಣಯ್ಯಣ್ಣ
 ಅಭಯ ಹಸ್ತ ಬೊಳ್ಳಪಜ್ಜ
 ಬೀಂದ ಪೂವ್ ಶಾಸಕಂಗ
 ಒತ್‌ಬೂವತೆ

ಎತ್ತ್ ಏರಿ ಪತ್ತುವಕ
 ಪೋರಿಕೆತ್ತ ಕೋಡುವನ್ನೆ
 ಒತ್ತೊರಮೆ ಇಲ್ಲತೋರ್
 ನಿತ್ಯಕಾರ್ ಬಾರ್

ಚಕ್ರಕಾರ ಕೂಡ್‌ನಲ್ಲಿ
 ಪೂವ್‌ಕಾರಕಿಲ್ಲೆ ಜಾಗ
 ಕೈಯ್ ಕಾರಳಿಂದ್ ದಾರು
 ಕೇಪವು ಯಿಲ್ಲೆ !

ವಲಸೆಕಾರ ಒಳಿಯ ಕೂಡಿ
 ಹೊಲಸ್ ರಾಜಕೀಯ ಮಾಡಿ
 ಮೂಲನಿವಾಸಿ ಜನಳ
 ಮೂಲೆ ಕೂಟ್‌ಚಿ.

ಪೂವ್ ಮೀದ ನಿಂದ ವಿಷ್ಟು
 ಬೆರತ್ ತಾಂಡ ಚಕ್ರ ಕೆಣ್‌ಚಿ
 ಅಭಯ ಹಸ್ತ ಕಾಟುವಾನ
 ನೋಟಿಪಡಿಯಿರಿ.

ಪಕ್ಷ ಭೇದ ಮರಂದ್ ನಿಂಗ
 ದಕ್ಷ ಸೇವೆ ಮಾಡನಾಂದ್

ಪೂವ್ ಚಕ್ರ ಕಯ್ಯುಂಗೂಡಿ
ಸೇವೆ ಮಾಡಿರೊ.

ಕಾವೇರಮ್ಮೆ ಮೆಚ್ಚು ನೋಟಿ
ಬಾವ ಬಟ್ಟೆ ಕಾಟಿ ಪೊಲತು
ಸೇವಕಂಗ ಜನಡಂದೆಣ್ಣೆ
ದೇವ ಮೆಚ್ಚುಲ

ಮೀಸೆ ಕಾರ ನಾಣಯ್ಯಣ್ಣ
ಗಡ್ಡಕಾರ ಮಾದಪ್ಪಣ್ಣ
ಬಾಲೆಕಾರ ಅಪ್ಪಚ್ಚಣ್ಣ
ಬಾಳಿ ತೆಲಂಗಡ್.

ಚಾಯಿಕಾರ ಬೊಳ್ಳಪ್ಪಜ್ಜ
ಬಾಲೆಕಾರ ಕೊತ್ತ ಸಲಹೆ
ಕೊಡ್ತ ಕೊಡಗ್ ಆಡಳಿತತ್
ಕೇಳಿ ಎಡ್ಕಡ್.

ಕೇಳಿ ಕೇಕಡೂರ್ಲೆಲ್ಲ
ಕೊಡಗ್ ಧರ್ಮ ಭೂಮಿಂದೆಣ್ಣೆ
ಪಂಡ್ ಪೋಲೆ ನೀತಿ ಧರ್ಮ-
ತಿಂದ್ ಬಾವನ.

* * * *



ಕೊರಿಯ ಸೇವೆ

ತ್ರೇತಾಯುಗತ್‌ಲಂದ್ ಒಮ್ಮ
ಕೋಡ ಕೊರಿಯ ಕೂಡಿಯಂಡ್
ಸೇತು ಪಣೆನ ಕೆಜ್ಜ ಪುದ್‌ಮೆ ಇನ್ನನುಂಡ್‌ಲಾ

ಭಾರತತ್‌ರ ತೆಕ್ಕ್ ಬರಿಲ್
ತಾಂಗಿ ನಿಂದ ಲಂಕೆ ದ್ವೀಪ
ಪೋಪಕುಳ್ಳ ಸೇತು ಪಣೆನ ಕೆಜ್ಜಂಡಿಂಜವು.

ಕೋಡ ಬಂಬಂಗೆಲ್ಲ ಪೋಯಿ
ಕಂಡ ಕಲ್ಲ್ ಕುಂದ್‌ನೆಲ್ಲ
ಪೊರ್‌ತ್ ಕೊಂಡ್ ಬಂದ್ ಕಡಕ್ ದುಂಬ್ ಬಿಟ್ಟಿತ್.

ಸ್ವಾಮಿಕ್‌ಲೊಬಂದ ಕಷ್ಟ
ಕಂಡಕೊರಿಯ ಬಂದ್ ಅಂದ್
ನಾನು ಸಾಯ ಮಾಡುವೀಂದ್ ಪಣೆಕ್ ಕೂಡ್‌ಚಿ.

ಹಿಂದು ಮಹಾಸಾಗರಕ್
ಪಾರಿ ಬುದ್ಧ್ ಮೇಲ್ ನೆನತಿ
ಓಡಿ ಬಂದ್ ಮಣಪಟ್ಟಿಲ್ - ಬುದ್ಧ್ ಉರ್‌ಂಡ್‌ಚಿ.

ಮೇಲ್‌ಲಿಂಜ ನೀರ್‌ಕ್‌ಲೊ
ಮಣವು ಪೊತ್ತ್‌ಚಿತ್ ಕೇಳ್
ಓಡಿ ಬಂದ್ ಸೇತುವೆಕ್ ಮೇಲ್ ಕೂಡ್‌ಕ್‌ಚಿ.

ಚೆರಿಯ ದೋರ್ ಜೀವಿರೋರ್
ಸಹಾಯ ಪಣೆನ ನೋಟಿತ್ತಲ್ಲಿ
ಮನಸ್ ಕರಿತ್ ರಾಮಸ್ವಾಮಿ ಪುಡ್‌ಚಿಕ್ಕೊಂಡತ್.

ಕೈಲ್ ಎಡ್‌ತ್ ಪುಡ್‌ಚಿಗೊಂಡ್
 ತಾಂಡ ಕೈ ಬೆರವು ಮೂಂದ್
 ಒತ್ತ್ ಕೂಟಿ ಬೆನ್ನೊರುದ್ದ ನೀಂಬಿಬುಟ್ಟಿತ್.

ಅಂದ್ ನೀಂಬೊನಾ ಗೆರೆಯೊ
 ಇಂದು ಕೂಡ ಕಂಡಂಡುಂಡ್
 ಸ್ವಾಮಿ ಕೊಡ್‌ತ ಆರಕೇಳ್ ಇನ್ನನುಂಡ್‌ಲ.

ನೀಡ ವಂಶವುಳ್ಳ ಕಾಲ
 ಕುಡ್‌ಚದೆಲ್ಲ ಅಮೃತ ಆಡ್
 ಕಡ್‌ಚದೆಲ್ಲ ಕೈಬುರೆನಕೆ ಮೊದ್‌ರತಿಕ್ಕಡ್.

ಕಿತ್ತಮರತ ಕೊಂಬೆ ಆಡ್
 ನೀನ್ ಪುಡ್‌ಚಿ ಪಾರುವಕ್ಕ
 ಇರ್‌ಂಬೊರೆನಕೆ ಒರಪ್‌ಗೂಡಿ ಪೊಳಿಯತಿಕ್ಕಡ್.

ಅಂದ್ ಕೊಡ್‌ತ ವರವು ಪೋಲೆ
 ಇಂದು ಕೂಡಿ ಪೊಲಂದ್ ಬಾವ
 ಕೊರಿಯ ವಂಶವೆಲ್ಲ ಇಂದ್ ಬದ್‌ಕಿ ಬಾವಲ!

* * * *



ಪ್ಲಾಂಟರ್‌ಡ ಮೋಂವೊ

ಮೂಲಜ್ಜ ಮುತ್ತಜ್ಜ ಮರಕಾಡ್ ತರಾಚಿತ್
 ಕಳತುತ್ತ್ ಕೊಡಗ್‌ನ ಕೊಡಿ ಕೂಟ್‌ಚಿ
 ಒಡಿಕತ್ತಿ ಪುಡ್‌ಚಿತ್ ಶತ್ರುಪಡೆ ನಡಕಿತ್
 ಕಡಂಗೆಡ್‌ತ್ ಕೊಡಗ್‌ನ ಕಾಪಾಡ್‌ಚಿ.

ಬಾಂಗಾಡ್ ಬನ ನೀಕಿ ಕುಂಡ್ ಕುಡ್‌ಪ್‌ನ ತಿದ್ದಿ
 ಚೀಂಗೆ ನೆಡಿ ನೀಕಿತ್ ಬೊಳೆ ಬೊಳತಾಚಿ
 ಕುಂದ್ ಬರಿ ತರಾಚಿತ್ ತಟ್ಟೊತ್ತ ನೆಲಮಾಡಿ
 ಮುಂದ್ ಮನೆ ಕೆಟ್ಟಿತ್ ಕುಳ ತಾಂಗ್‌ಚಿ.

ಮುತ್ತಜ್ಜಿ ಪೆತ್ತತ್ ಮುತ್ತ್ ಮಕ್ಕಡ ಪಡೆನ
 ಪೆತ್ತ ಮಕ್ಕಳೊ ಬೊಳಂದ ತೊತ್ತೊರ್‌ಮೆಲ್
 ಎತ್ತ್‌ಬೆನ್ನಲ್ ಕೌಂದಿ -ಲಕ್ಕಿ-ಪೊರೆ ನೆರತಿತ್
 ಪತ್ತೊರ್ ಸುತ್ತಿತ್ ಪಣ ನೇಡ್‌ಚಿ.

ಅಜ್ಜಂಗಡ ಕಾಲತ್ ಕೆಜ್ಜಿ ಮಾಡ್‌ಚಿ ತೋಟ
 ಕಾಫಿ ಪುಳಿ ಬಾಳೆ ಮಳು ಚಾಯಿನೋಟ್
 ಸಿರಿಕಂಡ ಕೊಡಗ್‌ಲ್ ಆಣು ಪೊಣ್ಣೊಂದಾಯಿ
 ಕೇಳಿ ನೇಡ್‌ಚಿ ವಿದ್ಯ ಬುದ್ಧಿವಂತರಾಯಿ

ಪಡೆ ಭೂಮಿಲೆಕ್ಕೊಲು ಶತ್ರು ಪಡೆನಡಕಿತ್
 ಪಡೆಬೀರ ಕೊಡವೊಂದ್ ಪೆದ ನೇಡ್‌ಚಿ.
 ಪಡೆಪೊತ್ತ್ ನೇಡ್‌ನ ಪಡ್‌ಭೂಮಿ ಜಮ್ಮತ್
 ನಡುಬಗ್ಗಿ ನಯಿಚಿತ್ ನೆಲೆ ತಾಂಗ್‌ಚಿ.

ಅಜ್ಜ ನೇಡ್‌ನ ಜಮ್ಮ ತಪ್ಪವ್ವ ಕೆಜ್ಜಿತ್
 ಕೊಜ್ಜಿ ಕೂಟ್‌ಚಿ ಕಾಫಿ ಲೋಡ್ ಲೋಡ್
 ಕಾಫಿ ಮಾರ್‌ಚಿ, ಲಾರಿ ಲಾರಿರ ಲೋಡ್
 ಪಣ ಪೋರಿ ಬಾತದ ಜೀಪ್ ಲೋಡ್!

ವಕ್ಕ ಕೊಡಿಯಾಯಿತ್ ಪುಟ್ನಾನವ ಪುಲಿಪುತ್ರ!
 ಚೊಕ್ಕಿ ಚೊಳಿ ಮರಂಜತ್ ಪಣಕಂಡಿತ್.
 ಪತ್ತ ಬಯತ್‌ರ ಪುಟ್ನ ನಮ್ಮೆಕದ ಗಿವ್ಪಂವಂಗ್
 ಎಡ್‌ತ್ ಕೊಡ್‌ತತ್ ಅಪ್ಪ ರೋಡ್ ಕಿಂಗ್!

ರೋಡ್ ಕಿಂಗ್‌ಲೆ ಸುತ್ತಿ ಹೈಸ್ಕೂಲ್ ಕಿಂಗಾಚಿ
 ಸುತ್ತಿ ಕಳಚಂಡ್ ಪಾಠ ಮರಂದ್ ಪೋಚಿ
 ಸಪ್ಪಿಮೆಂಟರಿಕಳತ್ ಅಂಜಿಕುರಿ ಕೆಟ್ಟಿತ್
 ಎಸ್.ಎಸ್.ಎಲ್.ಸಿ.ನ ಪಾಸ್ ಮಾಡಿತಾಚಿ.

ಬೆಂಗ್ಲೂರ್, ಮಂಗ್ಲೂರ್ ಮೈಸೂರ್ ನಗರತ್‌ರ
 ಕಾಲೇಜ್ ಸೀಟ್‌ನವ ತೇಡಿ ಪೋಚಿ.
 ನುಪ್ಪದೇ ಪರ್ಸೆಂಟ್ ಮಾರ್ಕೆಡ್‌ತ ಬಂಬಂಡ
 ಕೋಲ ಕಂಡಿತ್ ಮೂಡ್‌ಕೇ ಪಡಿ ತಾತ್‌ಚಿ.

ಒಂದುಳ್ಳ ಮೋಂವನ ಓದ್‌ಚಿರಂಡೂಂದ್ ಹಟತ್
 ಅಪ್ಪವ್ವ ಸುತ್ತಾಚಿ ಕಾಲೇಜ್‌ಕ್
 ಪ್ರಿನ್ಸಿಪಾಲ್‌ರ ಕಾಲ್ ಪುಡ್‌ಚಿತ್ ಮೊರಟ್
 ಸೀಟೊಂದ್ ದಕ್ಕಚಿದ ಕೊದಿ ಮೋಂವಂಗ್ !

ಕಾಲೇಜ್ ಪತ್ತನದು ಕಳಿಯೆಲ್ಲ ಬದ್‌ಲಾಚಿ
 ಕಾಲಕಯಿಪಕ್ ಕಾಲೇಜ್‌ಂದರಂಜಂಡತ್

ಬಪ್ಪಪೋಪಕ್ ತೇರ ಎಸ್ಪೀಮ್ ಜೆನ್ನಾ
ಓದೆಳ್ತಾಕಂವಂಗಿಲ್ಲೆ ಪುಸ್ತಕವು ಪೆನ್ನಾ!

ಕೂಟ್ ಬಾದೆಯ ಉಂಡಂವಂಗ್ ಸಾಲ್ ಸಾಲ್
ಟಿ.ಸಿ. ಕೊಡ್ತಯಿಚ್ಚಾರ್ತ್ ಪ್ರಿನ್ಸಿಪಾಲ್!
ತೋಟ ಬೇಲದ್ ಅಂವಂಗ್ ಎಕ್ಕೊಲೂ ಬೋರ್
ಪತ್ತಿ ಪೊರಟತ್ ಅಂದೆ ಎಸ್ಪೀಮ್ ಕಾರ್.

ಕಾರ್ಳ್ಂಜಿತಾನದು ನುಗ್ಗ್ ಚದ ಬಾರ್
ಕಾರ್ ಬಾರ್ಲೆ ಮುಳ್ಳನಂವಂಗ್ ಪಣ ಕೊಡ್ಪದಾರ್?
ಇರ್ಪೊವುಲ್ ಮನೆಲಳತ್ ಪೋತತಂವ ಪೋರ್
ಅಪ್ಪಂಗೆಣ್ಣ್ ಚಿ ಅಂವನೆ "ಇಂದೆ ತೋಟಮಾರ್"

ಕೊದಿ ಮೋಂವಂಗಾಯಿತ್ ಅಪ್ಪಂಡ ತ್ಯಾಗ
ಕಾಕ, ಚೇಟನ ಕಾಕಿ ಮಾರ್ಚಿ ತೋಟಜಾಗ
ಭೋಗ ಕೊದಿಕಣೆ ಬಾತಂವಂಗ್ ಏದೇದೋರೋಗ
ಇಕ್ಕೆ ಎಣ್ಣುವ ಜನಕ್ "ಜಮ್ಮತ್‌ನ ಮಾರುವಕೆ ಆಗ"

ಜಮ್ಮ ಮಾರ್‌ನ ಕೊಡವನದ ಬೆಲೆಗಟ್ಟತ್
ಬೆಲೆಗಟ್ಟ, ಕೊಡವನದ ಕಳೆಗಟ್ಟತ್
ಕಳೆಗಟ್ಟ, ಕೊಡವ ನದ ಕುಲಗಟ್ಟತ್
ಕುಲಗಟ್ಟ, ಕೊಡವನದ ನೆಲೆಗಟ್ಟತ್!

* * * *



ಕುಡ್‌ಕಂಡ ಪ್ರಾರ್ಥನೆ

ಶಿವನಾನ್ ಬೋಡಿಯವಿ ವರ ಕೇಟ್ ನಿನ್ನ
 ಕುಡ್‌ಚಂದ್ ದಯಕಾಟ್ ನೀನಾಕ್ ಚೆನ್ನ
 ಕುಡ್‌ಕ ಪೆದ ಬರತನೆಕೆ ಕಾತಳ್‌ತ ನನ್ನ
 ಕುಡಿಪ ಚಾಲ್‌ನ ಮಾತ್ರ ಮಾಡಿರತೆ ಮನ್ನ!

ಕುಡ್‌ಚಿ ಬಪ್ಪಕ ಬಾಯಿ ಕಳ್ಳನಾರತೆ ಮಾಡ್
 ಕಳ್ಳ ಕುಡ್‌ಚಕ ಕಣ್ಣ್ ಚೋಪಾಗ ತಾಡ್
 ಪಡಿತ್ತೊರಪ ಪೊಣ್ಣ್‌ಕದ್ ಅರಿಯತೇ ಪೋಡ್
 ಅರ್‌ಂಜಕಲು ಬಯ್ಯುವಕ್ ನಾವುರಂಡತಿರಡ್

ತೊಂಡೆಲ್‌ಳಿವಾಂಗ್ ಮಿಂಞ ಮಂಡೆಕೇ ಪೋಡ್
 ಮಂಡೆ ತಿರ್‌ನಕೊ ಕಾಲ್ ತೆರಿಕ ತಿರಡ್
 ತೆರ್‌ಚಿ ಬುದ್ದಕೊ ದಾಕೊ ನಾ ಕಾಂಗತಾಡ್
 ಕಾಣ ಬುದ್ದಕ ದುಂಡ್ ನಾಯಿನಕ್ಕತೆ ಪೋಡ್

ನಲ್ಲ ಬುದ್ಧಿನ ಪೊಣ್ಣ್‌ಕ್ ನೀನೊಮ್ಮ ಕೊಡ್
 "ಕಳ್ಳೆಲ್ಲ ಕುಡ್‌ಚಿಯಾಂ"ದವ ಕೇಕತಾಡ್
 ಜೋಬ್ ತವುಡಿತ್ ದುಡ್ಡ್ ಲೆಕ್ಕ ಕೇಕತೆ ಪೋಡ್
 ತೆಳಿ ತೆಳೆಚಿ ಕೋಂಬರೆಕ್ ಓಡಿ ತಾ ಬರಡ್ ||ಶಿವ||



ಪೊಮ್ಮಣಿ ಜಿಮ್ಮಿ

(ಮುಲ್ಲೆರ ಜಿಮ್ಮಿ ಚತ್ತಾನ ಕೇಟಿತ್ ಎಲ್‌ದಾನದಾ)

ಪೊಮ್ಮಾಲೆ ಕೊಡಗ್‌ರ ತಲೆಮಣಿಯಂವ ಜಿಮ್ಮಿ
ಪೊಮ್ಮಾಲೆ ತುಂಡಿತ್ ಮಣೆ ಒಡಂದತೊ
ಸಾಹಿತ್ಯ ಸಂಸ್ಕೃತಿ ಬೊಳತಿಸಿ ಪೊಲತ್‌ನ
ಕವಿರಾಜ ತಳಿ ಬೋಜ ಮರೆಯಾನದೊ?

ಆಟ್‌ಪಾಟ್‌ಲ್ ಬಂಬ ಕಳಿತೆಳಿಲ್ ತಾಮುಂಬ್
ನಟನೆ ನಾಟಕಕೆಂದೊ ಕೊಡ್‌ತ ತಿಂಬ್
ಬಾಲಂಗಡ ಮನಗೆದ್ದ ಬಾಲ ಸೂರ್ಯನ್ ಇಂದ್
ಮಜ್ಜಣತೆ ಮುಳಿತಿಂದ್ ಮರೆಯಾಚದೊ

ಪೊಲಂಜತಿರಾ ಬೊಳಕ್ ಪೊಲಂಗೊತ್ತಿ ತಾನಾಯಿ
ಬೊಳಿ ತಳೆಚಿ ಕೊಡಗ್‌ನ ಪೊಲತ್‌ನಂವ
ಎಡೆ ಬಯತ್‌ಲದ ಬಳ್ಳಿ ಕೊಡಿತುಂಡಿ ಬುದ್ದತ್
ನಡುಪೊಳೆಲ್ ಕೊಡಿ ನೇರತಡಿ ತಾಂದತೊ

ಯಮರಾಜ ಬೀಜ್‌ನ ತಳೆಕೇರ್ ತಪ್ಪಿತ್
ಜಿಮ್ಮಿರ ಬೋಳೆಲ್ ಮುರಿಪೋನದೊ?
ಇಂದ್ರಂಡ ಒಡಿಕತ್ತಿ ಗುರಿತಪ್ಪಿ ತೆರ್‌ಚಿತ್
ರಾಜ ರಸಿಕಂಡ ಕೊರ ಮುರ್‌ಂಜದಾ?

ಮೇಘರಾಜಂಡೋರ್ ತೆಡ್‌ತಪ್ಪಿ ಬಡ್‌ಚಿತ್
ಕೊಡಗ್‌ರ ಕುಂಞಿರ ಎದೆ ಒಡಂದದಾ?
ಮುಕ್ಕಣ್ಣ ಮೂಂದನೆ ಕಣ್ಣ್ ತೊರಕಣೆ
ಜಿಮ್ಮಿ ಅಯ್ಯಪ್ಪನ್ ಎದ್ ಕೆಣಂಜತೊ?

ಕಾವೇರಿ ಕಂಡ್ಲೆ ಇಗ್ಗತ್ತ ತಡ್ತಲ್
 ಕಾರೋಣ ಕೈಮರತ್ ಕಾಪಾಡ್ಲೆ.
 ಕಾಕೋಟಚ್ಚನಂದ್ ಕೈಕೊಡ್ತ್ ಎಪ್ಪಾಲೆ
 ಪೊಮ್ಮಣ ಜಿಮ್ಮಿರ ದಿನನೂಕಲ್.

ಕಳೆ ಇಲ್ಲ ತಾಯೋಚಿ ಕಳಿಪರಂಬ್ ಸಭೆಲ್ಲೆ
 ಮೊಳಿಕೂಟಿ ಪಾಡುವ ಸ್ವರ ಕೇಕತೆ
 ಪಾಟ್ ತಾನ್ ಕೆಟ್ಟಿ ರಾಗ ರಸಕೂಟಿ
 ಪಾಡುವ ಜಿಮ್ಮಿರ ತೆಳಿಕಾಂಗತೆ.

ಆಳಣ್ಣ ತೊತ್ತಂಡ್ ದೇವಳ ಬೋಡನ
 ಕೊಡಗ್ಲೆ ಮರ್ಜನ್ಮ ಎಡ್ಕಡ್ಂದ್
 ಈ ಕವನ ಕೆಲ್ಲಾಂಗು ರಾಗರಸಕೂಟಿ
 ಪಾಡಿತ್ತೆಂಗಡ ಮನಸ್ ತೆಳೆಕಡ್ಂದ್.

* * * *



ರ್ಯಾಗಿಂಗ್ ಬೀರಂಗ

(1991ನೆ ಇಸವಿಲ್ ಪಾಡೆಯಂಡ ಪೂಣಚ್ಚಿ, ಐಚಂಡ ಶರತ್ ಕಾರ್ಯಪ್ಪ ಪಿಂಞ ಅಪ್ಪಚ್ಚೋಳಂಡ ಬೀನಾ ಕುಶಾಲಪ್ಪ - ಈ ಮೂಂದ್ ವಿದ್ಯಾರ್ಥಿಯ "ರ್ಯಾಗಿಂಗ್" ಎಣ್ಣುವ ಪಿರಾಂದ್ ಕಳಿಕ್ ಬಲಿಯಾಯಿತ್ ಪ್ರಾಣ ಕಳಂದಂಡ ಸಂದರ್ಭತ್‌ಲ್ ಎಳ್ದೊನದ್)

ಬಾಳ್ ನಂದಾಕಿತ್ ಕೇಳಿ ಎಡ್‌ಪಕ್
ಕಾಲೇಜ್ ಪತ್ತನ ಕುಂಞಿಯಳ
ಗೋಳ್ ಪಡತಿತ್ ಬಾಳ್ ಮುಡ್‌ಚೋರ್
ಪೋಲಿಯಡಾ ಕಥೆ ಪಾಡುವಿನಾ!

ಆಡಾಡ ಮಕ್ಕಡ ಬಾಳ್‌ನ ಪಾಳಾಕಿ
ಕಾಳೆಯಂದೆಣ್ಣುವ ಪೋಲಿಯಕ್
ಪಾಳ್ ಚೋರೆ ಗೊಂಡ್ ಪುಟ್ಟಿ ಬೊಳಂದೋರ್
ಪೋಲಿ ಸಂತಾನಕ್ ಧಿಕ್ಕಾರವೊ!

ಗತ್ತರಪ್ಪಂಗಡ ಮತ್ತೇರ್‌ನ ಮಕ್ಕ
ಕುತ್ತಿ ಚುಟ್ಟ್ ಕೊಂದ ಕುಂಞಿಯಕ್
ಬೊತ್ತಿ ಬೊರಂಡಿತ್ ಚತ್ತ ಮರೆಯಾನ
ಮುತ್ತ ಕುಂಞಿಯಕ್ ಶ್ರದ್ಧಾಂಜಲಿ !

ಪೋಲಿ ತಿರ್‌ಗಿತ್ ಬಾವಕರಿಯತೆ
ಕಾಲೇಜ್ ಪತ್ತನ ಕಾಳೆಯಕ್
ಕಾಲ್‌ಲ್ ತೇಂಜಿತ್ ಮೂಲೆಲ್ ಚಾಡ್‌ನ
ತೋಲ್ ಕಾಮೊಟ್ಟ್‌ರ ಮಾಲೆಯಿದೊ!

ಪುಂಡತ್ತ ಪೆರ್ತಲ್ಲಿ ಮುಂಡಂಗ ಬಾವುಲೆ
 ಚಂಡೆ ಮುಳ್ಳರಡಿ ಇಂಜಿಯಾಗ
 ಚುಂಡೆ ಪಡತ್‌ಲ್ ನಡಂದಂವೊ ನಂದಾಗ
 ಉಂಡಾಡಿ ಪುಂಡಂಗ ಮಂದ್‌ಕಾಗ!

ನಯಿಕತೆ ನೇಡ್‌ನ ಕೂಳುಂಡ್ ಬೊಳಂದಕ
 ಬಯತ್‌ಕ್ ಮೀರ್‌ನ ಪೋಲಿಯಾಕು
 ಪಣತ್‌ರ ಚೊಕ್ಕಲ್ ಪಾರಿ ಕಳಿಪಂವೊ
 ಗುಣ ಮನ ಇಲ್ಲತ ಮಾರಿಯಾಕು!

ಬೀನ ಪೂಣಚ್ಚನು ಶರತ್ ಕಾರ್ಯಪ್ಪ
 ಜಾಣ ಕುಂಞಿಯವು ಬಾಡಿ ಪೋಚಿ
 ಪೂವಾಯಿ ಬೀಂದಿತ್ ಒಕ್ಕ ಬೊಳತುವ
 ಪೂಮೊಗ್ಗ್ ಬೀರತೆ ತುರ್‌ಂಡಿ ಪೋಚಿ!

ಉತ್ತ್ ಕಳತಿತ್ ಬಿತ್ತಿ ಬೊಳತಿತ್
 ತೊತ್ತ್ ದೇವಕೆಲ್ಲ ಬೋಡಿನಿಂದ್
 ಪತ್ತೂರ್ ಮುಡಿ ಪಂತ ಪತ್ತಾನ ಪೆತ್ತಲೆ
 ಒತ್ತ ಆ ದಂಪತಿ ಪಾಡೆಯಂಡ!

ತಿದ್ದನ್ ಗೊಂಬೆ ಆ ಬುದ್ಧಿಕಾರ ಬಾಲ
 ಗೆದ್ದಿತ್ ಕಾಲೇಜ್ ಪತ್ತಿ ಪೋಚಿ
 ಬುದ್ಧಿತ್ ಮಾಡಿಂಜಿ ಚತ್ತತ್‌ಂದೆಣ್ಣೆತ್
 ಸದ್ ಅಡಕಾಚಿ ಲಂಚತ್‌ಲ್!

ಒಕ್ಕ ಕೊಡಿಯಂವ ಚತ್ತದರ್‌ಂಜಿತ್
 ಪೆತ್ತವ್ವ ತಿತ್ತಲ್ ಕತ್ತಿ ಪೋಚಿ
 ದಕ್ಕತ ಮೋಂವಂಡ ದುಃಖಿತೆ ತಾಮುಳಿ
 ದಿಕ್ಕಿಲ್ಲತಪ್ಪನು ಒಕ್ಕ ಪೋಚಿ!

ಚಿಕ್ಕಿತ್ ಚೋತಿತ್ ಚಾಕಿ ಪೊಲತ್‌ಚಿ
 ಒಕ್ಕ ಕೊಡಿನದೊ ಸುಬ್ಬಯ್ಯಣ್ಣ
 ಐಚಂಡ ಕುಳತ್‌ರ ಮುಂದ್‌ರ ತಲೆ ಕಂಬ್
 ಪೋಚದೊ ಪೊರ್‌ಂಜಿತ್ ಕವಂಜತದಾ!

ಪಾಳ್ ಪರದೇಶಿ ಪೋಲಿಭಿಕಾರಿಯ
 ನಾಳ್ ಕಯಿಚಂಡ್ ಕಾಲೇಜ್‌ಲ್
 ಕಳ್ಳ ಕುಡ್‌ಚಂಡ್ ಕಾಲ ಕಯಿಚಂಡ್
 ಗೋಳ್ ಕೆಟ್‌ಚದ ಪಾಕುಂಞಿನ!

ಕಂದ್ ಕರ್ ಬೆಂದು ಒಂದೂ ಅರಿಯತೆ
 ಕೊಂದ ಕೊಲೆಗಾರ ಈ ಕೊಡವ
 ರ್ಯಾಗಿಂಗ್ ಶಬ್ದತ್‌ರ ಅರ್ಥ ಅರಿಯತೆ
 ರೋಗಾಯಿ ಕಾಲೇಜ್ ಕೂಡಿಯಂಡ್

ಮುಳ್ಳಲ್ ಕುತ್ತಿತೂ ಬೀಡಿಲ್ ಚುಟ್ಟಿತೂ
 ಕಲ್ ಪಾರೆ ಮೀದ ಈ ತತವು
 ತೋಲುಳಿ ಪೋನಾನ ನೋಟಿ ತೆಳ್‌ಚತ್
 ಪಾಳ್ ಚೋರೆಗೊಂಡ ಪೋಲಿಯಳೊ!

ಪಟ್ಟಿ ಗೋಳ್‌ನೆಲ್ಲ ಕಾಗದ ತೆಳ್‌ದಿತ್
 ಪೊಟ್ಟಿರ ಮೀದಲ್ ಬೆಚ್ಚಾನದ
 ಕೆಟ್ಟಿ ಪದ ಬಕ್ಕು ಕಾಲೇಜ್‌ಕೆಣ್ಣೆತ್
 ಕಟ್ಟಿತ್ ಫಾದರಿ ಚುಟ್ಟಿತ್‌ಲೋ!

ಭಿಕಾರಿ ಮಕ್ಕಡ ಪೋಕಾರಿ ಚಾಲ್‌ನ
 ಪತ್ರಿಕೆಕಾರ ಒಲಂಬ್‌ಚದ
 ತುಪ್ಪಚಿ ಮೂಡ್‌ಕ್ ಅಪ್ಪವ್ವನ ಕೂಟಿ
 ಬೊತ್ತತೆ ಪತ್ರಿಕೆ ಬ್ರಹ್ಮಗಿರಿ

ಶಾಸಕ ಬಂಬಂಗ ಸದ್ವೇರ ಮಾಡ್ಲೆ
 ದುಡ್ಡ್ ಕಾರಪ್ಪಂಗ ಜಿದ್ದಾ ಕುಂದಾ?
 ಸಮಾಜಕಾರಳೂ ಸುದ್ದಿಕ್ ಪೋಯಿಲೆ
 ಚತ್ತಂವ ಎದ್ದಿತ್ ಬಪ್ಪಾಲೇಂದಾ?

ಕೋದಂಡ ಪೂವಯ್ಯ ಕೊಡ್ತ ಸಲಹೆನ
 ಎಡ್ತಿತ್ ಕಾರಿಯ ನಡತ್ನಕ
 ಚತ್ತ ಮರೆಯಾನ ಮುತ್ತ ಕುಂಞಿಯಕ್
 ಒತ್ತ ಮರಿಯಾದಿ "ಶ್ರದ್ಧಾಂಜಲಿ"!

ಆಯಿರ ತಿರಿಗೊಂಡ್ ಆಳಣ್ಣ ಬೋಡನ
 ದೇವಡ ಪಾದಕ್ ಸೇರಡ್ಂದ್
 ಮಾಜನ ಡೆಲ್ಲಾಡೊ ಮನತ್ ನೆಲೆಗೊಂಡ
 ಬೋಜಿ ಕುಂಞಿಯಕ್ ಶ್ರದ್ಧಾಂಜಲಿ!

* * * *



ಕೊಡವ ಸಾಹಿತ್ಯ ಬೋಳಚೆ

ಕೊಡವಕೋರ್ ಪುರ್‌ಡ್ ಪುಟ್ಟಿ
 ಕೊಡವಳೆಲ್ಲ ಕಾಕಿ ಕೂಟಿ
 ಕೊಡವತಕ್ಕ ಬೋಳಚೆಕಾಯಿ
 ನಮ್ಮ ನಡತ್‌ಚಿ!

ಕೊಡವ ಎಳ್ತಕಾರಡೆಲ್ಲ
 ಪಳೆಯ ಬುಕ್ಕ ತೇಡಿ ಪೊರಾಕಿ
 ಪುದಿಯದಾಯಿ ಅಚ್ಚ್ ಮಾಡಿ
 ಅಡಕಿ ಬೆಚ್ಚತ್!

ಸಂದುಕತ್ ದುಂಬಿತಿಂಜ
 ತೂರ ಪೊಟ್ಟಿರೊಳ್‌ಂಜಿ ಆಂಜ
 ಕೆದ ಪುಡ್‌ಚಿ ಪಾಳೆ ಮೇಂಜ
 ದೆಲ್ಲ ಕೋಂದಿತ್!

ನಮ್ಮ ಕೂಡುವಾಂಗ್ ಮಿಂಞ
 ಕೊಮ್ಮೆ ದುಂಬ ಕೊಂಡ ಬಂದ್
 ಗೇಟ್‌ರಲ್ಲಿ ಮಾರುವಕ್
 ಜೋಡ್‌ಚಿಟ್ಟತ್!

ಅಂಞೂರಾಂಡ ಪುಸ್ತಕತ್
 ಐಂಬದುರ್‌ಪ್ಪ-ಕುಳ್‌ಪಿತಂದ್
 ಮಾರುವಕ್ ಮೂಡಿಮಕ್ಕ
 ಸಾಲ್ ನಿಂದತ್!

ಕೊಂಬ ಮೀಸೆ ಕೊಡವ ಬಾತ್
 ಮಂಡೆ ತಾತಿತೊಮ್ಮ ನೋಟಿ
 "ಪಂಡೆ ನಾನ್ ಓದಿಯೇ"ಂದ್
 ದುಂಡ್ ತಿರ್‌ಕಚಿ!

ಕಾರ್ಳಂಜಿ ಬಂದ ಪೊಂಗ
 ಕರ್ಪು ಕನ್ನಡಿರೊಳಿಯ ನೋಟಿ
 ಇರ್‌ಟ್ ಕೂಟಿ ಮೂಡ್‌ನೊಮ್ಮ
 ಪೊರಟ್ ನಡಂದತ್!

ಬಿರ್ಚಿ ಮಂಡೆಕರ್ತಿಯೊಬ್ಬ
 ಪಾಳೆ ಮರ್‌ಚಿ ತೆಳಚ್‌ರೊಂಜಿ
 "ಐ ಕಾಂಟ್ ರೀಡ್"ಂದೆಣ್ಣೆ
 ತೆರಮೆ ಚಾಡ್‌ಚಿ!

ಗರಿಕೆ ಗಡ್ಡ ಜೀನ್ಸ್‌ಕಾರ
 ಬೋಯಿ ಕಟ್ಪ್ ಮಿಡ್ಡಿ ಮಿನಿಯ
 "ಕೊಡವ ತಕ್ಕಿ ಗೊತ್ತಿಲ್ಲೆ"ಂದ್
 ತಿರಿತೆ ನೋಟ್‌ಲೆ!

ಹೇಟ್‌ಕಾರ ಬೂಟ್‌ಕಾರ
 ಟಾಟಸೂಮೊ ಜೆನ್‌ಕಾರ
 ಸಾಲ್‌ಸಾಲ್ ಬಂದ್‌ಪೋಚಿ
 ಮೂಡ್ ತಿರ್‌ಕ್‌ಚಿ!

ಪೇರೂರ್‌ರ ಪಾರು ಮೂಡಿ
 ಬೇಗೂರ್‌ರ ಬೋಜಿ ಮೂಡಿ
 ಪಾರಾಣೆರ ಪಾಲಿ ಮೂಡಿ
 ಓರಂದೆಡ್‌ತತ್!

ಬಾಲ್ ವಸ್ತ್ರ ನಾಡ್‌ಕಾರ
 ಸಾಲ ಮಾಡಿ ಬಂದ ತೊಂಡ
 ನಾಲ್ ಬುಕ್ಕ್ ಎಡ್‌ತ್ ಪುಡ್‌ಚಿ
 ಜೋಬ್ ತವುಡ್‌ಚಿ!

ನೋಟ್ ಕಾಸ್‌ನೆಲ್ಲ ಒಮ್ಮ
 ಕೂಟಿ ಕೂಟಿ ಲೆಕ್ಕ ಮಾಡಿ

ಕಾಸ್ ಪೋರಂದೆಣ್ಣಿ ತಜ್ಜ
ಬೇರಗೊಂಡತ್!

ಕಾಳೆ ತೆಡ್ ಬಡಿಪಕಾಚಿ
ಕರ್ತ ಮೋಡ ಕವುಂಜಿ ಪೋಚಿ
ಬಾಣದುಂಬ ಮಳೆಯು ಪೊಜ್ಜಿ
ಕೆತ್ತೆ ಮರ್ಂಜತ್!

ಮೂಂದ್ ಗಂಟೆ ಕಯಿಂಜಿತಾಚಿ
ನಾಲ್ ಗಂಟೆ ಕಡಂದೆಪೋಚಿ
ಮೇಜಿಲ್ಡಿಯ ಬುಕ್ಯಾಗುಡ್ಡೆ
ಪರತಿ ಪೋಚಿ !

ಬುಕ್ಯಾತೇರ ನೆಲಂದ್ ಪೋಚಿ
ಜನಳು ತೇರ ಪಿಂಗಿತಾಚಿ
ಮಾಳತೇರ ತೊಯಿಂಜಿ ಪೋಚಿ
ಮೇಳ ತೇಂದತ್ !

ತೊಯಿಂಜ ಬುಕ್ಯಾ ಕೋತಿಬಾತಿ
ಗೋಣಿಕ್ಟ್ವಾ ಮುರಾಕಿ ಕಟ್ಟಿ
ಪೊರ್ತ್ ಕೋಂದ್ ಕೋಂಬರೆ
ಮೂಲೆ ಕ್ಕಟ್ಟತ್!

* * * *



ಕಾಡಾನೆಯ ಪಾಡ್‌ಚಿ

(ಅವ್ಯನೂ ಕುಟ್ಟಿಯೂ)

ಕುಟ್ಟಿ:

ಲೋಕತ್ ಮಾನವ ಕೆಟ್ಟವನಲ್ಲೊ
 ಸತ್ಯ ನೀ ಎಣ್ಣವ್ವ|
 ಲೋಕತ್ ನೀತಿರ ಧರ್ಮತ್ ನರಿಯತ
 ಪಾಪಿಯೆ ನರನವ್ವಾ||

ದೇವಡ ಸೃಷ್ಟಿಲ್ ಜೀವಿಯಕೆಲ್ಲಾಂಗೂ
 ಬಾವಕ್ ಹಕ್ಕುಂಡ್|
 ನಂಗಡ ಕಾಡ್‌ಲ್ ನಂಗಳ ಕೊಲ್ಲುವ
 ಕೇಪಂವೊ ದಾರುಂಡ್?||

ಕಾಡ್‌ಲ್ ಬುದ್ಧಿತ್ ಮಾನವ ಚಿತ್ತಕ
 ಲಕ್ಷಲೋ ಪರಿಹಾರ|
 ಪಣತ್‌ರ ಆಶೆಲ್ ನಂಗಳ ಚದಿಪರೆ
 ನೀಚಂಡ ವ್ಯವಹಾರ||

ಕಾಡ್‌ನ ಮುಡ್‌ಚಿತ್, ತೋಡ್‌ನ
 ಒಣಕ್‌ಚಿ ಕೆಡ್‌ತ್‌ಚಿ ಪೊನ್ನಾಡ್|
 ತಿಂಬಕು ಕುಡಿಪಕು ಇಲ್ಲತೆ ಕಾಡ್‌ಲ್
 ಎನ್ನನೆ ಬಾವಡ್||

ಅಪ್ಪನ ಕೊಂದಿತ್ ಕೊಂಬ್‌ನ ಮಾರ್‌ನ
 ಕಳ್ಳನೆ ನರನಮ್ಮಾ||
 ಕಾಡ್‌ಲ್ ಕುಂಡ್ ತೋಡಿತ್ ಚದಿಲ್
 ಅಣ್ಣನ ಪುಡ್‌ಚತೋ ಅವನಮ್ಮಾ||

ಕಾಡ್‌ರ ಸುತ್ತೂ ತಂತಿನ ನೆಜ್ಜಿತ್
 ವಿದ್ಯುತ್ ಬುಟ್ಟಿತ್|
 ಅರಿಯತ ನಾಡ ಅಕ್ಕನು ಚೆತ್ತತ್
 ತಂತಿನ ತೊಟ್ಟಿತ್||

ನೈಪಕ್ ದಂಡ್ ಕೈಯ್ಯೂ ಇಂಜಿತ್
 ಕೈಯ್ಯತ ಉಂಬಂವೊ ಪುಂಡ|
 ಕಾಡ್‌ರ ಜಾತಿರ ತೋಲ್‌ನ ಮಾರಿತ್
 ಬಾಳ್‌ನ ನೀಸುವ ಬಂಡ||

ಆನೆನ ಕಂಡಕ 'ಗಣಪತಿ'ಂದೆಣ್ಣೆತ್
 ಬಾಂಗಿತ್ ತೊಪ್ಪ ಈ ದುಷ್ಟ|
 ಪರಿಸರ ಕೆಡ್‌ತಿತ್ ನಂಗಳ ಚದ್‌ಚಿತ್
 ಬಾಳುವ ಮಾನವ ಭ್ರಷ್ಟ||

ಕಾಡ್‌ಲ್ ತೊಪ್ಪಾ ತೋಡ್‌ಲ್ ನೀರ್
 ತಂದದೆ ದೇವವರ|
 ಭಾಷಣ ಮಾಡಿತ್ ಮಾನವ ಸಾರುವ
 "ಮುಡಿಕತಿರೋ ಪರಿಸರ||"

ಮನುಷ್ಯಂಗ್ ನಾಡ್ ಆನೆಕ್
 ಕಾಡ್‌ಂದೆಣ್ಣೆತ್ ತಿರ್‌ಚಿತ್|
 ನಾಡ್‌ನ ಮುಗ್ಗಿತ್ ಕಾಡ್‌ಕ್ ನುಗ್ಗುವ
 ನಂಗಳ ಬೊರ್‌ಟಿತ್||

ಚೊದ್‌ಲ್ ಮದ್ದಾನ ತೋಕ್‌ಲ್
 ಬುಟ್ಟಿತ್ ಕೆಡ್‌ತುವ ಪೋದತ್‌ನ|
 ಮುಂಡತೆ ಅಯಿನ ಖಂಡಿತ ಬುಡುಲೆ
 ನಂಗಳ ಮುಡಿ ಪವನ||

ಕಾಡ್‌ಕ್ ನುಗ್ಗುವೊ ಪರಿಸರ ವೈರಿನ
 ಒಡ್‌ಕಿತ್ ಆಡ್‌ಕಿರುವಿ|
 ಕಾಡ್‌ರ ಜಾತಿಯ ಬನಸಿರಿಕೆಲ್ಲಾ
 ನೆಮ್ಮದಿ ಕೊಡ್‌ತಾರುವಿ||

ತುಂಬಿ ಕೈಯಾಲ್ ತುರ್‌ಟಿತ್ ಅವನ
 ಪಾರೆಕ್ ಬಾಟಿರುವಿ|
 ಕಂಬ್ ಕಾಲ್‌ಲ್ ಚವಟಿತ್ ಅಂವಂಡ
 ಬಟ್ಟಿನ ಒಡ್‌ತಾರುವಿ||

ಕೋರೆಲ್ ಕುತ್ತಿತ್ ಕೆಲತ್‌ನ
 ಬಿರ್‌ಂಜಿತ್ ಕರ್‌ನಾ ಕಿನ್ನಿರುವಿ|
 ಪುಡಿಕತೆ ಅವ್ವಾ ತಡ್‌ಕತೆ ನನ್ನ
 ಚೊಕ್ಕನ ಅಡ್‌ಕಿರುವಿ||

ಅವೊ:

ದುಡ್‌ಕತೆ ಮೋನೆ ವೇದವೆ ಸಾರಿತ್
 ಗಾಂಧಿಯು ಪರಂದಿತ್|
 ಏಸುವು ಎಣ್ಣೆತ್ ಮಹಮ್ಮದ್
 ಪಾಡಿತ್"ತಾಳಿತ್ ಬಾಳೀ"ಂದ್||

ಅರಿಯತೆ ಮಾಡುವೊ ತಪ್ಪುಕ್
 ಎಂದೂ ದೇವಡ ಮಾಪುಂಡ್|
 ಆರ್‌ಂಜಿತ್ ಮಾಡುವೊ ತಪ್ಪುಕ್
 ಮಾತ್ರ ಪ್ರತಿಫಲ ಅದ್‌ಂಗುಂಡ್||

ಮಾನವ ಕೆಟ್ಟತೇಂದೆಣ್ಣೆತ್ ನಂಗಳು
 ಬಟ್ಟಿನ ತಪ್ಪಂಡ|
 ಮಾನವ ಬುದ್ಧಿನ ಪ್ರಾಣಿಯನಂಗ
 ಎಂದೂ ಪಡಿಕಂಡ||

ಗಾದಿರ ವಾಕ್ಯತ್ ವೇದವೆ ಅಡಂಗಿತ್
 ತಾಳಿತ್ ನೀ ನೋಟ್|
 ಉಪ್ಪಾನ ತಿಂದಂವೊ ನೀರಾನ
 ಕುಡಿಕುಲ ಕೇಳ್ ನೀ ಈ ಪಾಟ್||

ಮಂಡೆಕ್ ಬೂಕ್‌ನ ನೀರದ್ ಕಾಲ್‌ಕ್
 ಇಳ್‌ಂಜಿತ್ ಒಕ್ಕೂಲ|
 ಪರಿಸರ ಕೆಡ್‌ತನ ಮಾನವೊ ಬಯ್ಯ
 ಪಟ್ಟಣಿ ಬೂವುಲ||

ಮಳೆ ಬೊಳೆ ಇಲ್ಲತೆ ಮರುಭೂಮಿ
 ಯಾಕುಲ ಗೋಳ್‌ರ ಬಾಳಾಕು|
 ಪಟ್ಟಣಿ ಬುದ್ಧಿತ್ ಮಾನವ ಕುಲವೇ|
 ಮೂಡ್‌ಂಜಿತ್ ಪಾಳಾಕು||

* * * *



ಕೊಡಗೊರ ಕಥೆ - ಇಂದ್ ವ್ಯಥೆ

(1992ಲ್ ಎಳ್‌ದ್‌ನದ್)

ನಾಪದ್ ಕಾಲಕ್ ಬಯ್ಯ ನಡಂದೋರ್
ಆಪತ್‌ರಾ ಕಥೆ ಎಣ್ಣುವಿ ನಾ
ತ್‌ಪಕ್ ಮಾಡ್‌ಚಿ ಗೋಳ್‌ರ ಬಾಳ್‌ನ
ಮೂಪಂಗ ನಾಡ್ ಮುಡಿಯಂಗಳೊ|

ತೋಡ್‌ಲ್ ನಕ್ಕಿ ಕುಡ್‌ಚೋರ್ ನಾಯಿಕ್
ಕೇಡ್‌ಕುದ್ ಚೋರ್ ಬುದ್ಧಿಯದ್
ಪಾಕಡಕಳ್‌ಂಜಕ ಮುಜಿ‌ಕುಡಿಕಲು
ತ್‌ಕಲು ಒಮ್ಮೆ ಕೆ ದಾಹತ್‌ನ|

ಎಂದೆಣ್ಣೆತಾ ನಾಯಿ ಮುಜೆತ್ ನೋಟಣೆ
ಬಂದೆದ್ ಬಡ್‌ಚತ್ ಭೀಮತೆರೆ
ಬಂದಾಲೆ ಪೋಪೀಂದ್ ಏವಕಳಿಕಣೆ
ತಾಂದತ್ ಕುಂಡ್ ಪಾತಾಳತ್‌ಲ್|

ನಾಯಿರ ಬುದ್ಧಿರ ನಾಯಕಂಗೆಂಗಡ
ಆಯಿರ ಆಸೆನ ಬೆಚ್ಚಂಡಂದ್
ಚಾಯಿಲ್ ಬಾವಲುಂದೆಣ್ಣೆತ್ ಪಾಯಣೆ
ನಾಯಿರ ಬಾಳ್‌ಕ್ ಎತ್ತಿ ಪೋಚಿ|

ನೆಮ್ಮದಿ ಒಮ್ಮೆ ತಿಂಜಿತ್ ಬಾಳ್‌ನ
ಪೊಮ್ಮಾಲೆ ಕೊಡಗೊನ ಮುಳ್‌ಕೊಚದ
ಜಮ್ಮತ್ ಕೆಜ್ಜಿತ್ ನೇಡ್‌ನ ನಾಡ್‌ನ
ಒಮ್ಮೆ ಕೆ ಕೂಟ್‌ಚಿ ಮೈಸೂರ್‌ಕ್

ಪೂಣಚ್ಚ, ಮಲ್ಲಪ್ಪ, ಸೋಮಣ್ಣಂದೆಣ್ಣುವ
 ಜಾಣಂಗ ಮಿಂಞಾಕ್ ನಿಂದತಂದ್
 ಜಾಣಕ್ಕ ತನತ್‌ಲ್ ಕೂಟ್‌ಚಿ ಕೊಡಗ್‌ನ
 ಕಾಣತ ಕಾಡ್‌ಲ್ ಕೈ ಬುಟ್ಟಿತ್

"ಕೊಡವಡ ಕೊರುವೆಲ್ಲ ಅಡಕುವಿ"ಂದೆಣ್ಣಿತ್
 ದುಡ್‌ಕಿತ್ ಪರಂದಂವೊ ಸೋಮಣ್ಣನೆ
 "ಕೊಡವಡ ಕುಪ್ಪಿತ್ ನುತ್‌ಚಿರುವಿ"ಂದ್
 ಗುಡ್‌ಗ್‌ಚಿ ಮಲ್ಲಪ್ಪ ಮಾಸಭೆಲ್

ಕೇಟಿತು ಕೇಕತೆ ಮಂಡೆ ಕುಂಬ್‌ಟ್ಟಿತ್
 ಓಟ್‌ರ ಬೋಟೆಲ್ ಪೂಣಚ್ಚನೊ
 ತಾಟಕಿ ಗುಂವೊಂದ್ ನಾಟಕ ಕಳಚ್‌ತ್
 ಪಾರ ಪಡ್‌ಚ್‌ಲೆ ಕೊಡವಳಂದ್

ಬೊಳ್ಳಪ್ಪ, ಪೊನ್ನಪ್ಪ, ಉತ್ತಯ್ಯ, ತಿಮ್ಮಯ್ಯ
 ನಲ್ಲೋಣೆ ತಾಂಗ್‌ಚಿ ಉತ್ತಪ್ಪನೊ
 ಜಿಲ್ಲೆರ ಮಟ್ಟಕುಳ್‌ಪಂಡ್ ಕೊಡಗ್‌ನ
 ಎಲ್ಲಾರು ಪೋರಾಟ ಮಾಡನಾಂದ್

ಓಟ್‌ಕಾರ ಅಂದ್ ಮೋಸತ್‌ನರ್‌ಂಚ್‌ಲೆ
 ಕಾಟ್‌ಲೆ ದೇಶಾಭಿಮಾನತ್‌ನ
 ನೋಟತೆ ಮಿಂಞಾಕ್ ಬಪ್ಪೋರ್ ಪಾಡ್‌ನ
 ಕೂಟ್‌ಚಿ ಕೊಡಗ್‌ನ ಮೈಸೂರ್‌ಕ್

ತೆಳ್‌ನೀರ್ ದುಂಬ್‌ನ ಕೊಡ ಕೊಂಡ ಬಂದಿತ್
 ಪುಳು ಮುಯಿತ ಕೆರೆರೊಳ್ ತೊರ್‌ಂಜನಕೆ
 ಹಳಸ್‌ನ ಚಟ್ಟಿರ ಅಡಿಲುಳ್ಳ ಕಣ್ಣಿಕ್
 ಕಳಮೆರ ಕೂಳ್‌ನ ಇಟ್ಟಿನ್ನಕೆ|

ಕೊಡಗಾರ ನೆಮ್ಮದಿ ಒಮ್ಮೆ ಕೆಟ್ಟಿತ್
 ಕೊಡವಾಮೆ ಕುಡ್‌ಂಗ್‌ಚಿ ಮೋಸತ್‌ಲ್
 ಬಡುವಡ ಚಿಂಡ್‌ಲ್ ಕೊಡವಾಮೆ ಮೇಂಗಣೆ
 ಕೆಡ್‌ತ್‌ಚಿ ಕೊಡಗಾರ ನಲ್ಲಾಮೆನ|

ಕಳ್ಳರು ಕಾಕರು ಬಂತಿಲ್ಲಿ ಮೊಳ್‌ತತ್
 ದಳ್ಳಾಳಿ ಪಡೆ ಬಂದ್ ಎಡೆ ಮೇಂಗ್‌ಚಿ
 ಕೊಲ್ಲ ಕೊಲೆಗಾರ ಕೊರವು ನಡ್‌ತ್‌ಚಿ
 ಇಲ್ಲತ ಕೇತರೆ ಕಾಂಬಕಾಚಿ|

ಮರಕಾಡ್ ಬೊಳಿಯಾಚಿ ಮಾಕುಟ ದಾಟ್‌ಚಿ
 ಸರಕಾರಿ ಕಾನೂನ್ ಸಡಲ ಆಚಿ
 ಪರನಾಡ್ ಕಾರಡ ಪಡೆ ಬಂದ್ ಕೂಡಣೆ
 ಬರಡಾಚಿ ಬರಬಾತ್ ಈ ನಾಡ್‌ಲ್

ಪುಂಡಂಗ ಪೆರ್‌ತಿತ್ ಪುಂಡ್ ನಡ್‌ತುವ
 ಭಂಡ ಸರಕಾರ ತಿಂಬ್‌ಗೊಂಡ್
 ಕಂಡಾನ ಕೇಟಕ ಮಂಡೆನ ಕೆತ್ತಿತ್
 ಮುಂಡ್ ತೆಕ್ಕಿಯುಂಡ್ ಓಡಿ ಪೋಪ|

ಕಂಜಿನ ನಕ್ಕಿತ್ ಬೊಳಂದೋರ್ ನಾಯಿಯ
 ಎಂಬಿರ ಚೋದ್‌ಕ್ ಬುದ್ಧನ್ನಕೆ
 ಲಂಚ ಪೆರ್‌ತತ್ ಸರಕಾರಿ ಸೇವೆಲ್
 ವಂಚನೆ ದುಂಬ್‌ಚಿ ಊರೂರ್‌ಲ್

ದಂದಾಧಿಕಾರಿಯ ಮಂಡೆ ಪುಡಿಪಲ
 ಕಂದಾಯಧಿಕಾರಿ ಉಂಡ್ ಪೋಪ
 ನ್ಯಾಯಾಧಿಕಾರಿಯ ಅನ್ಯಾಯ ಪೋತುವ
 ಕಾಡಾಧಿಕಾರಿಯ ಮುಡಿಪ ಕಾಡ್|

ನೋಟಾರ ಕೆಟ್ಟನ ಜೋಬ್‌ಕ್‌ಟ್ವಲೇಂಗಿ
 ಬಾಟಿತ್ ಕೊಲ್ಲುವ ಪೋಲೀಸ್‌ಲ್
 ಕಟ್ಟೋಳೆ, ಕಂಬೆಲ್ಲ ಕೈನ್‌ಟಿ ಕೇಪಲ
 ನೋಟಿತ್ ಈ ಪಾಟಿ ಗೋಳ್‌ನೆಲ್ಲ

ಪಂಡೇತ ನೆಮ್ಮದಿ ನೀತಿ ನಡೆಪ್‌ಲ್
 ನಂದಾಕಿ ಕೊಡಗ್‌ನ ಪೊಲತುವಕ್
 ಒಂದಾಯಿ ತಾಂಗಿತ್ ನಿಂದಿತ್ ಬಂಬಂಗ
 ಏಕೀಕರಣತ ರಂಗತ್‌ಲ್

ಅಮ್ಮ ಕೊಡವರು ಐರಿಕೆಂಬಟ್ಟಿಯ
 ಜಮ್ಮ ಮಾಪಳೆಯ ಕೋಯವರು
 ಗೌಡ ಮಡಿವಾಳ ಹೆಗ್ಗಡೆಗೊಲ್ಲರು
 ಕುಡಿಯ ಕುರುಬರು ಬಂದ್‌ಗೂಡಿ

ಬಣ್ಣ ಪಣಿಕರು ಮೇದ ಮಲಿಯರು
 ಕೊಡವ ನಾಯರಳು ಒಂದ್‌ಗೂಡಿ
 ಬೆಂಬಲ ನಿಂದೊಳಿ ಲಿಂಗಾಯಿತೆಲ್ಲ
 ಕೊಡಗ್‌ರ ಮೂಲ ನಿವಾಸಿಯೆಲ್ಲ

ಕಾಟತಿ ಜಾತಿರ ಭಿನ್ನಭೇದತನ
 ಏಕೀಕರಣ ರಂಗತ್‌ಲ್
 ಕೂಟ್ ಕೂಡಿತೆಂಗ ಅನ್ಯಾಯ ಅಡಕಿತ್
 ಕಾಟಿ ಕೊಡ್‌ಕನ ನೆಮ್ಮದಿನ

* * * *



ಕೊಡವ ಪ್ರಾರ್ಥನೆ

[ರಾಗ. ಸ್ವಾಮಿ ದೇವನೆ ಲೋಕಪಾಲನೆ ಸಭೆಲ್ ಪ್ರಾರ್ಥನೆಕ್ ಸುರೂತಾರ 14 ಗೆರ ಪಾಡ್‌ನಕ ಮದಿ]

ಒಕ್ಕ ಪೆರಿಯೊನೆ ಗುರುವೆಕಾರೋಣ ನಿನ್ನ ತೊತ್ತಿತ್ ಬಾಂಗುವ
 ಸ್ವರ್ಗವಾಸ್ಕಡ ಆತ್ಮಸ್ಥಾನವೊ ಕೈಮಡತ್‌ಲು ಬೋಡುವ ||ಪ||
 ಉಂಬ ಕುಡಿಪಕ ಮೀದಿಬೆಚ್ಚಿತ್, ಗುರುನ ಎಕ್ಕೊಲು ತೊತ್ತವ
 ಕೆಂಬಲಚಿರ ಕನ್ನಿಕಂಬ್‌ಕ್ ನೆತ್ತಿನೊತ್ತಿತ್ ನೇಂದವ.
 ಜಮ್ಮ ಮಣ್ಣೊನ ಉತ್ತ ಕಳತಂಡ್ ನೈಚಿ ನೇಡಿತ್ ಉಂಡವ
 ಕನ್ನಿ ಕೋಂಬರೆತಳಿಯ ಬೊಳಕ್‌ಲ್ ಕತ್ತಿ ತೋಕ್‌ನೋ ಪೂಜ್ಯವ
 ಮುಂದ್ ಬಾಡೆರ ಪೊಂಬೊಳಕದ್ ಎಲಂಗಿ ಕತ್ತಡ್ ತಿದ್ದುವ
 ನಂಗ ನಡಪೊರ್ ಇರ್‌ಟ್ ಬಟ್ಟೆಕ್ ಬೂಟಿ ತೂಡ್‌ನಿ ಮಾಗುರು-
 ಆಯಿತೆಗಳ ನಲ್ಲ ಬಟ್ಟೆಲ್ ಕೈಪುಡ್‌ಚಂಡ್ ನಡ್‌ತಿಯ
 ಎಂಗ ಭೂಮಿಲ್ ಬೊಳೆಂದ್ ಆನಕ ಬೇಲಿಯೆ ಗುರು ಕಾರೋಣ
 ಅತ್ತ ಕಡ್‌ಚ್ಚಕು ಬಿತ್ತ್ ಬೊಳೆಕೆಲ್ಲ ಕಾತ್‌ರಕ್ಷಣೆ ನಿಂದಿತ್
 ಬಾಯಿ ನಾವ್‌ಕು ಬಲತೆ ಕೈಯ್‌ಕು ಉದಿಪು ಮದಿಪುನ ತಂದಿತ್
 ಎತ್ತ್ ಪೊನಕೊ ಸತ್ಯಗತ್ತಲ್ ನಡ್‌ಪ ಬಟ್ಟೆನ ಕಾಟಿತ್
 ಕಟ್ಟಾಲಜ್ಜನೋ ತೊಟ್ಟ್‌ಕುಂಞಿನೋ ಕಾತ್ ಪೊಲತಿಯ ಮಾಗುರು
 ಶೂರ ಬೀರಂಗ ಪುಟ್ಟಿ ಬಾವಡ್ ಕೊಡಗ್‌ಕಾಯಿತ್ ನೈಕಡ್
 ವೀರ ಕನ್ನಿಯ ಪರಂದ್ ಕೊಡಗ್‌ಲ್ ಪೊಂಗ ಕೇಳಿಯು ಪೆರ್‌ಕಡ್
 ಎಲ್ಲ ದೇವಕು ಮೂತ ದೇವತೆ ಎಂಗಡವ್ವಂಗ್ ತೊಕ್ಕನ
 ಬೀರ ಕೊಡವಳ ಪೆತ್ತ ಅವ್ವಂಗ ಭೂಮಿ ದೇವ್‌ಕು ತೊಕ್ಕನ
 ನೂರ್ ದೇವಕ್ ಮೀರ್‌ನ ಬಲ ತಪ್ಪ ಕಾರೋಣ ತೊಪ್ಪಿನೊ
 ಮುಂದ್‌ಲೋಕತ ದೇವಗಣತ್‌ಲ್ ಕೊಡವ ಕಾರೋಣ ಪೆರಿಯೊನ್.
 ನೂರ್ ದೇವಕ್ ಮೀರ್‌ನ ಗುರು ಕಾರೋಣಜ್ಜಂಗ್ ತೊತ್ತವಿ
 ಕೋಟಿ ದೇವಕು ಜನ್ಮದಾತನ್ ಗುರುವೆಕಾರೋಣ ತೊತ್ತವ.

* * * *

ಪಾರಾಣೆ

(26.10.2001 ಲ್ ಪಾರಾಣೆ ಸಮಾರಂಭಕ್ ಪೋನ. 26.6.1953 ಲ್ ಆದ್ಯ
ಪಾರಾಣೆಲ್ ಚಾಕ್ರಿಕ್ ಕೂಡ್‌ನ ದಿನ ಗೇನಾಯಿತ್ ಎಳೊದ್‌ನದ್)

ಚಾಕ್ರಿಕ್ ಆದ್ಯ ಮೊಟ್ಟ್ ಬಾಣೆ ಅದೇ ಈ ಪಾರಾಣೆ

ಆನಗುಂಡೇ ನಾಕ್ ಗೇನಾಪ ಮಾಣೆ

ಈ ತಕ್ ನೇರ್ ನಾಡ ನಾವುರಾಣೆ

ಕೊಡಗ್‌ರ ನಡುಕಂಡ ಕಡಿಯತ್ ನಾಡ್.

ಕೊಡವಾಮನ ಪೋತಿ ಬೊಳತ್‌ನ ಗೂಡ್

ಟಿಪ್ಪುರ ಸದ್ದಡಕ್‌ನ ಮಲೆ ತಿರಿಕೆ ಕಾಡ್

ಲೋಕತ್‌ರ ಕಳಿಪರಂಬ್‌ಲೂ ಇಯಂಡದೇ ಜಾಡ್.

ಅಪ್ಪರಿಪ್ಪರ ನಡಂದ್ ನೋಟ್.

ಕವಿ ಅಪ್ಪಚ್ಚ ನಡಂದ ಮೊಟ್ಟ್

ಪಟ್ಟೋಲೆ ಚಿಣ್ಣಪ್ಪನ ಜೂಕ್‌ನ ತೊಟ್ಟ್

ಪಡೆಯಾಳಿಯಡ ಜೂಕ್‌ಕಟ್ಟ್

ಆಲ್‌ಚಿಟ್ಟ್ ನಿಲ್ ಕೆಮಿ ತಾಂಗಿ ಕೇಟ್

ಅದ ಕೇಪ ಪಾಲಂದಿರಜ್ಜಂಡ ದುಡಿಕೊಟ್ಟ್

ಪಾಡೆಯಂಡಜ್ಜಂಡ ಬಾಳೊ ಪಾಟ್!

ಹಳ್ಳಿಂಜಿ ಡೆಲ್ಲಿಕೆತ್ತನ ಆಟ್‌ಂಬಾಟ್

ಆಟ್ ಓಟ್‌ರ ನಮ್ಮೆ ಪಾಟ್‌ಪಳಮೆರ ಕೊಮ್ಮೆ

ಅಂಜಿ ನಾಡ್‌ರ ಒತ್ತೊರ್ಮೆ

ನಾಡ್ ಪೋತುವವಳೆ ಭದ್ರಕಾಳಿಯಮ್ಮೆ

* * * *

ಪಾಪ, ನೋಟುವಕ್ ತಾಂಡವ ದಾರೂ ಇಲ್ಲೆ
 ಲೋಕ ಬುಟ್ತ್ ಪೋನ ಪೋಣ್ಣ ತಿರಿತ್ ಬಪ್ಪಲೆ
 ಪೆತ್ತ ಮಕ್ಕಳುಂಡ್ ಎಲ್ಲಿಂದ್ ಗೊತ್ತಿಲ್ಲೆ
 ಕೂಡೇ ಉಳ್ಳ ಮೋವಂಗ್ ಕೊಡವ ತಕ್ಕೂ ಗೊತ್ತಿಲ್ಲೆ|

ಮನೆದುಂಬ ಪುಸ್ತಕ ಅಳಪಕೂ ಇಲ್ಲೆ ಎಡೆ
 ಅಚ್ಚ್ ಮಾಡತೆ ಬೆಚ್ಚ ಪುಸ್ತಕತಾರದೇ ಪಡೆ
 ತಡಿಬತ್ತಿ ಪೋನದೇ ಇದ್‌ಂಗೆಲ್ಲ ತಡೆ
 ಹಾ! ಪೋಯಿ ನೋಟೊಮ್ಮ ಇದೇ ಕವಿರ ದಿನಕಡೆ

ತುದ್‌ಚಿ ಪಾಡ್‌ಚಿ ಮಲೆನಾಡ್ ಮರೆನಾಡ್
 ಇಂದೊಮ್ಮ ನೋಟಿ ಮಹಾಕವಿರ ಪಾಡ್
 ಚೆರ್ ಕವಿಯ ಪುಡ್‌ಚದೆ ಈ ಕವಿರ ಜಾಡ್
 ಓದಿ ನೋಟೊಮ್ಮ ಮುತ್ತಣ್ಣಂಡ ಕವಿತೆರ ಚೋದ್

* * * *

ಕಾಪಿ-ಕಾಪಿ

(ಪ್ರೇಮ ಪಿಶಾಚಿಗಳು ಟಿ.ವಿ.ಸೀರಿಯಲ್‌ರ "ಲವ್, ಲವ್,
 ಲವ್, ಲವ್, ಲವ್, ಲವ್, ಪಾಟ್‌ರ ರಾಗತ್‌ಲ್ ಪಾಡಿ)

ಕಾಪಿ ಕಾಪಿ ಕಾಪಿ ಕಾಪಿ ಕಾಪೀ ಕಾಪೀ
 ಕಾಪಿ ತೋಟ ನಂಬಿತಾನ ಪಾಪೀ ಪಾಪಿ
 ಕಾರ್ ತೋಟ ಮನೆ ಮಠ ಮಾರೀ ಪೋಪಿ
 ಬ್ಯಾಂಕ್ ಕಾರಕ್‌ಟ್ತ್ ಕೊಡ್‌ಪಿ ಕೀತ್ ತೊಪ್ಪಿ.....!
 ತೋಟಮಾರಿ ಪಾದಿ ಸಾಲ ತೋಪೀ ತೋಪೀ
 ಸಾಲ ಪೆರ್ತ್ ಊರ್ ಬುಟ್ತ್ ಓಡೀ ಪೋಪಿ
 ಮೆರವಣಿಗೆ ಪೋಕ ಜನಳ ಕಾಕೀ ಕೂಟಿ
 ಕೇಕ ನಂಗ ಎಲ್ಲ ಕೂಡಿ ಸಾಲಾ ಮಾಫಿ
 ಸಾಲ ಪೆರ್ತ್ ದಿವಾಳಿ ಕೋರ ಆಪೀ ಆಪಿ
 ಕೂಲಿಕಾರ ಆಳ ಮಾತ್ರ ಹ್ಯಾಪಿ ಹ್ಯಾಪೀ ||ಕಾಪಿ||

ಕುರ್‌ಟ್ ಇಾಯ !!!

(ಅರೆಗನ್ನಡತಾರ ಓರ್ ಗಾದೆರ ಆಧಾರತ್‌ಲ್ ಎಳ್‌ದಾನ್ ಕವನ)

ಕೊಡವಕಾರ ಕೂಡಿಯಂಡ್
ತೋಕ್ ಬೋಟೆ ಪೋಕನಾಂದ್
ಕೇಪು ತೋಕ್ ನೆರತಂಡಂದ್
ಪೊರಟೇ ಪೋಚಿ|

ಕೊಚ್ಚೆ ಕಾಡ್ ತೇಡಿ ಸುತ್ತಿ
ಜಾತಿಯೊಂದು ಕಾಣತಾಚಿ
ಕೊರಿಯಂಗೊಂದ್ ಕೊಡವಬೆಚ್ಚಿ
ಬೋಣೇ ಮಾಡ್ಚಿ|

ಕುಂದ್ ಬರೆನ ಪತ್ತುವಕ
ಕೋರೆ ಪಂದಿ ಎದ್‌ಕೆ ಬಂದ್
ಬೊರ್‌ಂಡ ಪಂದಿ ನೋಟಿಯಂಡ್
ನಿಂದೇ ಪೋಚಿ|

ನಿಪ್ಪುಂಜೆಡ್‌ತ ತೋಕ್‌ನೋಟಿ
ಕಾಕ ತೋಕ್ ಕೊತ್‌ಚಿರಣೆ
ಕಾಳೆ ಪಂದಿ ದುಂಡ್‌ಕುತ್ತಿ
ಮರ್‌ಂಚೇ ಪೋಚಿ|

ಕುಂದ್ ಕೊಡಿಕ್ ಪತ್ತಿನಿಂದ್
ಅತ್ತು ಇತ್ತು ನೋಟಣೆಕ್
ಕೊಂಬ ಕಡಮ ಮಂಡೆ ನೇತಿ
ನಿಂದ್‌ಲೆ ನೋಟ್ಚಿ|

ಕೊಡವ ಬೆಚ್ಚ ಉಂಡೆ ತೆರತ್
ಕಡಮ ಅರಂದ್ ಮರಂಜಿ ಬಂದ್
ಉರ್‌ಂಡಿ ಬುದ್ಧ್ ಕಾಲ್‌ರಡಿಲ್
ಚತ್ತೇ ಪೋಚಿ|

ಜಾತಿ ಮೂಂದ್ ಬೋಟಿಯಾಚಿ
 ಎರ್ಚಿ ಪಾಲ್ ಮಾಡುವಕ
 ಕೊಡವಂಡೋರ್ ಕುರ್‌ಟ್ ಇಾಯ
 ಪರಂದೇ ಪೋಚಿ|

ಪಂದಿ ಮಾಪಳೆ ತಿಂಬಾಲೆಲ
 ಕಡ್‌ಮನ ನಾ ಕೊಡ್‌ಪಾಲೆಲ
 ಕೊರಿಯ ನೊಂದ್ ತರ್‌ಚಿಮುರ್‌ಚಿ
 ಪಾಲ್ ಮಾಡ್ಚಿ|

ತೋಕ್ ಬಟ್ತ್ ಪಾಲ್ ಒಂದ್
 ಕೊಡವಂಗೊಂದ್ ಕಾಕಂಗೊಂದ್
 ಮೂಂದ್ ಪಾಲ್ ತಿರ್‌ಚಿ ಬೆಚ್ಚಿ
 ತರ್‌ಪಾ ಪೋಚಿ|

ಕೊಡವೊ ಪರಂದ ಕುರ್‌ಟ್ ಇಾಯ
 ಕೇಟ್‌ಕಾಕ ಎಪ್ಪೆಯಾಚಿ
 ನಾಕ್ ಎರ್ಚಿ ಬೋಂಡಂದೆಣ್ಣೆ
 ಪೊರಟೇ ಪೋಚಿ|

ಎಪ್ಪೆಯಾನ ಕಾಕ ಅಂದ್
 ಕಣ್ಣ್ ನೀರ್ ತ್‌ಟಿಯಂಡ್
 ಬೋಟಿಕಿಂಞಿ ಪೋಪಾಲೆಂದ್
 ಆಣೇ ಮಾಡ್ಚಿ|

ಗೆದ್ದ ನಾನ್‌ಂದೆಣ್ಣೆಯಂಡ್
 ಜಾತಿ ಮೂಂದ್ ನೇತಿಯಂಡ್
 ಎರ್ಚಿನೆಲ್ಲ ಬೆದ್‌ಕೆಲ್‌ಟ್ತ್
 ಒಣಕೀ ತಾಚಿ|

ಐಪಣೆಲು ಬೊಳೆಪಣೆಲೂ
 ಒಣಕ್ ಎರ್ಚಿ ಕರಿಬೆಚ್ಚಿ
 ಕಾಲ ಇಡೀ ಕೊಡವ ತಾನ್
 ನಮ್ಮೇ ಮಾಡ್ಚಿ||

ತಮ್ಮಾವಂಗ್ ತಕ್ಕಾರ

(ವಿಕ್ರಂ ಅಪ್ಪಣ್ಣ ಅಮೆರಿಕಾ ಪೋಪಾಕ್ ಜಮ್ಮಡ ಮುತ್ತಣ್ಣ ಕೆನಡಾತ್‌ಂಜೆ
ತಮ್ಮಾವಂಗ್ ತಕ್ಕಾರ ಬಯಂದವದಾ)

ಕಡ ಏಳ್ ದಾಟಿಯಂಡ್ ಪಾರಿ ಬಾ ಮಾಂವ
ಕೊಡವಡಾ ಸುಖ ದುಃಖ ಅಳತ್ ಪರಿಯನ ಬಾ
ಚತ್ತೆ ಪಟ್ಟಿನ ಓದಿ ಕೆಟ್ಟೆಡ್‌ತ ಬಾ
ಮುತ್ತಾ ಕೊಡಗ್‌ರ ಸೊತ್ತಾ ಆಂಜೆಡ್‌ತ ಬಾ

ಕಾವೇರಿ ತೀರ್ಥತ್‌ರ ಕುಪ್ಪಿಯೊಂದಿರಡ್
ಇಗ್ಗತ್ತಪ್ಪಂಡ ಚಾಂದ್ ಕುರಿ ತೊಟ್ಟಾಡುವಕಿರಡ್
ಜಮ್ಮ ಭೂಮಿರ ಓರ್ ಪುಡಿ ಸಣ್ಣಕ್ಕಿ ಬರಡ್
ಅವ್ವಯ್ಯಂಡ ಬರ್‌ತ ಪುಟ್ಟೋರ್ ತುರ್‌ಟಿರಡ್

ಪಿಟ್ಟು ತಾತಂಡ ತಕ್ಕಾ ಟೇಪ್ ಮಾಡ್‌ನದಿರಡ್
ಗಂಗಿ ಅವ್ವನು ನಾಲ್ ಕೊದಿ ಮುತ್ತತ್ತರಡ್
ಕುಂಞಪ್ಪಂಗ ತಪ್ಪೋರ್ ಕಳಿಂಬ ನೀಕೇಟ
ಜಮ್ಮಡೊಕ್ಕಡ ಕಾರೊಣಂಡ ದಯಬೋಡಿತ್ತೆಡ್‌ತ

ಕೊಡಗ್‌ರ ಕಲತೇನ್ ಅರೆಕುಪ್ಪಿ ಬೋಂಡು
ಮೀಂಗರಿಕ್ ಪುಳಿನೀರ್ ಎಡ್‌ತ್ ನೀಬರಂಡು
ಪಾಯಿಸಕ್ ಓರ್ ಪುಡಿ ಯಾಲವೂ ಬೋಂಡು
ಕಾಚಿ ಕುಡಿಪಕ್ ಕಾಪಿ ಪೊಡಿ ಕೂಟ್‌ಕು ಆಂಡು

ಕೆಮ್ಮಟಕ್ ನಲ್ಲಮಳು ಕುರು ಚೆನ್ನಂಗಿರಂಡು
ಕೃಷ್ಣಸ್ವಾಮಿರ ಪಾಂಗೊಳ ನಾಕೊಂದ್ ಬೋಂಡು
ಕೊಡಗ್‌ರಾ ಪಣ್ಣಾಪುಳಿ ನಾಲಂಜಿ ತರಂಡು
ಕೊಡವ ತಕ್ಕೇ ನೀನ್ ಪರಂದಂಡ್ ಬರಂಡು
ಬಪ್ಪ ಬಟ್ಟೆಕ್ ದೇವಡ ದಯ ಮಾತ್ರ ಇರಂಡು.

ನಾ ದಾರ್ ಎಣ್ಣೆ

1. ಎಟ್ತ್ ಪೆದಕಾರ ನಾನ್ ಬಾರಿ ಗಟ್ಟಿಗ
ನೆಟ್ಟಿ ಪೋಚಿ ಲೋಕ ನಾಡ ಕೇಳಿ ಕೇಟಿತ್
ಪೊಟ್ತ್ ಕಣ್ಣ ಕುಪ್ಪಿ ಗೋಲಿಂದೆಲ್ಲ ಎಣ್ಣೆಚಿ
ಕಟ್ಲಜ್ಜ ತೊಟ್ತ್ ಕುಂಞಿ ನನ್ನ ಕಂಡತ್
ಕಾಡ್ ನಾಡ್ಲೆಲ್ಲ ಕೂಡಿ ನನ್ನ ತೇಡ್ಚಿ
ಪಾಟ್ ಪೊಟ್ಟಿ ನೋಟ್ ಪೊಟ್ಟಿಲೆಲ್ಲ ಕಾಟ್ಚಿ
ಪತ್ತಾ ಲಕ್ಷ ಕೊಟ್ಟುಂದೆಣ್ಣೆ ತೇಡಿ ಕೂಟ್ಚಿ
ಬೋಟಿ ಕೂಡಿ ತೇಡಿ ನಾಡ ಚಾವು ಪೋರ್ಚಿ!
2. ಕಾಡ್ ಮುಡ್ಚಿತ್ ನಾನ್ ನೇಡ್ನದ್ ನೇರೆ
ಕಾಡಾನೆ ಕೊಂಬ್ನ ಮಾರ್ನದು ನೇರೆ
ಪಾದಿ ಓದಿಯದ್ ಮಂತ್ರಿಯಕ್ ಮೀದಿ
ಪಾದಿರಾ ಪಾದಿ ಕಾಡಧಿಕಾರಿಯಕ್ ಚಾಡಿ
ತೇಡಿ ಬಂದಯಿನ ಬೊಡಿಬೆಚ್ಚಿ ಕೊಂದ
ಸಿನೆಮಸ್ಸಾರ್ನ ಈತ್ ಪೋನನಾನಾಂಜಿ
ಬುಡ್ಗಡೆಕ್ ಕೊಟ್ಟೆಚೆದ ಕೋಟಿ ಪದ್ನಂಜಿ!
ಮಾಜಿ ಮಂತ್ರನೊ ಕೆಟ್ಟಿ ಪೋರ್ತಂಡೆ ಪೋನ
ಪಣತರತ ಚೆಡಿಲಂದ್ ಕೊಲೆಗಾರ ನಾನ!
ಕಾಡ್ಗೂಡ್ಂಜಿ ಪಾಂಜಿ ನಾಡ್ಕೆ ಬಂದ
ಕಾಡ್ ಬೂಡ್ಲ್ ತೇಡಿ ಕಳಿಪದಾ ಇಂದ್
ಗೋಡೆಲದ ನೆಳಕಂಡ್ ಪುಡಿಪಕೋಂದ್
ನಾಡೆಂಜಿ ನಕ್ಕನ ನಾಯಿಯಲೆ ಕೂಡಿ
ದಾಡ ಕಣ್ಣೊ ಕೂ ನಾನ್ ಬೂವತೇ ಮಾಡಿ
ನಾಡ ಕೇಳಿನ ಟೀವಿ ಸಿನೆಮತ್ತು ಪಾದಿ
ಜೋಡಿ ಸರಕಾರತ್ ನಾಕೆನ್ನ ಪೋಡಿ?

3. ಕರಿ ಮೂಡ್ ಕಿರಿ ಬಣ್ಣಂದೆಣ್ಣೆ ತೆನ್ನ
 ನರಿ ಪಡೆರ ಕೂಟಾಳಿಂದೆಣ್ಣೆ ತೆನ್ನ
 ತರ ತರತ ಬಲೆ ಬೀಜಿ ಪುಡಿಪಕೆನ್ನ
 ವರಕೂಣ್ ಬುಟ್ಟಿತ್ ತೇಡ್ ಚೆನ್ನ
 ನಾಡ ನೆಲೆ ಜಾಡ್ ನ ಅರ್ಂಜವಿಲ್ಲೆ
 ನಾಡ ನೆಲ ಪಾಚತ್ ನ ಕಂಡವಿಲ್ಲೆ
 ಜಾಡ್ ಕಾಣತ ಮೀನ್ ಕಡತ್ ನಾನ್
 ತೇಡಿ ಪೋಯಿರ ನಿಂಗ ಪೊಡತ್ ನೆಲ್ಲ!
 ಕಂಡ ಚಾವುನ ಪೊರ್ತ್ ಕೊಂಡ್ ಪೋಚಿ
 "ತಿಂದ್ ಚತ್ತತ್ ಮದ್ದ್"ಂದೆಣ್ಣೆ ತಾಚಿ
 ಹೊಂದುವದ ಕಿರಿ ಮೂಡ್ ಎಂದೆಣ್ಣೆ ನೀಸಿ
 ಮಂಡೆ ಕತ್ತಿತ್ ಭಾರ ನೀಕಿತಾಚಿ
4. ಕಿರಿ ತಿರಿತ್ ಕಂಡಕಲು ಕೀರಿ ನಾನಲ್ಲ
 ಇರ್ ಟ್ ಕೂಡ್ ನ ಮೂಡ್ ನರಿ ಮಾತ್ರ ಅಲ್ಲ
 ಕರ್ ಪ್ ಕನ್ನಡಿಕಾರ ಸಿನಿಮಾಸ್ವಾರಲ್ಲ
 ಕುರ್ಂಜಿ ಕಾಡ್ ರ ಮಂಡೆ ಕುರ್ ಬನಲ್ಲ
 ಪಚ್ಚಿ ಪರಿಯುವ ತಕ್ಕ ನೊಳ್ ಚಿ ಕೇಟದ್ ನೇರ್
 ಅಚ್ಚ ಬೆರಿಯ ಡೆಲ್ಲಿಕ್ ಕೊಡ್ ತತ್ ದೂರ್
 ಕುರ್ ಚಿಲಳಪಕ್ ಎಲ್ಲ ಪೋತತದ ಪೋರ್
 ಮಚ್ಚರತ ಜನಕೂಡಿ ಬಲಿಪೇಡಬೇರ್
5. ಪುಟ್ಟಿ ಬೊಳಂದ ನಾ ಕೊಡಗ್ ಲೇ ನೇರ್
 ಕುಡ್ ಚಿ ಪೊಲಂದ ನಾ ಕಾವೇರಿ ನೀರ್
 ಬುಟ್ಟ್ ಕೊಡಗ್ ನಾ ಪಟ್ಟಣಕ್ ಸೇರಿ
 ಅಲ್ಂಜವ್ವರ ನಾ ಪೊರದೇಶ ಪಾರಿ
 ಪೊಣ್ಣ್ ಕುಲತ್ ಲ್ ನಾ ಮಿಂಞ ಐ.ಎ.ಎಸ್. ಮಾಡಿ
 ದೇಶ ವಿದೇಶತ್ ಲ್ ಕೇಳಿ ನಾ ನೇಡಿ

ರಾಜಧಾನಿಲೆ ಭಾರಿ ಜಾಗ ನಾ ತೇಡಿ
 ಪುಟ್ಟನ ಊರ್ಂಜಿ ದೂರ ನಾ ಕೂಡಿ
 ತೇಡಿ ಬಾತಲ್ಲಿ ಕೊಡವ ನೆಲದಾನ ಬೋಡಿ
 ತಕ್ಕಲೇ ಅಯಿಚ ನಾ ಸಮಧಾನ ಮಾಡಿ
 ಪರಧರ್ಮ ಸಂಘಕ್ ನೆಲದಾನ ಕೊಡ್ತ
 ತಾಯ್ನಾಡ್ ತಾಮನೆನ ನಾಮರಂದ್‌ಟ!

6. ಬಿರ್ಚಿ ಮಂಡಲೆ ತಿರುವಿ ನೀರ್‌ಕ್‌ಳ್‌ಂಜವಳಲ್ಲ
 ಕೈ ಬೀಜಿ ನಡಪದದ್ ಮಾಲೆ ಪೊಯ್ತಲ್ಲ
 ಅಂಗೈನ ಆಟುವದ್ ಕ್‌ಡ್‌ಕೆ ತ್‌ಟುವಕಲ್ಲ
 ಎಳ್‌ದಿ ತಂದಾ ನೋದಿರುವಿ ಸ್ವಂತ ಬುದ್ಧಿರದಲ್ಲ
 ನೆರಿ ಬಯ್ಯ ಜನಸಾಲ್ ಜೋಗಿ ಕಿಂದರಿಯಲ್ಲ
 ಕೊರಿ ಕುಟ್ಟಿಯ ಕೂಡಿಯಂಡ್ ಪಟ್ಟ ಕೆಟ್ಟಿರ್‌ತಲ್ಲ
 ದಂಡ್ ದೇಶತ್‌ರೆಡೆಲ್ ಎಣೆ ಗೊಡ್ಡಿಯಲ್ಲಾ?
 ನಾ ದಾರ್‌ಂದೆಣ್ಣೆ ಟಕ ಬಹುಮಾನ ಎಲ್ಲಾ!

ಶಬ್ದಾರ್ಥ:-

ನೀರ್‌ಕ್‌ಳ್‌= ಚಾವುಕ್ರಿಯೆ, ಮಾಲೆ ಪೊಯ್ತ=ಚಾವುರ ಪದ್ಧತಿ

6. ಸೂನಿಯಾ ಗಾಂಧಿ

5. ಕೀಳಿ ಪಟ್ಟೋರ್ ಕೂಡಪತಿ

4. ಬಂಗಾರಪ್ಪ

3. ರಾಜಪಗಾಂಧಿರ ಕೊಡಲ್ ಭಾಗಿಯಾನ (ಪುನಪ ಬಾಂಬ್) ಶುಭ

2. ಕಾಣ್‌ಗಟ್ಟಿ ಎರಪ್ಪನ್

1. ರಾಜಪಗಾಂಧಿರ ಕೊಡಲ್ ಶಿವರಸನ್

* * * *

ಕೊರ್ ಮೋವಂಗ್

(ಕೆನಡಾ ದೇಶತುಳ್ಯ ಕೊರ್ ಮೋವ ಜಮ್ಮ ಡ ಮುತ್ತಣಂಗ್ ತಾತಂಡ
ಪುಟ್ನನಮ್ಮ ರ ಆಶೀರ್ವಾದ)

(21.04.2000)

1. ಬಯತ್ ದುಂಬ್ಚೆದ ನೀಕಿಂದ್ ಆರ್
ಕುಡ್ಚಿ ಬೊಳಂದಂವೊ ನೀನ್ ಕಾವೇರಿ ನೀರ್
ಕಡ ಏಳ್ ದಾಟಿ ನೀ ಪಾರಿ ಪೋನದ್ ನೇರ್
ಕೊಡಗ್‌ರಾಳತ್ ಉಂಡ್ ನೀಡ ತಾಯಿಬೇರ್
ಮರಕತಿರ್ ನೀಡ ಸಾಲ್ ಸಂತಾನ ದಾರ್ ದಾರ್
ಕೊಡವ ನಾನ್‌ಂದ್ ಪಾಡ್ ಎದೆತಟ್ಟಿ ಜೋರ್
ಕೊಡಗ್‌ರ ಕೇಳಿನ ಭೂಲೋಕತ್ ಸಾರ್
ಭಾಗ್ಯ ಪರಂದಿತ್ ಬಾಳ್ ಕಾಲ ನೀ ನೂರ್

2. ಈ ಭೂಮಿ ಬಲ್ಯೋರ್ ಚೆಂಡ್
ಅದ್‌ಂಗುಂಡ್ ತೆಳಿ ಮೂಡ್‌ದಂಡ್
ಸೂರ್ಯ ಕೇಕಲದ ಮರೆಯಾಚಿ ತಾಂದ್
ನೀನುಳ್ಳ ಪಡಿ ಇಗಾರ್‌ಲುದ್‌ಚಿ ಬಂದ್
ಮೂಡ್‌ದಂಡುಳ್ಳ ಈ ಗೋಲ ಒಂದ್
ನೀ ನೋಟ್ ಆಬರಿಲ್ ನಿಂದ್
ಸಾಲ್ ಸಂತಾನ ಈ ಬರಿಲ್ ಉಂಡ್
ದಿನ ನೀಸ್ ಕೊಡವ ತಕ್ಕೇ ಪರಂದ್

||ತಾತಪ್ಪ||

21.4.2001

3. ಬಯತ್ ದುಂಬ್‌ಚಿ ಮೋನೆ ನೀಕಿಂದ್ ಏಳ್
ದೂರ ಪೋನಂವೊ ನೀನ್ ಪಾರಿಕಡ ಏಳ್
ಬಪ್ಪ ಕಯ್ಯುವ ನಾಕ್? ತೊಂಡ ನಾನ್‌ಲೋ ಕೇಳ್
ನೀಡ ಗೇನತ್‌ಲೆ ಕಯಿಪಿ ನಾ ನಾಡ ನಾಳ್

ಗುಟ್ಟೊಂದ್‌ಲೆಣ್ಣುವಿ ಅದ್‌ನೊಮ್ಮೆ ಕೇಳ್
 ಸತ್ಯವಂತಂಗೆ ಇಲ್ಲೆ ಬಾಳ್‌ಲದ ಸೋಲ್
 ನಯಿಚಂವಂಗುಂಡೆಂದು ನೆಯಿಕ್ಕೂಳ್ ಪಾಲ್
 ಜನಳೆಂದು ತಿರಿಕತೆ ನೀ ಮೇಲ್‌ಕೇಳ್

ಕಾಲ ಬರಣೆಕು ನೀನ್ ಸಮಧಾನತ್‌ಲೆ ತಾಳ್
 ಕಾವೇರಮ್ಮನ ಬೋಡಿ ವರ ನೀನ್ ಕೇಳ್-
 ನೀತಿ ಧರ್ಮತ್ ನಡ್‌ತುವಕ್ ನೀ ನೀಡ ಬಾಳ್
 ಸತ್ಯ ಧರ್ಮತೆ ಕಾಲನೂರ್ ನೀ ಬಾಳ್

||ತಾತಪ್ಪ||

21.4.2002

4. ಬಾಳ್‌ರೇಣಿಲ್ ಪತ್ತಾನಂವೊ ನೀನೆಟ್ಟ್ ಮೊಟ್ಟ್
 ಬಲತೆ ಕಾಲ್‌ಡ್ ಒಯಿಂಬದಾಂಗ್ ಮಕ್ಕ ಕಳಿಬುಟ್ಟ್
 ಕುಂಞಿಯಲ್ಲಡ ಇಂಞಿ ಮಕ್ಕ ಕಳಿಯಾಗ
 ಕೊಂಞಿ ತಕ್ಕಕ್ ನೀಕ್ ಇಂಞಿಲ್ಲೆ ಜಾಗ!
 ಏಳ್ ಕಡ ಕಾಬರತ್ ನೀನುಳ್ಳ ಕೇಳ್
 ಕೊಡವಾಮೆಲೇ ನೀನ್ ಎಕ್ಕೊಲೂ ಬಾಳ್
 ಪೊನ್ನ ಪಣ ಕೊದ್‌ಚಂಡ್ ಚದಿಚಾಲ್ ಬೋಂಡ
 ಆಸ್ತಿ ಕೊದ್‌ಚಿತ್ ನೀನ್ ಒಕ್ಕ ಮುಡಿಯನು ಆಂಡ
 ದೇವನೊಬ್ಬನ ನೀನ್ ಎಕ್ಕೊಲೂ ನಂಬ್
 ಅಂವೊ ಮೆಚ್ಚನಕ ನೀಡ ಮೊಟ್ಟ್ ಮೊಟ್ಟ್‌ಕೂ ಇಂಬ್

||ತಾತಪ್ಪ||

* * * *



ಜಮ್ಮಕಾರಂಡ ಮೋವ

(ಡಾ.ನರಸಿಂಹ ಸ್ವಾಮಿರ ಮೈಸೂರ್ ಮಲ್ಲಿಗೆ ಪುಸ್ತಕತಾರ "ಶಾನುಭೋಗರ
ಮಗಳು ಪಾಟ್‌ರ ರೂಪಾಂತರ")

ಜಮ್ಮಕಾರಂಡ ಮೋವ,
ಅವ್ವನಿಲ್ಲತ ಕನ್ನಿ
ಮುತ್ತ ಪೋಲತ ಮೂಡಿ ಊರ್‌ಕೆಲ್ಲ
ಕೊಣೆ ಎಲಂಗೆ ಅವಕಿಲ್ಲೆ
ಪೆದವೋ ಕಾವೇರಮ್ಮೆ
ನದಿನೆಟ್ತ್ ದುಂಬ್‌ಚದ ತಂದ್ ಇಲ್ಲೆ!
ಅವ್ವನಿಲ್ಲತ ಕನ್ನಿ ಕಣ್ಣಾರೋಳ್ ತೆಡ್ ಮಿನ್ನಿ
ಓರಮ್ಮ ಕಣ್ಣೇರ್ ದವಡೆಲೊಕ್ಕು
ಅವ್ವ ಬಂದಿತ್ ನನ್ನ
ಕುಂಞಂದೆಣ್ಣೆತ್ ಕೊದ್‌ಚಿ ಎಕ್ಕ-
ಕಾಕುಂದ್ ಅವಡ ಪೊವ್‌ಲ್ ಕೆನಚಿ!
ಪಕ್ಕತ್‌ರ ಕೂವತ್‌ಂಜಿ
ಮಿನಿಮಿನಿ ಬಿಂದಿಗೇಲ್
ನೀರೆಡ್‌ತ್ ಬಪ್ಪಕದ ನಿಂದ್‌ನೋಟ್
ಕಡ್‌ಚಿಕುಂಞಿನ ತಬ್ಬಿ
ಕೊದ್‌ಚಂಡಿಪ್ಪಕ ಅವಳ
"ನೀಡೊಡಿಯ ದಾರ್"ಂದ್ ಕೇಟ್‌ನೋಟ್
ಮೊನಿಯಾಂದ್ ಪ್ಪಾಂಟರ್‌ರ ಕೊದಿ
ಮೋಂವನೊಬ್ಬನ್ ಐಕಾನ್
ಕಾರ್‌ಳ್‌ಂಜಿ ತೆರ್‌ಚ ಬಾತ್!
"ತೋಟಕಾರಡ ಸಾಲ ಬ್ಯಾಂಕ್‌ಕಾರಕೆ
ಗೊತ್ತ ನಾಕಯ್ಯ"ಂದೆಣ್ಣೆರ್‌ತ್
ಬಾಡೆಲಳ್‌ತ್

ಮೋವ ಪರ್ಂದದ್ ಕೇಟ್
 ತೆಳ್ಚಿರ್ತ್ ಅವಡಪ್ಪ
 ತೂಕ್ಬೊಳಕಾರ ತಿರಿಯೆ ಕೆಟ್ ಪೋಚಿ!
 ನಾಯಿ ಊಂದತ್ ಪೊರಮೆ
 ಕಾಕೆ ಕಾವದ ಎದ್ಕೆ
 "ಬಂದ ಬಟ್ಟೆಕ್ ಸುಂಕ ಇಲ್ಲೆ"ಂದೆಣ್ಣೆ
 ಅಂದಿ ನೇರತ್ಲಂದ್ ನಾಡ ತಂಗನ
 ಕಂಡ್ ಕನ್ನಿ ಪರ್ಂದತ್
 ತಾಂಡ ಮನಸ್ ತೊರಂದ್
 "ಬೊಳಿನಾಡ್ ಬಂಬ ದಿನ
 ಕಯಿವ ಬಾರಲೆ, ಕುಡ್ಕ
 ವಡಿಯನ ಕೂಡಿ ನಾ ಬಾವುಲೆ"
 ಬೇಂಗ್ನಾಡ್ ಕನ್ನಿ
 ತಿದ್ದಾನೋರ್ ತಿರಿಗೊಂಬೆ
 ತಂದ್ ಪರೆವದ ಇಂತ ಕಳ್ಳ ಕುಡಿಯ?
 ಜಮ್ಮ ಜಾಗತ್ ರೋಣಿ, ಓಡೆ,
 ಪಟ್ಟಿಯು ಪರೆವ
 "ಬಂದ ಬಟ್ಟೆಕ್ ಸುಂಕ ಇಲ್ಲೆ"ಂದೆಣ್ಣೆ
 ಜಮ್ಮ ಕಾರಂಡ ಮೋವ
 ಮುತ್ ಪೋಲತ ಕನ್ನಿ
 ತಂದ್ ಬಪ್ಪದ್ ಎಂದು ಕಷ್ಟ ಅಲ್ಲ
 ಒತ್ತೋರ್ ಒಕ್ಕತಾರ ತಂದ್
 ತೇಡಿಯ ಬರಡ್
 ತಡುವಾನಕೆನ್ನಣ್ಣೆ ನಷ್ಟ ಇಲ್ಲೆ!

"ಪೂಮೊಗ್ಗ ಚೋಂದಮ್ಮ"

ಡಾ. ನರಸಿಂಹಸ್ವಾಮಿರ

"ಮೈಸೂರ್ ಮಲ್ಲಿಗೆರ ಹೂವಿನ ಚಂದಮ್ಮ" ತ್ತರ ತರ್ಜುಮೆ.

ತೋಟಗಾರಂಡ ಮೋವ ಚೋಂದಮ್ಮ ಬಕ್ಕೂಂದ್
ಕಾತಳತ ಬಟ್ಟಿನೋಟಿ
ಚೋಡಿಮಾವುರ ಅಡಿಲ್ ಕೂವತ್‌ಲ್ ತೆಳ್‌ನೀರ್
ಕಾತಳತಿ ತವಳ ನೋಟಿ (ಕಾಕಿ)

ಚೋಂದಮ್ಮ ಬಕ್ಕೂಲ ಬಿಂದಿಗೆನ ಅರೆಲಿರ್‌ಕಿ
ಕೋತೂಲ ನಡುನ ನೆಳ್‌ಚಿ
ಬಟ್ಟೆ ಬರಿಲೆಕ್ಕೊಲು ಪೂಮಾಲೆ ಮಾರುವವ
ಮಾರುದ್ ಜಡೆರ ಕೊಣ್‌ಚಿ

ನೆಳಿ ನೆಳ್‌ಂಜಿ ಕಳ್‌ಚಂಡ್ ಕಿಲಿಕಿಲಿಂದ್ ತೆಳ್‌ಚಂಡ್
ಕೊದಿ ಚೆಂಬೆ ನಾಡ ತೊಂಬೆ
ಒಕ್ಕಿ ಬಪ್ಪ ಪೊಳೆ ಪೋಲೆ ಕೂಡಬಪ್ಪ ನಳಪೋಲೆ
ಬಕ್ಕೂಲ ಕನ್ನಿ ಗೊಂಬೆ

ಪೂತೋಟ ನವಿಲೆನಕೆ ಕೋಗಿಲೆರ ಸ್ವರ ಕೂಟಿ
ಪಾಡತಿರ ಓರ್ ರಾಗ
ಚೋಂದಮ್ಮ ಬಕ್ಕೂಲ ಬಿಂದಿಗೆನ ತೆಕ್ಕಿಯಂಡ್
ಕೋತುಲವ ಕೂವನೀರ್

"ನೀರ್ ಕೋತುವ ಕನ್ನಿ ನಿಲ್ಲೊಮ್ಮ"ಂದೆಣ್ಣೊನಕ
ನಿಕ್ಕೂಲ ನನ್ನ ಕಂಡ್
ಪೂಕಳತ್ ಬಟ್ಟೇಲ್ ಪೂಬೀಂದ್ ತೆಳಿಪನೆಕೆ
ತೆಳಿಕು ಅವ ಇತ್ತ್ ಬಂದ್

ಚೋಂದಮ್ಮ ಬಕ್ಕೂಲ ಬಿಂದಿಗೆನ ಬೀಜಿಯಂಡ್
 ಕೊಣ್ಚಿಯವ ನಾಡ ಚೋಂದು!
 ಕೂವತ್‌ಲ್ ಬಗ್ಗಿಯಂಡ್ ಕೋತುವಕ ಕೈತಡತ್
 "ಒತ್ತವಿಯ ಮಂಗಲಕ್"ಂದ್

ನೆರಿ ಬಲ್‌ಚಿ ಕೇಪಿನಾ "ಚೋಂದಮ್ಮ ನೀನೆಕ್ಕ
 ನಾಡ ಮನೆ ಪತ್ತುವಿಯಾ"ಂದ್
 ಚೋಂದಮ್ಮ ಕೈಬಳೆನ ಕುಲ್‌ಕಿರೋಂಜಿ ತಕ್ಕು ಅವ
 ಪೂಂದೆಳಿಲ್ ಉತ್ತರತ್‌ನ

ಚಪ್ಪಯಂಡ ನಳತಡಿಲ್ ತಂಪ್ ಓಣಿರ ಬರಿಲ್
 ನಾಡಮನೆ ನಾಡ ಬದ್‌ಕ್
 ತಂಪಾನ ತೋಡ್‌ಬರಿ ತಟ್ಟೋತ್ತ ಬಾರಿಕೆಲ್
 ಅತ್ತ ಕಡಚಿಯ ನಾಡ ಬಾಳ್‌ಕೊದಿಕ್

ಚೋಂದಮ್ಮ ಬಂದಿಲ್ಲಿ ಚಂದೊಳತ್ ಪೊಲವುಲ
 ಕಾಂಗು ನಾ ಪೊನ್ನ ಕೆನಚಿ!
 ಚೋಂದಮ್ಮ ಕೈಪುಡ್‌ಚಿ ಬಕ್ಕೂಂದ್ ಬನಕಾಡ್
 ಕಾತಿತದ ಪೂವ್‌ಪರತಿ

ನಾನಟ್ಟ ಮಾವೂಲ್ ಪೊಲಂದ್ ಬೈಟಾಕಣೆಕೂ
 ಗ್‌ಣಿ ಕುಂಞಿ ಪಾಡಿತ್‌ಳಪ
 ಚೋಂದಮ್ಮ ಬಂದೀತ್ ಪಾಟೊಂದ್ ಪಡ್‌ಪ್‌ಚಿಡ್
 ಎಂದೆಣ್ಣಿ ತದ್‌ಂಡ ಪಾಟ್

ಚೋಂದಮ್ಮ ನೊತ್ತಕ ಪೊಂದೇರ್ ಕೋಂದಪ್ಪಿ
 ಚಂದ್‌ರಂಡ ಮೋವ ಅವಳೋ!
 ಅವಡಪ್ಪ ಕೇಟ್‌ಟಕ ಅಂಪಂಡುದ್ ತೊರ್‌ಂಜ್‌ರುವಿ
 ಪೊನ್‌ನೇ ಕೊಯತ್ ಕೋಂದ್

ಚೋಂದಮ್ಮ ಬಕ್ಕೂಲ ಬೊಳಿಕಾಟಿ ನಿಕ್ಕೂಲ
 ನಾಡ ಮನೆ ಪೊಲತು ಬಂದ್
 ಚೋಂದಮ್ಮ ಒತ್ತಂಡ್ ಕಿರಿತೊರಂದ್ ಬಕ್ಕೂಲ
 ಕೊಣೆಕಾರ್ತಿ ಮೂಡಿ ಅವಳೋ

ಒಳ್ಳಲ್ ಕೊದಿಬೆಚ್ಚಂಡ್ ಪೊರಮೆ ಚೆಡಿ ಕಾಟೂಲ
 ಬರತ ಚೆಡಿ ಕಾಟಿಯಂಡ್
 ಚೋಂದಮ್ಮ ಜಂಬತ್‌ಲ್ ಚೆಡ್‌ಂಜನೆಕೆ ಕಳ್‌ಚೆಂಡ್
 ನಡಕೂಲ ನನ್ನ ನೂಕಿ

ಚೋಂದಮ್ಮ ಚೆಡ್‌ಂಜಂಡ್ ನೀರೆಡ್‌ತ್ ತಳ್‌ಚ್‌ರುವಾ?
 ನೆಂಬಡಾ ಕೆನಚ್‌ರೊಳ್‌ಲ್
 ಮುಳ್ಳಿಲ್ಲೆ ಮೊನೆಯಿಲ್ಲೆ ಚೋಂದುರಾತಕ್ಕೊಲದ
 ಕರೆಯಿಲ್ಲೆ ಮನತ್‌ಲವಡ
 ಚೋಂದಮ್ಮ ಪೊಂದೆಳಿಲ್ 'ಒತ್ತೆಟಿಂಡ್' ಎಣ್ಣೂಲ
 ನೀರ್ ತೆಳ್‌ಚಿತ್ ನೆಲತಿನನ್ನ
 ಚಂದ್‌ರಂಡ ಮೋವಳವ ಚೋಂದಮ್ಮ ಗುಣಕಾರ್ತಿ
 ಒತ್ತಪೂ ಬಯ್ಯ ಒಮ್ಮ
 ಪಾಲ್‌ಂಗೂಳುಂಡಿತ್ ಪೂಚೊಡಿಸಿರಿಕನ್ನ
 ಬಕ್ಕೂಲ ನಾಡಮನೆಕ್

ಚೋಂದಮ್ಮ ಬಕ್ಕೂಲ ಚೆಂಡ್‌ಪೂಬೀಂದನೆಕೆ
 ತಕ್ಕು ಸುಖಿ ನಾಕ್ ಅವಳೊ
 ನಮ್ಮೆಡೂಟಿತ್‌ನುಂಡ್ ಒಬ್ಬಳೇ ಬಕ್ಕೂಲ
 ಬಕ್ಕು ಅವ ಕೂವ ಕರೆಕ್

ಕುಂಡ್ ಕುಡುಪುನ ದಾಟಿ ಮುಳ್ಳಾ ಬೇಲಿನ ನೀಕಿ
 ಬಕ್ಕು ಅವ ನಾಡ ಚೋಂದು
 ಚೋಂದಮ್ಮ ಬಕ್ಕೂಲ ಚೆಂಡ್‌ಪೂ ಬೀಂದನೆಕೆ
 ನಿಕ್ಕು ಅವ ನಾಡಬರಿಲ್

ಕೋಡಂಗು ಪ್ರೋಡಕು ಮಂಗಲ!

("ಮಂಗನ ಮದುವೆ" ಎಣ್ಣು ವೊ ಪಂಡೇತ ಮಕ್ಕಡ ಪಾಟ್‌ರ ಭಾವಾನುವಾದ)

ಬೆದಾರಡೆ ಮಳೆತುಳಿ ಬೂವಂಜತ್
ಸೆಖೆರೊಳ್ ತಂಪ್ ಕಾಂಬಜತ್
ಕೋಡಣ್ಣ ಕೇಡ್ ಕಳಿಪಂಜತ್
ಪೋಡೆಯು ಕೋಣೆಲ್ ತೆಳಿಪಂಜತ್!

ಕೋಡಂಗು ಕೋಳಿಕು ಬೆಂದೂರ್ತ
ಮಾಡಂಡುಂದೆಲ್ಲಾಡೊ ಪೋರಾಟ
ಪಶು ಪಕ್ಷಿಯ ಕೂಡಿ ಪರಂದತ್ತ್
ದೆಸೆ ಫಲ ಒತ್ತ ತಿರಂಜತ್ತ್!

ಕೋಡಂಗ್ ಕುಪ್ಪಿಯ ಇಟ್ಟತ್ತ
ಒಡಿಕತ್ತಿ ತೊಡಜ್‌ಕ್ ಕೆಣ್‌ಚತ್ತ್
ಮಂಡೆ ತುಣಿಯೊಂದ್ ಇಟ್ಟತ್ತ
ಗೆಜ್ಜೆ ತಂಡ್ ಕೈಕ್ ಕೊಡ್‌ತತ್ತ್!

ಲಾಗಾ ಪೊಯ್ಯಾರ ಕೋಡಣ್ಣ
ಧಕ ಧೈ ತುಳ್ಳಾರ ತಿಮ್ಮಣ್ಣ
ಕಾಲ್‌ನ ನೇತಿಯಂಡೋಡೊಮ್ಮ
ಬಾಲ್‌ನ ಬೀಜಿಯಂಡಾಡೊಮ್ಮ.

ಪೋಡೆರ ವಡಿಯನೆ ಕೋಡಣ್ಣ
ಮಂಗಲಕಾರ ನೀ ಕೇಳಣ್ಣ
ಪಶುಪಕ್ಷಿಯ ಕೂಡಿ ಬಾವಂಡು
ನೀನೇ ಇದೊಂಗಿಂದ್ ಮೊಳಿಯಾಂಡು

ನೀನೇ ಬಟ್ಟನೆ ಕಾಟ್‌ನಂವೊ
ಜಾತಿರ ಭೇದ ನೀಕ್‌ನಂವೊ

ಸಮಾಜ ಸುಧಾರಣೆ ಮಾಡ್‌ನಂವೊ
ನೀತಿನ ಲೋಕಕ್ ಸಾರ್‌ನಂವೊ"

ಪೋಡೆಯು ಪೊಂಗುಳಿ ಕುಳ್‌ಚತ್ತ್
ಪೊಂಗುರಿ ನೆತ್ತಿಕ್ ಇಟ್ಟತ್ತ್
ಚಿಂಗಾರ ಬೋಳೆಕ್ ಕೊಯತತ್ತ್
ಕಂಬಿ ಪೊಡಿಯ ಉಡ್‌ತತ್ತ್!

"ಕೊಕ್ ಕೊಕ್ ಕೊಕೊ ಪಾಡೊಮ್ಮ
ಕೋಡಂಡ ಪೊಣ್ಣ್ ನೀನಮ್ಮಾ
ಮಂಡೆ ಕುಂಬ್‌ಡುವೊ ಎನ್ನಂಗ್?
ಇಡ್ ಪೂಮಾಲೆನ ಕೋಡಂಗ್"

ಇನ್ನನೆ ಐಲಾಟ ಮಾಡ್‌ಚ್ಚಿ
ಕುಶಿಲವು ಕುಣ್‌ಕ್‌ಟ್ ಆಡ್‌ಚ್ಚಿ
ಕೋಡಂಡೊ ಕೋಳಿರೊ ಮೂರ್‌ತ
ನಡತ್‌ಚಿ ಮಜ್ಜಣ ನೇರತ್!

* * * *



ಬೆರಿಯ ಬಾ

(ರಾಷ್ಟ್ರ ಕವಿ ಕುವೆಂಪುರ "ಪ್ರೇಮ ಕಾಶ್ಮೀರ" ತಾರ ಬಾಬೇಗನೆ ಕವನತಾನ
ರೂಪಾಂತರ)

ಬೇಜರತ ಒಯಿಪತಿದ್ ನಾಕಿರಂಡು ನೀಬರಿಲ್
ಎಲ್ಲಿ ಪೋಯಿಯ ದೊರೆಯೆನೀ ಚೆರಿಯ ಬಾ
ಮೋಡಕವುಂಜತ್ ಬಾಣ ಮಂಕ್ ಕವುಂಜತ್ ಮನಕ್
ಒಂಟಿತನ ಕಾಕುವದ ನೀ ನೋಡಿಬಾ

ಮುಳ್ಚಿ ಸೂರಿಯನಲ್ಲಿ ಏಳ್ಳಾರಂಗ್‌ನ ಚೆಲ್ಲಿ
ತೆಳ್ಳಚಂಡಿಂಜಂವೊ ನೊಳ್ಚಿ ಮರೆಯಾಚಲ್ಲಿ!
ಇರಾಟ್ ಬಾಣತ್‌ಲಾಡಿಯ ಮಿನ್ನಿಚುಕ್ಕೆರ ಕಾಂತಿ
ಮರುಭೂಮಿ ಪೋಲತಾರ ಮೌನ ಶಾಂತಿ

ಕಟ್ಟೋಳೆಲೊಬ್ಬಳೇ ತುರಾಂಡಿ ಅಳ್ತಂಡ್ ನೀಡ
ಬಟ್ಟೆ ನೋಟಿಯಂಡುಳ್ಳ ಓಡೋಡಿ ಬಾ
ಮನತಾರಿರಾಟ್‌ನ ಕಳಂದ್ ನೆಮ್ಮದಿರ ಪಡಿತ್ತೊರಂದ್
ಮನ ತೆಳ್ಳಕ್ ಕೊದಿರಾಜ ಓಡೋಡಿ ಬಾ

* * * *

ಕೊಡಿ ರಾಣಿಕ್

(ರಾಷ್ಟ್ರ ಕವಿ ಕುವೆಂಪುರ "ಪ್ರೇಯಸಿಗೆ" ಕವನತಾರ ರೂಪಾಂತರ)

ಪಾಲ್ ಪೂವ್ ನೆಲಚಿ ತೇನ್
ಕಲಂದ್‌ಕೂಟಿ ತಾಯೆ ನೀನ್!
ಪೂವ್‌ಕೋಂಜಿ ಕಣ್ಣೆ ಚಾಯಿ
ನೆಲಚಿ ಕೋಂಜಿ ತೆಳಿಯೆಚಾಯಿ
ಪಾಲ್‌ಕೋಂಜಿ ಕವುಳ್ ಚೋದ್
ತೇನ್‌ಕೋಂಜಿ ಮುತ್ತೆ ಚೋದ್
ಪಾಲ್ ತೇನ್ ನೆಲ್ಲ ಮೀರಿ
ನೀನೆ ನಾಕ್ ದುಂಬ ಚೋದ್!

ಪ್ರಕೃತಿನ ಕಾಪಾಡನ

(ತುಳು ಭಾಷೆ ಸಂಚಿಕೆ "ಮದಿಪು" ಲ್ಲಾ ವಿ. ಸುಬ್ರಹ್ಮಣ್ಯಭಟ್ ಎಳ್ಳಾದಾನ
'ಪ್ರಕೃತಿ ಒರಿಪುಗ' ಕವನತಾರ ರೂಪಾಂತರ)

ಕುಂಞಿ ಮಕ್ಕಳೆ ಚೆನ್ನ ನಿಂದೊಳಿ
ಅಜ್ಜಂಡೊಕ್ಕಣೆ ಕೇಟೋಳಿ
ಬಲ್ಯಕಾರಿಯ ಆಂಡುಂದಾನಕ
ಚೆರಿಯ ಸಂಗತಿ ನರಿಯಂಡು

ಎಲ್ಲ ಕಾಲಕು ಕೇಳಿ ಕೇಪಕ್
ದೇಶ ನಂಗಡ ಬಾವೊಂಡು
ನೋಟಿ ಮಕ್ಕಳೆ ಪಚ್ಚೆಕಾಡದ್
ಎಚ್ಚೆ ಚಾಯಿಲ್ ಕಾಂಬದ

ಕೆತ್ತಿ ಮರತಾನ ಮುಡ್ಚಿ ನಾಡ್‌ನ
ನೇಡಿ ಕೂಟ್‌ಚಿ ಪಣತಾನ
ಪಣತಾರಾಶೆಕ್ ಪ್ರಾಣ ಬುಡುವವು
ಮಾನ ಬುಟ್ಟೊರ್ ಮಾಲವ

ನಟ್ತ್ ಗಿಡತಾನ ಬೊಳತಿ ಮರತಾನ
ನಾಡ್ ಪೊಲತಿತ್ ಕಾಟನ
ಮಳೆಯು ತೊರ್‌ಂಜಿತ್ ರೈತಬಾವಡ್
ಪಚ್ಚೆ ನೆಲ ಅದ್ ಎಲಂಗಡ್

ಬಾರಿ ಮಕ್ಕಳೆ ಪ್ರಕೃತಿ ಉಳತಿತ್
ತೆಳ್ಳಚಿ ಕಳ್ಳಚೆಂಡ್ ಬಾವನ

* * * *

ಅವ ದಾರ್?

(ಡಾ. ಐ.ಮಾ. ಮುತ್ತಣ್ಣಂಡ "ಅವಳು ಯಾರು?" ಕನ್ನಡ ಕವನತಾರ
ರೂಪಾಂತರ)

ಪಚ್ಚೆ ಪೊಡಿಯವೊ ಉಡ್‌ತ್, ರಂಗ್‌ಬಳೆ ಕೈಕೊಟ್ತ್
ಕೂಟ್ ಕರತಿಯಡೆಡೆಲ್ ನಡಂದವದ್ ದಾರ್?
ಚಿತ್ತಾಲ್ ಮದುವಡಿ ಪೂಪಚ್ಚೆ ಉಳ್‌ಪಿರೊಂಜಿ
ಚೆಂಡ್ ಪೂ ಕೊಯತಂಡ್ ಪಾಡ್‌ನವ ದಾರ್?

ನೆತ್ತಿಕದೊ ಕುರಿಯೊಟ್ತ್, ಜುಟ್ತ್‌ಕದೊ ಪೂಕೆಟ್ತ್
ಮೆಲ್ಲೆ ಮೊಟ್ಟೆಡ್‌ತ್‌ಟ್ತ್, ಪೋನವದ್ ದಾರ್?
ಜಾರುವೊರ್ ಸೆರಗ್‌ನ, ಬಲ್‌ಚಿ ಎದೆ ಮುಚ್ಚಿಯಂಡ್
ತಾಂಡ ಎದೆ ತಾನೊಟಿ ತೆಳ್‌ಚವದ್ ದಾರ್?

ತೆರಮೆ ನೋಟಿಯಂಡೊಮ್ಮ, ಬಳ್ಳಿ ನಡು ನೆಳ್‌ಚಂಡ್
ಇಗಾಣತ್‌ಲ್ ಕುಂಬ್‌ಟ್ತ್ ನಡಂದವದ್ ದಾರ್?
ಕೆರೆ ಏರಿ ಕಟ್ಟೆಲವ ಕಾಲ್‌ಜಾರಿ ತೆರ್‌ಚಿತ್
ಬೊರ್‌ಂಡಂಡ್ ಅತ್ತಿತ್ತ್ ನೋಟ್‌ನವ ದಾರ್?

ಮಣಿಮಾಲೆ ಕೆಂಪೋಲೆ ಕೊಪ್ಪುಂಬು ಕೆಮಿಯೋಲೆ
ಮೂಡ್‌ಕುರಿ ಮೂಕೊರಡ್ ಇಟ್ಟವದ್ ದಾರ್?
ಬಲಂಬೇರಿ ಕುಳಿಪಲ್ಲಿ ಬಾಲೆಕಾರಡ ಎಡೆಲ್
ತಾಮೆಚ್ಚೆನವನಲ್ಲಿ ತೇಡ್‌ನವ ದಾರ್?

ಪಾಂಬ್‌ಜಡೆ ಅತ್ತಿತ್ತ್ ಒಂಟಿಸರ ಕೊರಸುತ್ತ್
ಕಾಲ್ಪಳೆವ ಚೆರ್‌ಗೆಚ್ಚೆ ಕೊಯತ ಇವ ದಾರ್?
ಊರ್ ಪೊಂಗಡ ಸಾಲ್, ಎಡೆಲಾಡಿ ಕೂಡಿಯಂಡ್
ಬೊಳಕ್ ನಮ್ಮೆಕ್ ಅಂದ್ ಪೋನವದ್ ದಾರ್?

ಅತ್ತ ಬಾಣೆರ ನಡುಲ್ ಪಾಟ್ ತಾಕೆಟ್ಟಿಯಂಡ್
 ಉಯ್ಯಾಲೆ ಜೂಂಗಿಯಂಡ್ ಪಾಡ್‌ನವದಾರ್?
 ಗ್‌ಣಿ ಕುಂಞಿ ಪಾಡುವಕ, ಮರಕೊಟ್ಟಕೊಟ್ಟುವಕ
 ಕುಣ್‌ಕಟ್, ತಾಂಡೊಟ್ಟಕಾಡ್‌ನವ ದಾರ್?

ಮಂಗರುವ ದೊಳಂಬಿತ್ ಜುಳುಜುಳುಂದೆಣ್ಣುವಕ
 "ಸದ್ ಮಾಡತೆ"ಂದೆಣ್ಣಿ ಬಜ್ಜವದ್ ದಾರ್?
 ಪಚ್ಚೆ ಕಾಡೆಲೆ ಬಳ್ಳಿ, ತಾನುಡ್‌ತ ಪೊಡಿಯಕ್
 ಒತ್ತ್ ಬೂವುಲೆಂದೆಣ್ಣಿ, ಕೊರಗ್‌ನವ ದಾರ್?

ಬೊಳ್‌ತ ಬಾವುರ ಇರಲ್ ನೆಲಚಿ ತಾನೊಟಿಯಂಡ್
 "ನಾನೆ ಚಾಯಿ"ಂದ್ ಮನತ್ ಪರಂದವದ್ ದಾರ್?
 ತಾಂಡಪ್ಪನಕ್ಕಕ್ಕ "ಮಾಂವಾ"ಂದ್ ಕಾಕುವಂವೊ
 ಈ ಬಂಬ ದಾರ್‌ಂದ್ ಬೇರ್‌ಚಿಟ್ಟವ ದಾರ್?

* * * *



ಮರೆನಾಡ್ ಮೂಡಿ

(ಡಾ. ಕೆ.ಎಸ್. ನರಸಿಂಹಸ್ವಾಮಿರ "ಹಳ್ಳಿಯ ಚಿಲುವೆ" ಎಣ್ಣು ವೊ ಕವನತ್‌ರ
ಭಾವಾನುವಾದ)

ಮರೆನಾಡ್‌ರೊಳ್‌ಕೆಲ್ಲ ನೀನೊಬ್ಬಳೇ ಚಾಯಿ
ಚಾಚೆಬೆಚ್ಚಿತ್ ಕಾಕಡ ನೀಡವ್ವನ ಮಾಂವಿ?
ಅಪ್ಪಂಗವ್ವಂಗ್ ನೀನ್ ಒಬ್ಬಳೇ ಮೋಪ
ಕಾಕಿರುವಿ ನೀಡಪ್ಪನ ಕೊದಿಲೊಮ್ಮ ಮಾಂವ!
ಪಾಬೊಳಿಯ ರಂಗ್ ಅದೋ ನೀಡ ಮೂಡ್
ಅದೆ ನೋಟ್ ನೆರೆ ಜನಕ್ ಮನದುಂಬ್ ಕೇಡ್

ಉಡ್‌ತ ರೇಷಿಮೆಕಿಂಜು ನೀಡ ಮೇಲದ್ ಮಿನಾಸ
ಬೋರೆ ಮೂಡಿಯ ನೀಡ ಈ ಚಾಯಿನ ಸಹಿಸ!
ಬಯತ್ ದುಂಬ್‌ನ ಕನ್ನಿ ನಾಡ ತಕ್ಕನ ಕೇಳ್
ನನ್ನ ಕೂಡಿತ್ ನೀನ್ ಸುಖಿತ್‌ಲೇ ಬಾಳ್!

ಪೊವುಲೆಲ್ಲ ನಯಿಪಿ ನಾ ಕೆತ್ತೆ ಮಣ್ಣಾಲ್ ತೊಯಿಂಜಿ
ಫಲತಪ್ಪ ಭೂತಾಯಿ ಪೊನ್ನಾನೇ ತೊರ್‌ಂಜಿ
ನೀಡ ಕೆಲ ದುಂಬಣೆಕು ಕೂಳ್‌ಪೆರೆ ಪಾಲ್
ನೀ ಪಡಂಡ ಬಾಳ್‌ಲ್ ಒಮ್ಮಲೂ ಗೋಳ್!

ಕಣ್ಣ್ ಕುಯಿಬದ್ ನೀಡ ಗರಿಕೆ ಚಿಗ್‌ರಾರ ಪೊದೆಯೊ
ಪೂಮೆತ್ತೆ ಅಡಕ್‌ನದೆ ನೀಡ ಆ ಎದೆಯೊ!
ತಲಮಿ ನೆಜ್ಜದ್ ನೀಡ ನಾಗರಾಜಂಡ ಜಡೆಯೋ!
ಏದ್ ಗಂಧರ್ವ ಕನ್ನಿಕ್ ಚಾಯಿಲ್ ನೀಕಡೆಯೋ?


ಯಾಕತಯಿಪಕ ಕಾಂಬ ಕಲಕ್ ನೀರ್‌ಲ್ ನಿನ್ನ!
ಆಕ ಉಪ್ಪಕ ಕಾಂಬ ನೇಂಗಿಸಾಲ್‌ಲು ನಿನ್ನ!
ಕೊದಿಯೊಂದೆ ಕೇಪ ನಾ ಕೈತೊತ್ತ್ ನಿನ್ನ
ಕಯ್ಯಂದೆಣ್ಣೆ ರತೆ ನೂಕಿ ನೀನೆಂದು ನನ್ನ.

ಮಂಗಳಂ

(ರಾಗ: ಆದಿ ಕಾವೇರಮ್ಮ ದೇವಿರ ಪಾದಕೆಕ್ಕೊಲು ಮಂಗಳಂ)

(ಪಂಡೇತ ಕೊಡವಡ ಪರಿಸರ ಪಿಂಞ ಜೀವನಕ್ರಮಕೊತ್ತಿತ್ ಎಳೊದ್ನದ್.
ಅವಶ್ಯ ಉಳ್ಳ ಗೆರೆನ ಮಾತ್ರ ಆಂಜಂಡ್ ಪಾಡೊಲು).

ಆದಿಕಾರೊಣ ಮೂಲ ಪುರುಷಂಡ ಪಾದಕೆಕ್ಕೊಲು ಮಂಗಳಂ
ಆಯಿರೊಕ್ಕಡ ಆದಿಪುರುಷಂಗ ಗುರುವೆ ಕಾರೊಣ ಮಂಗಳಂ
ಕುಂದ್ ಕಳತಿತ್ ಪಂಡ್ ಬಾಳೊನ ಅಜ್ಜಂಡಜ್ಜಂಗು ಮಂಗಳಂ
ಪಡೆಲ್ ಪೊತ್ತಿತ್ ಒಕ್ಕ ತಾಂಗ್ನ ಓಣಿ ಬೀರಂಗು ಮಂಗಳಂ
ಪೊತ್ತ್ ಚತ್ತೊರ್ ಒಕ್ಕಬೀರಂಗ್ ಮಕ್ಕ ಪಾಡನ ಮಂಗಳಂ
ಮುಂದ್ ನಾಳಿತ್ ನಂದ್ ಮಾಡ್ನ ಅವ್ವಂಡವ್ವಂಗು ಮಂಗಳಂ
ಶತ್ತುನಡತ್ನ ಮಿತ್ರಕೂಟಕ್ ನಿತ್ಯಪಾಡನ ಮಂಗಳಂ
ಚಿಕ್ಕಿಚೋತಿತ್ ಒಕ್ಕ ಪೊಲತುವೊ ಒಕ್ಕಪೆಯೊಂಗ್ ಮಂಗಳಂ
ಪಟ್ಟಿ ತಳಕತೆ ಒಕ್ಕ ಆಳುವೊ ಪಟ್ಟಿದಾರಂಗು ಮಂಗಳಂ
ಆರ ಬೇರತ್ನರ್ಂಜಿ ತಾಂಗುವೊ ಅರುವಂಡೊಕ್ಕಕು ಮಂಗಳಂ
ನ್ಯಾಯ ಪರಂದಿತ್ ನಾಡ್ ನಾಳುವೊ ತಕ್ಕಂಡೊಕ್ಕಕು ಮಂಗಳಂ
ಸತ್ಯಧರ್ಮತು ನೀತಿನೇಮತು ಬಾವೊ ಮಾಲೊಕ್ ಮಂಗಳಂ
ಕೋಟೆ ಪೊಲತೆ ಕಾತ್ ನಿಂದೊರ್ಕುಂದ್ ಸಾಲೊಕು ಮಂಗಳಂ
ಕಾಡ್ ಬನತ್ನೊ ಕೊಲ್ಲಿ ತೋಡ್ನೊ ತೊತ್ತ್ ಪಾಡನ ಮಂಗಳಂ
ಭೂಮಿ ಬಾಣೆನೊ ಸೂರ್ಯಚಂದ್ರನೊ ಕೊಟ್ಟಿಪಾಡಿತ್ ಮಂಗಳಂ
ಕಾತ್ ನೀರ್ನೊ ತಿತ್ ತೆಡ್ಲೊನೊ ತೊತ್ತಿತೆಕ್ಕೊಲು ಮಂಗಳಂ
ಕೊಡವ ತಕ್ಕೊನೊ ಉಡ್ಪ್ ತೊಡ್ಪ್ನೊ ಮೆಚ್ಚು ವಯಿಂಗಕು ಮಂಗಳಂ
ಆದಿಕಾರೊಣ ಮೂಲ ಪುರುಷಂಡ ಪಾದಕೆಕ್ಕೊಲು ಮಂಗಳಂ



ಎಳ್ಳಾಕಾರಡ ಪರಿಚಯ

'ಪಾಂಗೊಳ' ಕವನ ಸಂಕಲನತಾರ
ಎಳ್ಳಾಕಾರಳಾನ ಬಾಚರಣಿಯಂಡ ಅಪ್ಪಣ್ಣ
12.4.1935ಲ್ ಬೇಂಗ್ ನಾಡಾರ ಕೊಳಗದಾಳ
ಗ್ರಾಮತಲ್ ಪುಟ್ಪ್ಪಚಿ. ಇತಿಹಾಸ

ಉಪನ್ಯಾಸಕನಾಯಿತ್ 40 ಕಾಲ ಸರಕಾರಿ ಚಾಕ್ರಮಾಡಿತ್ 1993ಲ್ ನಿವೃತ್ತಿ ಆಯಿತ್ ಇಕ್ಕ
ಕುಶಾಲನಗರತ್ಲ್ ವಾಸ ಉಂಡ್.

ಶ್ರೀಮತಿ ರಾಣು ಅಪ್ಪಣ್ಣ 12.11.1948ಲ್ ಕುತ್ನಾಡಾರ ಬಿ. ಶೆಟ್ಟಿಗ್ರಾಮತಾರ ಕಾಳೇಂಗಡ
ಮಾಚಯ್ಯ ದಂಪತಿಯಡ ಮೋವಳಾಯಿತ್ ಜನ್ಮ ಪಡಂದತ್. ಪೆರ್ತಕಾಲ ಕೂಡಿಗೇ ಶಿಕ್ಷಕ
ತರಬೇತಿ ಸಂಸ್ಥೆಲ್ ಕನ್ನಡ ಉಪನ್ಯಾಸಕಿ ಆಯಿತಿಂಜತ್. ಇಕ್ಕ ಕುಶಾಲನಗರ ಸರಕಾರಿ ಪದವಿ
ಪೂರ್ವ ಕಾಲೇಜ್ಲ್ ಉಂಡ್. ಈ ದಂಪತಿಯಡ ಮೋವ ವಿಂಧ್ಯ, ಕಾವೇರಿ ಕಾಲೇಜ್ಲ್
ಇಂಗ್ಲೀಷ್ ಉಪನ್ಯಾಸಕಿ ಆಯಿತಿಂಜವ ಜಮ್ಮಡ ಸೋಮಯ್ಯನ ಮಂಗಲಾಯಿತ್ ಇಕ್ಕ ಕೆನಡಾ
ದೇಶತ್ಲುಂಡ್. ಮೋಂವೊ ಡಾ|| ವಿಕ್ರಂ ಅಪ್ಪಣ್ಣ ಎಂ.ಎಸ್.ಸಿ., ಪಿ.ಜಿ., ಪಿ.ಹೆಚ್.ಡಿ. ಮಾಡಿತ್
ಕೆನಡಾತಾರ ಮೆಕ್. ಗಿಲ್(Mc. Gill) ಯೂನಿವರ್ಸಿಟಿಲ್ ಚಾಕ್ರಿಯಂಡ್.

ದಂಪತಿಯ ದಂಡ್ಕುರಿ ಅಮೆರಿಕಾ, ಕೆನಡಾ, ಸಿಂಗಾಪುರ, ದ. ಕೊರಿಯ ಹಾಂಗ್‌ಕಾಂಗ್‌ಲೆಲ್ಲ
ಪ್ರವಾಸ ಮಾಡಿತ್. ವಡಿಯ ಕೊಡವ ತಕ್ಕಾಲೂ ಪೊಣ್ಣ್ ಕನ್ನಡತಾಲೂ ಪ್ರವಾಸಕಥೆನ ಎಳ್ಳಾದಿತ್
ಧಾರವಾಹಿಯಾಯಿತ್ ಪ್ರಕಟ ಆಯಿತ್. ಕೊಡಗಾರ ಜನಪದ ಕಥೆ, ಫೀಲ್ಡ್ ಮಾರ್ಷಲ್
ಕಾರ್ಯಪ್ಪ, ಕೊಡಗಾರ ಕೈಗನ್ನಡಿ (ಕಥಾ ಸಂಕಲನ) ಕಯಿಪ್ಪೊಮೊವುಪ್ಪ (ಹಾಸ್ಯ ಕಥೆಯ) ಕೊಡಗಾರ
ಆರಬೇರ (ಪ್ರಬಂಧ ಸಂಕಲನ) ಇನ್ನನೆ ಪುಸ್ತಕತನೆಲ್ಲ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ
ಪ್ರಕಟ ಪಡತಿತ್. ಕೊಡವ ಸಾಹಿತ್ಯ ಕೃಷಿಲ್ ಪುರಾಡ್ ಪುಟ್ಪ್ಪಚಿಟ್ಟಿ ಡಾ|| ಐ.ಮಾ.ಮುತ್ತಣ್ಣ
ಪಿಂಞ ಬ್ರಹ್ಮಗಿರಿ ಸಂಪಾದಕ ಶ್ರೀ ಉಳ್ಳಿಯಡ ಪೂವಯ್ಯನ ಕೃತಜ್ಞತೆಲ್ ನೆನತವ.